

Ekwo

Ezekelu

Onye Mpfuchiru Chileke

Iphe, nɔgbaa ndzụ waa ọdu-biribiri Chipfu

1 ¹Tɔbudu iya bụ; o be l'apha k'ụkporo l'iri lẹ g'ɔnwa ẹno dụ l'abalị ise; gẹ mu lẹ ndu a kpuru lẹ ndzụ tukuru nọdu l'agụga ẹnyimu Keba; a gụhaa imigwe ghebe ọnu; mu phua ọphulenyia, shi l'ẹka Chileke. ²O be mbọku k'ise; l'ɔnwa k'ẹno, bụ apha kwe eze, bụ Jiehoyakinu apha k'ise, a kpọtaru iya lẹ ndzụ; ³Chipfu bya epfuru opfu yeru mube onye uke Chileke, bụ Ezekelu nwa Buzu. Ọ buru l'agụga ẹnyimu Keba l'alị Babilonu be mu nọ; Chipfu pfuaru mu iphe ono. Ọ buru l'ẹka ono be mu nọ; ike Chipfu kparwuta mu l'ẹhu.

⁴No iya; mu bya elee ẹnya; bya ahuma oke pherephere g'o shi l'uzo isheli ezi eje abya; urwukpu kpumia; me oku, alo ke waawaa; yele iphoro, charu vaa, no-pheru iya mgburugburu. Echilabo iya nodu ekeepho paapaapa g'ope. ⁵L'echilabo iya onokwapho be iphe ẹno, nɔgbaa ndzụ, gbaru ụgbugba gẹ nemadzụ nokwapho. ⁶G'ephe ha nwekotaru iphu ẹno ẹno; me nkù ẹno ẹno l'ẹhu l'ẹhu. ⁷Okpa phe pfukotaru nhamunha; obochi-okpa phe dukotaepho gẹ ke nweswi nshii; bya aphukota ngerengere g'onirubvu, a jiru manụ. ⁸Ephe fukota ẹka, dugbaa gẹ ke nemadzụ lẹ mkpula nkù ẹno ẹno ono, ephe fukotaru lẹ mgbureku ẹno phe ono. Ephe n'ẹno ono nwekotaru iphu me nkù. ⁹Nkù phe ono nodu edenyigbaa l'ibe iya. Ophu nonu nodu akwasejeerupho eje ala l'iphu; ophu ephe aghakobejedu aghakobe.

¹⁰Waa g'iphu phe dugbaa baa: Ephen'ẹno ono dụ gẹ ke nemadzụ. Uzo ekutara phe be ephe nweru iphu dụ gẹ k'oduma; l'uzo ekicha be ephe nwekotakarupho iphu, dugbaa gẹ k'eswi; teme ephe nwekwaarupho iphu, dugbaa gẹ k'ugo. ¹¹Noo g'iphu phe dukota bụ ono. Nkù phe ono be

jashikotaru ajashi l'uzo imeli. Ephe nwekotaru nkù ẹbo ẹbo, ephe jashi-charu iya; ophu nonu nodu edenyigbaa nkiya le k'ibe iya l'ibekeboebo. Ephe nwekwarupho nkù ẹbo ẹbo, ephe gude kpuchikota ogwehu phe. ¹²Ophu nonu nodu akwasejeerupho nhamunha eje ala l'iphu. O nodu abujeru ẹka unme ono shiru; ephe awuru tsoru iya; ophu ephe aghajedu aghagha.

¹³Iphe ẹno ono, nogbaa ndzu ono be ugbugba iya du g'icheku oku, enwu enwunwu; ozoo g'oroku, enwu jajaja. Oku nodu enwuepho ke phoo phoo iphu l'azu l'echilabo iphe ẹno pho, nogbaa ndzu ono. Oku ono nodu egbu ke nwiinwii; teme ebemu-igwe shikwapho l'oku ono alo ke phaaphaa. ¹⁴Iphe ono, nogbaa ndzu ono nodu eziepho ke phaaphaa g'ebemu-igwe. Ephe -ziru je l'uzo iphu; ephe e ziru je l'uzo azu.

¹⁵Ge mu elekpopho iphe ono, nogbaa ndzu ono; be mu byaru ahuma okpa ogba-kperekpere, no l'ali; no-kubegbaa iphe ono, nogbaa ndzu ono, nweru iphu ẹno ẹno ono. ¹⁶Ugbugba okpa ogba-kperekpere ono; me g'e gude mee phe be ephe egbukota nwiinwii ge kirisòlàyitù. Ophu nonu duchapho g'e pyokafuru iya l'ibe iya. ¹⁷O nodu abujeru teke okpa ogba-kperekpere ono weru tugba; be o wekwasejeru uzo lanu l'ime uzo ẹno ono iphe ono, nogbaa ndzu ono chebecharu iphu ono. Okpa ogba-kperekpere ono ta aswi-jijedu aswi-ji me o -nodu ewe atugbu. ¹⁸Igburonu iya hagbaa ephekerephe ephekerephe; bya adukwapho akpabiri. Igburonu okpa iya ono ephen'eno be ẹnya nokota gbaa mgburugburu. ¹⁹O nodu abujeru teke iphe ẹno ono, nogbaa ndzu ono tugburu; okpa ogba-kperekpere ono, nogbaa phe l'azu ono eweru tsoru phe. Teke iphe ẹno ono, nogbaa ndzu ono shi l'ali ngu-lihu; okpa ogba-kperekpere ono angu-lihukwapho. ²⁰Eka unme iphe ono, nogbaa ndzu ono shikpøerupho; okpa ogba-kperekpere ono atuko wu-lihukwapho tsoru phe; kele unme iphe ono, nogbaa ndzu ono be nokota l'ime okpa ogba-kperekpere ono. ²¹O nodu abujeru; ephe -tugba; iphe ono atugba. Teke ephe no-kirishiru; ephe ano-kirishia. Teke iphe ono, nogbaa ndzu ono gbè l'ali ngu-lihu; okpa ogba-kperekpere ono angu-lihukotakwapho tsoru phe; kele unme iphe ono, nogbaa ndzu ono be nokota l'ime okpa ogba-kperekpere ono.

²²Iphe, nokota iphe ono, nogbaa ndzu l'ishi be haepho osa osa g'akpaminigwe; bya achakota phuuphuu g'akamini; bya adu akpabiri. ²³O buru le mkpula iphe ono, heru gabala g'akpaminigwe ono be ephe jashikotaru nkù phe; o nodu edenyigbaa le nwibe iya. Ophu nonu nwechaaru nkù ẹbo ẹbo, kpuchitegbaaru iya ogwehu. ²⁴O nodu abujeru; ephe -tugba; mu anuma ukporo, nkù phe eme g'oda g'eka mini, achi oku aphu gbudugbudu; mbu o nodu ada g'olu-opfu Okalibe-kangokotaru-nu; mbu adaepho g'igiji ndu ojogu ede. Ephe pfuru no-kirishia; ephe aji-zeta nkù phe ono. ²⁵No iya; ephe pfu-kirishiepho; bya aji-zetachaa nkù phe ono; a numa olu-opfu, shi l'eli iphe, du g'akpaminigwe ono, no phe l'eli ishi ono.

²⁶L'eli iphe ono, dū g'akpaminigwe ono, nọ phẹ l'eli ishi ono bẹ o nweru iphe, dū g'aba-eze, e gude mkpuma sáfàyà mee, nọ iya nū. Iphe, dū gẹ nmadzū nọdu l'aba-eze ono. ²⁷Mu bya elee ẹnya; bya ahuma lẹ shita l'ẹka dū g'ọ bụ upfu iya je akpaa l'ishi bẹ dukota g'onirubvu, eke paapaapa; mbū dūepho g'ọ bụ oku nokota iya; shita l'ẹka dū g'upfu iya jeye l'uzo alì bẹ ọ dūepho g'okū; tẹmẹ ìphóró, egbu nwíinwii chaphee ya mgburugburu. ²⁸Oo ẹpho ẹgube ono, ẹko-mini aduje l'urwukpu lẹ mbokū, mini edze ono bụ ẹgube ìphóró ono dū; chaphee ya mgburugburu. Noo g'odu-biribiri Chipfu ono gude gbaa ụgbugba bụ ono. Mu hūmae ya phọ; mu daa kpupabẹ iphu l'alì; mu bya anuma olu onye epfu opfu.

Chileke gude kua Ezekẹlu g'o jeeru iya ozi

2 ¹Tọ bụ iya bụ; a sū mu “Nwa ndiphe; gbẹshi pfuru apfuru gẹ mu pfuru yeru ngu.” ²O nọdu epfu iphe ono; Unme Chileke bata mu l'ẹhu; bya ekulia mu; mu pfuru apfuru. Mu numa iphe, oopfu eyeru mu. ³O sū: “Nwa ndiphe; mu ezi ngu g'i jepfu ndu Ízurelu; mbū mkpukpu ono, bụ okwefurike, kwefuru mu ike ono; mbū ndu ono ẹphe lẹ nna phẹ shi k'eshinu metaru mu k'ẹhuka byasū ntanū-a ono. ⁴Ephe bụ ndu ẹjo okpomā; bya aburu ndu ta anudu anunu mẹ ililekpoo. Mu ezi ngu gẹ i jepfu phẹ je asū phe: ‘Wakwa iphe, Nnajiuphu, bụ Chipfu epfu baa.’ ⁵G'ẹphe bụ ndu ta anudu anunu-a; m'ẹphe -ngabẹru nchì-o; m'ẹphe ta angabeduru-o; g'ọ dūhabe ẹphe amarunu l'onye mpfuchiru Chileke bẹ nojeru l'echilabo phe.

⁶“Gube nwa ndiphe; gẹ ndzū phẹ ta agukwa ngu; ophu ndzū iphe, ẹphe epfu agukwa ngu. Gẹ ndzū ta agukwa ngu; e -gudekpoo l'ogarambo yẹ obvu bẹ gbaru ngu mgburugburu; tẹmẹ i buru l'ẹka akpì jiru ejiji. Gẹ ndzū iphe, ẹphe epfu ta agukwa ngu; ophu ẹhu arwushihukwa ngu; e -gudekpoo l'ẹphe bụ ndu ta anudu anunu mẹ ililekpoo. ⁷Oo iphe, mu pfuru bẹ ii-pfuru phẹ; g'ẹphe bụ ndu onu-ulo, ta anudu anunu-a; m'ẹphe ngabẹru nchì; m'ẹphe ta angabeduru.

⁸“Ole-a; gube nwa ndiphe; ngabekwa nchì l'iphe, mu epfuru ngu. Ta abukwaru onye ekwefuje ike gẹ ndu onu-ulo ono kwefuru. Saa onu; ria iphe, mu anū ngu.” ⁹No iya; mu bya elee ẹnya; hūma ẹka, a machiru mu. Ẹka obu pfupfube ekwo, a phukoru aphuko. ¹⁰O bya aphushia ekwo ono l'iphu mu. Iphe, e dekotærupho l'ekwo ono ibekẹboebo bụ ẹkwa-aphu; waa nggumaphu; mẹ nshio mu nshio.

3 ¹Tobudu iya bụ; ọ sū mu: “Nwa ndiphe; ria iphe, e doberu ngu l'iphu; taa ekwo, a phukoru aphuko-a; g'ije epfuaru ndu Ízurelu opfu.”

²Oo ya bụ; mu saa onu; o woru ekwo ono, a phukoru aphuko ono ye mu l'onu gẹ mu taa. ³No iya; ọ sū mu: “Nwa ndiphe; taa ekwo-a, a phukoru aphuko-a, mu anū ngu-a; tajia ẹpho ngu.” Oo ya bụ; mu woru iya taa; ọ nọdu atso mu rengurengu gẹ manū-ẹnwu l'onu.

4Q bya asu mu: “Nwa ndiphe; tugbua nta-a jepfu ndu Ízurelu je epfuaru phe iphe, mu pfuru. 5Q to bukwa oha-ntsù, bu ndu opfu phe du ehuka anuma be eezi ngu g'i jepfu. Oo ndu Ízurelu be e ziru ngu g'i jepfu obu. 6Q to bukwa ikpoto oha-ntsù ono, opfu phe aduje ehuka anuma; mbu ndu iphe, ephe epfu tee dodu ngu enya be e ziru ngu g'i jepfu. Ome lo gbe buru phe be e ziru ngu g'i jepfu; m'ephe agbekwanu ngaberu ngu nchi okpobe angabe. 7Obenu le ndu Ízurelu be ta abyadu angaberu ngu nchi; noo kele o too hedu phe ihée angaberu mu nchi. Onu-ulo Ízurelu l'opfu be kpo-chiru okpoma buru ekwegekwe. 8Ole mu e-me ngu g'i buru enwubata enwubata; buru onye ejo-okpoma g'ephebedua bu. 9Mu e-me g'obu ka ngu eshihu ike; eme le mkpuma-egbe. Ge ndzu phe ta agukwa ngu; ophu ugbugba phe eyekwa ngu ebvu; e -gudekporo lephe bu ndu bu ndu ta anudu anunu.”

10Q byakwa asu mu: “Nwa ndiphe; ngaberu mu nchi rengurengu; woru iphe-a, mu epfukotaru ngu-a dobekota l'ime obu ngu. 11Tugbua nta-a jepfu ndibe unu ono, a kpuru le ndzu ono je epfuaru phe; su phe: ‘Waa iphe, Okalibe, bu Chipfu epfu baa!’ Pfuaru phe iya; me o -bu lephe kwetarù ngabe nchi-o; me o -bu lephe te ekwetaduru-o.”

12Tobudu iya bu; Unme Chileke bya apalia mu imeli; mu numa igiji, aphu-ji aphu-ji, asuje: “G'a nodukwa leka Chipfu bu jaa odu-biribiri iya ajaja!” 13Mu numakwapho oda nkù iphe ono, nogbaa ndzu ono go denyi-jegbaa le ke nwibe phe; me igiji, okpa ogba-kperekpere ono, no laguga phe ono; mbu oke igiji, alwa ke gidigidi. 14No iya; Unme Chileke ono bya apalia mu imeli; paru mu tugbua; ehueghu ji mu obu ge mu atugbu ono; mbu ehuekwatakporo gbangahu mu okpobe agbangahu ge mu atugbu ono. Teke ono be ike Chileke kparwutaru mu lehu k'eze iya. 15Tobudu iya bu; mu jepfu ndu ono, a kpuru le ndzu ono, bu le Telu-Abibu le mgboru enyimu Keba. Mu je anodu leka ephe no; noduepho rakafu enya lechilabo phe mgburugburu noo abali esaa.

Aanmaru Ezekèlu okwa

(Ezek 33:1-9)

16O be ge abali esaa ono buerupho; Chipfu bya epfuru opfu yeru mu su; 17“Nwa ndiphe; mu mewaru ngu g'i buru onye-nche ndu Ízurelu; oo ya bu; teke i numaru opfu, shi mu lonu; jejekwa anmaaru phe okwa, mu nmaru ngu ono. 18Teke mu suru onye iwashi lo nwuhufutaje; ophu i ti nmaduru onye obu okwa; mbu ophu i ti suduru iya go haa ejo uzo, ootso; k'opfu ee-shi nno dzoo ya ndzu; be onye iwashi obu a-nwuhu nu-a; k'ejo-iphe, oome; ole oo kwanu gubedua be mu a-kpa ishi ochi iya. 19Q -bukwanuru li nmaru onye ono okwa; ophu o kwedu haa ejo-iphe, oome; ophu okweddu haa ejo uzo, ootso be oo-nwuhu nu-a; l'opfu ejo-iphe, oome ono; ole gubedua dzokwanaru onwongu. 20Ozo bu; teke onye

pfuberekoto paru eme iphe, pfuru oto haa; meahaa ejo-iphe be mu e-do-beru iya iphe; loovukota daa; dagbua onwiya. Eshinu i ti loduru iya eka le nchi be oo-nwuhu nu-a; k'ejo-iphe ono, oome ono, l'a-zohashikota iphe, du ree, o shi mee. Ole oo kwanu gubedua be mu a-kpa ishi ochi iya. ²¹ O -buru l'onye pfuberekoto be i nmaru okwa g'o to meshi ejo-iphe; ophu o to meduru ejo-iphe be oo-dzuru ndzu; kele o numaru okwa, i nmaru iya; teme gubedua dzokwapho onwongu.”

E me Ezekelu g'o pfubuhu opfu

²² Mu nodu l'eka ono; ike Chipfu bya akparwuta mu l'ehu; Chileke su mu: “Gbeshi jeshia l'eka ono, ali du baswaa ono; oo l'eka ono be mu e-pfuru opfu yeru ngu.”

²³ Tobudu iya bu; mu bya agbalihu tugbua jeshia l'eka ali du baswaa ono. Mu rwua l'eka ono bya ahuma odu-biribiri Chipfu, g'o no iya; mbu ophu du g'odu-biribiri ono, mu humajeru le mgboru enyimu Keba pho. Oo ya bu; mu daa kpube iphu l'ali. ²⁴ No iya; Unme Chileke bya akparwuta mu l'ehu; palia mu pube apfube. O bya epfuru yeru mu su: “Tugbua je agu-chia onwongu l'ulo ngu. ²⁵ Gube nwa ndiphe; epe a-tu ngu okpukpu gude kee ngu egbu; mbu kee ngu egbu k'ophu i tii tsoeduru ejephe lechilabo phe. ²⁶ Mu e-me g'ire nyakuru ngu lakpo; mbu k'ophu ii-pfubuhu opfu; g'i ti bajeheru phe mba; kele epe bu ndu ejo-okpoma. ²⁷ Ole teke mu pfuru opfu nu ngu be mu e-me g'i kpuhaa onu. Teke ono be ii-su phe: ‘Waa iphe, Okalibe, bu Chipfu epfu baa.’ Onye o du g'o ngabe nchi; loongabe iya; onye o to dudu g'o ngabe nchi; lo jika iya angabe; kele epe bu onu-ulo ta anudu anunu.”

Ophuleny a g'ee-gude keph ee Jierusalemu

4 ¹ “Oo ya bu; gube nwa ndiphe; pata eja-urwa, du bachibachi dobe l'iphu ngu; woru mkpukpu Jierusalemu see esese l'eli iya. ² Li bya esee g'ee-gude kepheta iya ekepheta; bvuphee ya ose-ogu; li bya esekwapho igbulu, ee-shi nyiba iya swikube iya; woru odu-ogu dobegbaa g'o no-kube iya; teme l'i woru okukpo, eegudeje enwukposhi igbulu dophee ya mgburugburu; ³ li bya ewota iphe-igwe, du osa bvube g'o buru igbulu igwe no-buharu unu le mkpukpu ono; l'i woru iphu ghaaru iya. G'o duplepho g'o bu mkpukpu, ekephetaru ekepheta k'ogu; o buru ngu kephetaru iya obu. Iphe ono be a-buru ndu Izurelu iphe-ohubama.

⁴ “Li bya aze aze; gbube mgbureku ekicha ngu; woru ejo-iphe ndu Izurelu bo onwongu. Abali ole, ii-zekota gbube onwongu nno be ii-vukotaru ejo-iphe phe ono. ⁵ Ukporo abali iri le tete l'abali iri, bu iya no onodu apha ole, epe mekotaru ejo-iphe; be mu e-me g'i vukotaru ejo-iphe ndu Izurelu. ⁶ Li bya aze-zeta aze ozo; ole k'ogu iya bu g'i ze gbube mgbureku ekutara; vuta ejo-iphe ndu Jiuda. Iphe, mu nuru ngu g'i gude vuru iya bu ukporo abali labo; ujiku lanu be no-chiru enya apha lanu.

⁷“Ghachi iphu l'iphe ono, egoshi g'ee-gude kepheta Jierúsalemu ono; chilia éka pfiaru mkpukpu ono éjo-iphe, mu sùru l'oo-me phe. ⁸Mu e-gude okpukpu kekoo ngu g'i tii chizi nchizi jeye i no-ghee ujiku ole, ii-ndudukota g'onye kephetaru mkpukpu k'ogu ono.

⁹“Li wota witi; me balì; me agwa; me azamu; me igberi; me supélutu wukotaru ye l'ite dobe, ii-gudeje emetaru onwongu buredi. Iphe ono be ii-nođu eri le teke ono, ii-ze le mgbureku ngu lanu ukporo abali iri le tete l'abali iri ono. ¹⁰L'iswikwapho nri eriri l'aswi; nri, ii-rije mboku-mboku be erwa iya a-duje ukporo shekelu lanu. ¹¹Mini, iingu anguangu be ii-ndudukwapho aswi l'aswi. Kutaje mini jiru okoro nshii, ngua mgbo lanu le mboku. ¹²Nri ono be ii-rije egube itaje akara bali-a. Nođu l'eka ndu Izurelu a-nođu ele ngu enya ghee ya; gudeje nshi nemadzu mee nku, e gude eshi ite.”

¹³No iya Chipfu su mu: “Oo egube ono bu ge ndu Izurelu e-ri nri, e merwuru emerwu l'ohamoha ono, mu a-chiru phe je edobe ono.”

¹⁴Noo ya; mu su: “Oowaa! Okalibe, bu Chipfu; mu te emerwushijekwaru onwomu. Eshi teke mu bu nwata byasu nta-a be mu te edejekwaru onu l'iphe, nwuhuru anwuhu; ophu mu atajeduru anu, anu-egbudu dzu-gburu; ophu anu, aaso nso, abahujeduru mu l'onu.”

¹⁵O su mu: “O du ree; mu haru ngu uzo g'i gudeje nshi eswi ghee buredi ngu obu; haa egude nshi nemadzu.”

¹⁶Tođudu iya bu; o su mu: “Nwa ndiphe; mu e-me g'eka nri eshije abata le Jierúsalemu chihu. Ephe a-chijeru uche l'eka eri nri, a turu atutu. Nwa mini, a tadaru atada l'iphe be ephe achijeru akurepho l'eka angu; ¹⁷kele nri waa mini be a-du uko. Onyenonu a-bujeru o -huma nwibe iya; o kpoo ya onu-opfu; kele ephe a-jokota eh wufu; mkpata iya buru éjo-iphe, ephe mekotaru.

5 ¹“Gube nwa ndiphe; pata ogu-echi, atsu nko; gude iya g'o buru akwo, eegudeje akpu ishi; gude iya kpushia ishi ngu waa éji-agba ngu akpushi. Li bya ewota iphe, eegudeje atu erwa iphe tu ya atutu gude kee ya ekèkè uzi eto. ²Ujiku olemole, i gude kepheta mkpukpu ono k'ogu -bvupho; li woru oke lanu l'ime uzo eto ono je akpoo oku l'echi mkpukpu ono. Li bya ekpotakwapho uzi lanu l'ime uzo eto ono gude ogu-echi gbubushia ya gbaphee mkpukpu ono mgburugburu; bya ekpotakwapho ophu kwe iya eto pheka shia l'imeli; kele mu a-mita ogu-echi gude chipyabe phe. ³Hakwarupho egbushi me éji-agba ono hata kekoo l'igburonu uwe ngu. ⁴Hatakwapho nwophu haa nwanshi chiru ye loku g'oku kepyashikota iya. Oo éka ono be oku e-shi gba-nwuhu dzuru, Izurelu l'ophu.

⁵“Wakwa iphe, Nnajiuphu, bu Chipfu epfu baa: Lekpodapho le Jierúsalemu be mu woru dobe l'echilabo ohamoha; ye igwerigwe mkpukpu, gbapheru iya mgburugburu. ⁶Ole ephe gude iwashi, ephe ewe kwefu ike l'ephe tee medu

ekemu mu; mē iphe, mu tōru ọkpa iya; mbū gbē kanū ekwefuru mu ike e -me lē g'ohamoha, nọ-pheru iya mgburugburu; mē mkpukpu, nọ-phekwaru iya pho. Jierúsalemú jikaru eme ekemu mu; jika etso iphe, mu tōru ọkpa iya. ⁷Oo ya bụ lē-a; wakwa iphe, Nnajiuphu, bụ Chipfu epfu baa: Unu ka mkpukpu ozo, buphekotaru unu mgburugburu aburu emekota emekota; ophu unu etsojedu iphe, mu tōru ọkpa iya sū g'etsoje; tēme ophu unu emejedu ekemu mu; mbū l'unu ta adukpodanu ike metaberu ekemu mu g'ohamoha, bupheru unu mgburugburu emeberu iya. ⁸Oo ya bụ lē-a; wakwa iphe, Nnajiuphu, bụ Chipfu epfu baa; o sūru: Mbēdua l'onwomu bē adawaa ngu ẹka l'ehu kē njo gbūbe Jierúsalemú. Mu a-nū unu chiipfuu g'ohamoha hūma. ⁹Lē k'ēbyi ono, unu emegbabe ono bē mu e-me unu iphe, mu teke emeswee; ophu mu abyadu emebaa egube iphe ono ozo. ¹⁰Oo ya bụ lē-a; l'echilabọ unu bē ndu bụ nna a-ta anū unwu phē; unwegirima ata anū nna phē. Mu a-nū unu chiipfuu. Ndu ophu phoduru nū bē mu a-chiru tūkaa nanū nanū.

¹¹“Wakwa iphe, Nnajiuphu, bụ Chipfu epfu baa: Eshinu mu nọ ndzū gē mu nọ iya-a; bē o doru ẹnya l'eshi ophu unu gudewaa ntēkpe, bụ iphe, aakpofu akpofu pharwushia ụlo mu, dū nsọ; bya arwū urwuali; bē mu e-wofu unu obu; ophu mu ta abyadu ele unu ẹnya kē phuaru unu obu-imemini; ophu mu tee dobedu unu ndzū. ¹²Ee-ke unu uzi ẹto; uzi lanū bē mgbu-onwu e-gbushi; ozoo ẹgu egbushia phē l'echilabọ unu; uzi lanū bē e-gude ogu-echi gbushia l'azū mkpukpu unu; uzi lanū ophuu bē mu a-chiru phekaa epheka; bya amita ogu-echi gude chipyabe phē.

¹³“Mu e-kpukposhi phē ẹhu-eghu mu; mbū lē mu a-tukoshi phē oke-ẹhu-eghu mu ono jasū mu emerwua phē iya g'ooghu mu. Mu -mechaa phē nno; ephe amaru l'opfu, mūbe Chipfu pfuru nū phē bē bụ l'okophoo bē mu gude pfua ya. ¹⁴Mu e-me unu g'unu buru ọla-l'iswi; unu abukwarupho iphe, e gude eme iphe-ochi l'echilabọ ohamoha, bupheru unu mgburugburu; mē l'ẹnya ndu aghata aghata.

¹⁵“Mu -gudeepho ẹhu-eghu mu nūa unu aphū; mbū gude oke ẹhu-eghu mu baerupho unu mba, ahū ọku l'ehu; bē unu a-buru ndu ohamoha ozo iphe e gude eme iphe-ochi; mbū ndu aanoduje epfutoshi epfutoshi; bya aburu iphe, a-nodu alo ndu ozo ẹka lē nchi; mē iphe, a-nodu eyeru ndu ozo ebvu. Noo iphe mūbe Chipfu pfuru bụ ono. ¹⁶Sū-a; mu a-gba unu ejo apfū ono, te edodu nemadzu edodo ono, bụ iya bụ egu ememe. Mu a-gba iya unu shi nno; mee g'unu buru mkpurupyata. Mu e-me g'okpa-nri; byapfuta unu ibyato; mu abya egbuchia ẹka nri eshije abata. ¹⁷Mu e-zi ẹgu-ememe yēe ejo anū-egbudu g'ọ bya awupyabe unu gbushigbua unwu unu. Ejo iphe-ememe yēe mgbugbumadzu bē e-je unu ije l'ehu. Mu e-gude ogu-echi bapfuta unu. O kwa mūbe Chipfu bē pfuru iya nū.”

Emebyi ndu agwajē iphe

6 ¹Tobudu iya bụ; Chipfu bya epfuru opfu yeru mu sū; ²“Nwa ndiphe; ghachiru úbvú, nogbaa l'alí Ízurelu iphu pfuru maberu mu phē; ³sū

phe: Unube úbvú, ñogbaa lẹ Ízurelu l'ophu; unu n̄makwa opfu, Nnajiuphu, bụ Chipfu epfu. Wakwa iphe, Nnajiuphu, bụ Chipfu epfu anụ unube úbvú l'ophu; m̄e unube nsuda l'ophu baa: Unu h̄uma ah̄uma lẹ mb̄edua l'onwomu abyaakwa egude ogu-echi byapfuta unu; t̄eme mu emebyishikwaphō ẹka unu agwajẹ iphe. ⁴Enya ẹka unu agwajẹ iphe bẹ ee-chikposhi; eenwukp̄oshia enya ẹka unu akpoje ùnwù-is̄ensu oku. Ndi-be unu bẹ mu e-gbushichaa t̄ukaa l'iphu agwa unu. ⁵Odzu unwu Ízurelu bẹ mu a-togbochaa l'iphu agwa phe; mu eworu okpu unu t̄ukaa l'enya ẹka unu agwajẹ iphe g'ò hakota. ⁶Iphe, bukpo ẹka unu bu ebubu bẹ mkpu-kpu, ñokota iya n̄ a-buru ochobu. Ee-nwukp̄oshikota ẹka unu agwajẹ iphe enwukp̄oshi; o dabyiru kẹ mmanu; buru iphe, a gbadoru agbado. Agwa unu bẹ aa-kup̄yashicha akup̄yashi; ephe alaa l'iyi. Eka unu akpoje ùnwù-is̄ensu oku aburu ẹka ee-tsukp̄oshikota etsukp̄oshi. Iphe, bukpo iphe, unu gude ẹka mee g'ò ha bẹ e-kpo g'eekpoje nt̄u-a. ⁷Ndibe unu bẹ ee-gbushi; ephe adaka l'echilabo unu; g'unu amakwanuru l'oo mb̄edua bụ Chipfu.

⁸“Ole o nweru-a ndu ophu mu e-dobe ndzu. Mb̄u-a o duru-a ndu ophu mu e-me g'ephe nah̄u ogu-echi ono; ephebedua bẹ aa-chikashi je edokashi; ephe edzuru al̄i ñonu; m̄e l'ohamoha, du iche iche. ⁹L'ohamoha ono, a kpuru phe laa ono bẹ ndu ophu phoduru n̄ l'ime unu a-ñodu nyata mu. Mb̄u l'ephe a-nyata g'ò gude du-beru mu eji; l'ephe bụ ndu obu phe du gheleghelehele l'eka mu ño; mb̄u l'ephe gbakutaru mu azu; bya ewochiaru iphu ghaaru agwa gwalahaa. Ephe -nyatae ya pho ephe ala onwophe ashi; k'ejo-iphe, ephe meru; waa k'eyi, ephe ño megbabe ono. ¹⁰O buru teke ono; bẹ ephe a-maru l'oo mb̄edua bụ Chipfu; l'ò t̄o budu kẹ mkpe bẹ mu shi pfua lẹ mu e-me g'ejo iphe-ehuka dapfuta phe ono.”

¹¹Nnajiuphu, bụ Chipfu bya epfuru yeru mu su: K̄ua ẹka pyaa; zo o kpa kpitikpiti l'al̄i; chia mkpu su: T̄uswekwa! Noo kele ndu Ízurelu eme ejo ah̄uma; o buru ogu-echi bẹ ee-gude gbushia phe; waa egu-ememe; me mgbu-onwu. ¹²Ndu ophu bu l'eka du enya bẹ bụ mgbu-onwu e-gbu phe; ndu ophu bu ntse buru ogu-echi bẹ ee-gude gbua phe; ndu ophu phoduru n̄; a -haa phe ephe ñodu ndzu bẹ bụ egu e-gbu phe. Noo ge mu e-gude kpukposhi phe oke ehu-eghu mu bụ ono. ¹³Teke ono; unu a-makwanuru l'oo mb̄edua bụ Chipfu; m̄e ndibe unu, e gbushiru egbushi -dakaepho l'eka agwa phe ño; mb̄u bya adaka nanu nanu l'enya ẹka ephe agwajẹ iphe; mb̄u l'eli úbvú úbvú, hagbaa l'eli; m̄e lẹ mkpakponu eze úbvú; m̄e lẹ mkpula oshi, jakashigbaaru ajakashi; mekpoo lẹ mkpula achi, ekwo du; mb̄u l'ekameka ono, ephe shi akpojeru agwa phe ùnwù-is̄ensu, eshi mkpo oku ono. ¹⁴Mu a-hali ẹka; wata phe ada ẹka kẹ n̄jo l'ehu; mee al̄i ono g'ò buru ochobu, dabyiru kẹ mmanu; shita l'echiegu ono jas̄u lẹ Dibula; je akpaa l'iphe, bụ ẹka ephe bukotakpoo ebubu l'ophu. Oo ya bụ g'ephe amakwanuru l'oo mb̄edua bụ Chipfu.

Teke ikpazụ ụakwaa ntse

7 ¹Tọbudu iya bụ; Chipfu bya epfuru yeru mu sụ; ²“Nwa ndiphe; wakwa iphe, Nnajiuphu, bụ Chipfu epfuru alị Izurelu baa: Ọ bvụ-o! Kẹ unu abvụ-o! Alị ono, gbaa mgburugburu bẹ nkiya bvụakwaru! ³Teke k'unu a-bvụ bẹ ruwakwaru nụ. Mu a-tukoshi unu ẹhu-eghu mu. Mu e-kpe unu ikpe g'iphe, unu eme gude dụ; pfukwaapho unu ụgwo ẹbyi, unu emegbabe. ⁴Mu ta abyakpoda ele unu ẹnya kẹ phuaru unu obu-imemini; ọphu mu abyadi edobe unu ndzu. Mu pfufutaje unu ụgwo iphe, unu eme; waa kẹ ẹbyi ẹbyi ono, eeme l'echilabọ unu ono. Noo teke unu a-maru l'ọo mbedua bẹ bụ Chipfu.”

⁵Wakwa iphe, Nnajiuphu, bụ Chipfu epfu baa: “Ejo iphe-ẹhuka bẹ kwokwaru ibe iya nkwo tankwo eje abya. ⁶Teke ikpazụ ruwakwaru! Mbụ lẹ teke ikpazụ bẹ ruwaru erwurwu! Ọ gbalihuakwaru ejewa abyapfuta unu! Ọ byarwutaakwaru abyarwuta! ⁷Unubẹ ndu bu l'alị-a; o ruwakwaru teke unu a-buru mkpurupyata. Teke ọ bụ bẹ ruwakwaru nụ. Mbụ l'eswenrimaphụ ọakwaa unu phakuu. Ọ tọo buakwa ebvu ẹhu-utso bẹ aa-nọdu agu; ọ buakwaa naganaganaga a-nọdu adagbaa l'úbvú úbvú.

⁸“Mu abyawaa unu atukoshi oke ẹhu-eghu mu; mu e-vuru ẹhu-eghu mu byabẹ unu l'ishi. Mu e-kpe unu ikpe iphe, unu eme; pfukwapho unu ụgwo ẹbyi, unu emegbabe. ⁹Mu ta abyadi ele unu ẹnya kẹ phuaru unu obu-imemini. Mbụ lẹ mu ta abyadi edobe unu ndzu; mu pfufutaje unu ụgwo iphe, unu eme; waa kẹ ẹbyi ono, eeme l'echilabọ unu ono. Noo teke unu a-maru l'ọo mbedua, bụ Chipfu bẹ echi unu iphe ono.

¹⁰“Lekwa! Ọ kwa ntanụ-a bẹ bụ mbọku ejo-iphe ọbu; mbụ l'ọo ruwakwaru! Ọla-l'iswi gbeshiakwaru ije! Mgbonu jaakwaru ajaja kpuru yegele! Eku-onwonye tushiwaa ige g'oshi-omi. ¹¹Ọo iwashi bẹ e gude ahụ nemandzụ ahụhu ejo-iphe. Ọ tọ dukwa ndu ono, duru onye ọphu aphodu nụ mbụ l'ikpoto ndu ono taa phodukwa; ọphu iphe, ẹphe nweru enweru aphodudu; ọphu iphe, aga lẹ mkpa a-phodukwapho. ¹²Teke ọ bụ ruwakwaru. Mbọku ọ bụ bẹ ụakwaa ntse. G'onye azuta iphe azuta te etekwa ẹswa; ọphu onye ere iphe erere agukwa aphụ; kẹle oke ẹhu-eghu dapfutaakwaru ikpoto ọha ono g'ẹphe ha. ¹³Mbụ-a; onye reru iphe bẹ taa gbataekwa iphe, o reru gbiriri jeye g'ephenebo a-nọ-beru; kẹle ọphulenyaa, a phuru l'ishi ikpoto ọha ono bẹ a ta abyadi agbanwe agbanwe. Ejo-iphe, ẹphe eme bẹ mewaru ọphu ọ tọ dudu m'onye lanụ, adụ ike adzọ onwiya ndzu. ¹⁴Ẹphe gbuwaru opu-ogu; tukowaa iphemiphe kwakọbe ree; obenu l'ọo to nwedu onye ọphu eje ọgu; kẹle oke ẹhu-eghu mube Chipfu tukowaru dapfuta ikpoto ọha ono g'ẹphe ha.

Ee-me ndu Izurelu omeliwe

¹⁵“Lazụ mkpukpu bẹ ogu-echi nọ kwagebe; l'ime mkpukpu bukwanuru mgbu-onwu waa ẹgu-ememe nọ iya. Ndu ọphu nọ l'ẹgu bẹ bụ ogu-echi bẹ

ee-gude gbushia phe. Ndu ophu no l'ime mkpukpu buru mgbu-onwu waa egu-ememe a-vu phe kpatakpata. ¹⁶Ndu phoduru nu be a-gbaru lachaa l'ubvu je anodugbaa kpoyoo ge ndo, no le nsuda; onyenonu a-nodu l'eka ono ara ekwa ejo-iphe, o mekotaru. ¹⁷Onyemonye be eka a-tsushihukota mee; ikpere aphugbaa onyemonye dori dori ge mini, ayo azamu. ¹⁸Ephe e-ye uwe-aphu; ndzu-agugu erwuta phe erwuta. Iphere ejikota onyemonye iphu; teme aakpushikota phe ishi akpushi. ¹⁹Mkpola-ochaa phe be ephe e-tuphashichaa le gbororo uzo; mkpola-ododo aburu phe iphe, aaso nso. Mkpola-ochaa phe; me mkpola-ododo phe be taa dudu ike adzota phe le mboku, Chipfu a-tukoshi phe oke ehu-eghu iya ono. O too dudu ike eme g'egu ta aguhe phe; ophu ephe egudeedu iya azu-ji onwophe ephe; kele o mewaru; ephe nwulahu l'eme ejo-iphe. ²⁰Mma iphe, ephe anya l'olu ama be ephe gude kuahaa onwophe. O buru iphe-olu ono be ephe gude akpushiru onwophe agwa; yee iphe, aaso oyi ono, ephe dobegbaaruo ono. Oo ya bu; mu e-woerupho iphe ono, mee g'o buru iphe, ephe a-nodu aso oyi.

²¹“Mu e-woru iya ye ndu ohozo l'eka g'o buru iphe, ephe a-kwata l'okwata; mbu mee ya g'o buru iphe, ndu iwashi, bu le mgboko-a a-natakota le nfu. O buru ndu ono e-woru iya merwushikota. ²²Mu e-wofu iphu l'eka ephe no; ndu ono abya emerwushikota eka ono, mu yeru enya ono; mbu le ndu ana-nfu a-bahu iya je emerwushia ya.

²³“Meta egbirigba; kele ali ono be bukota egbu-ochi be jiru iya ejiji; mbu le mkpukpu ono be buephe eme ehuka ehuka bu iphe, jiru iya nu. ²⁴Mu e-duta ndu kachakpo ewe iwashi l'ohamoha l'ophu; g'ephe bya anatakota phe unuphu ibe phe. Mu e-me g'ekuku, ndu nweru okpehu eku onwophe laa nlalanu; kele eka duru phe nsu be ee-merwushikota emerwushi. ²⁵Teke ejo ola-l'iswi byaerupho be ephe a-choahaa ehu-guu; ole ephe taa cho-vudu iya. ²⁶Ejo iphe-ehuka akwo ibe iya nkwo tankwo; teme ejo-nzi a-dakwapho mgbadapfu. Ephe a-noduje achi karaphaa g'eeshi ge ndu mpfuchiru Chileke phuru phe ophulenyaa; ndu-uke Chileke agbe zibuhufulenu ekemu; teme ndu bu ogerenya akpo-zibuhuru nemadzu uzo. ²⁷Onye eze a-nodu agu aphu; onye-ishi a-nodu o too maduru iphe, oome ememe. Ndu ali ono be eka a-nodu anmakota jijijijii. Mu e-me phe g'iphe, ephe eme gbaru. Mu e-gude g'ephe gbaru kpee phe ikpe. Noo teke ephe amaru l'oo mbedua be bu Chipfu.”

A phuru ophulenyaa l'aagwo nshi l'eze-ulo Chileke

8 ¹“Lime apha k'ishii l'abali k'ise lonwa k'ishii kwapho; be mu no l'ulo mu; ndu bu ogerenya ndu Jiuda tuko nodu l'atatiphu mu; unme Nnajiuphu, bu Chipfu bya akparwuta mu l'ehu. ²Mu bya elee enya; bya ahuma iphe, du ge nemadzu. Shita l'eka du g'o bu upfu iya jasu l'ali be du g'o bu oku; gb'e l'upfu iya jasu l'uzo imeli be egbuopho nwijnwii g'ope,

aphu ke ngerengere. ³Tobudu iya bu; o bya amachia iphe, du g'o bu eka woru mu legbushi. Unme Chileke ono palia mu imeli; mu nodu le mgbaka ali waa igwe. O buru l'ophulenyanya ono, Chileke meru; mu nodu aphu ono; be o gbekwapho pata mu jeshia Jierusalemu; mbu paru mu jeshia onu eka eeshije abahu l'onu-oguzo isheli k'ime oma-unuphu eze-ulo Chileke; mbu l'eka ono, e doberu agwa ono, akpatsuje oke ehu-eghu Chileke ono.”

⁴Mu bya elee enya huma odu-biribiri Chileke ke Izurelu; mbu ophu dupho g'ophu mu humajeru l'ophulenyanya l'ali, du baswaa pho. ⁵Noo ya; o su mu: “Nwa ndiphe; lekpodapho enya l'uzo isheli.” Oo ya bu; mu bya elee enya l'uzo isheli obu. O buru l'eka eeshije abahu l'uzo isheli l'onu-oguzo eka oru-ngweja no be mu humaru agwa ono, emeje g'e koo okophoo ono.

⁶O bya asu mu: “Nwa ndiphe; ?i humaru iphe, ephe eme; mbu ejo akpamara, ndu Izurelu eme l'eka-a; shi nno achifu mu achifu l'eka duru mu ns-a? Tem e bururo nta-a be jibya ahuma ejo akpamara ophu kabaro owa eshihu uka.”

⁷No iya; o duta mu jeshia l'eka eeshije abahu l'oma-unuphu eze-ulo Chileke ono. Mu rwua; bya elee enya huma enu, a hafuru l'igbulo ono. ⁸Onye ono su mu: “Nwa ndiphe; tua enu tu-fua igbulo ono uzo.” Oo ya bu; mu bya eworu igbulo ono tu-fua uzo; bya ahuma onu-mgbo l'eka ono. ⁹O su mu: “Bah je ahuma ejo akpamara, ephe eme l'eka ono.” ¹⁰Tobudu iya bu; mu bahu nu; bya elee enya huma unwu anu, du iche iche, awu-je l'epho g'e seshikotaru iya l'igbulo ono g'o ha; mekpoo unwu anu, aaso nso; mekwapho iphe, bu agwa ndu Izurelu g'o hakota. ¹¹Ndu bu ogerenya ndu Izurelu du ukporo umadzu eto l'umadzu iri pfukotaru l'iphu eka ono; Jiazanaya nwa Shafanu be yikwapho le ndu pfuru l'eka ono. Onyenonu pagbaar iphe, eegudeje akpo unwu-isensu oku l'eka; enwuru oku unwu-isensu, eshi kwekweekwee shi l'iphe ono akpu tutuutuu. ¹²O su mu: “Nwa ndiphe; ?Oo kwa i humaru iphe, ndu bu ogerenya ndu Izurelu anoduje l'ochii eme? Onyenonu be nochaa l'ulo agwa iya. Ephe nodu epfugbaa asuje: ‘Chipfu ta ahumakwaru anyi; teme le Chipfu gbakuta-kpoakwaru nu ali-a azu.’”

¹³O byakwa asu mu ozo: “Ghakpodapho enya ozo huma phe l'eka ephe eme iphe, kabaa ndu owa-a eshihu uka.” ¹⁴No iya; o bya eduru mu jeshia l'onu-oguzo, eeshije abahu l'ulo Chipfu l'uzo isheli iya; mu bya ahuma unwanyi, nogbaa anoo l'eka ono ara ekwa agwa phe, bu Tamuzu.

¹⁵O su mu: “?O kwa l'i humaru iya; nwa ndiphe? O gb e bururo nta-a be jibya eje ahumabakpooro ophu ka ndu owa-a eshihu uka.” ¹⁶O gb e teke ono bya eduta mu bahu l'ime ime oma-unuphu ulo Chipfu ono. L'onu-oguzo, eeshije abahu l'eze-ulo Chileke ono be iphe, rwuru unwoke ukporo l'ise no le mgbaka nwulo, no teme l'e rwua oru-ngweja Chipfu.

Ẹphe wokọtaru azu ghaaru eze-ulo Chipfu ono; woru iphu chebekota l'uzo ẹnyanwu-awawa. Ẹphe nodu ephozetajegba l'uzo ẹnyanwu-awawa abaru ẹnyanwu eja.

¹⁷Ọ sọ mu: “Ọ kwa i humaru iya; nwa ndiphe? Ọ bu iphe, du huswa huswa huswa to; mbu ejo akpamara-a, onu-ulo Jiuda no l'eka-a eme-a? Mbu o o epho iphe-kpanganga be ephe meru; o ji ali-a ebushihu ebushihu; shi nno akpatsue mu pho ehu-eghu. Lekpodapho g'ephe ejikwoshi oshi atsọ onwophe l'imi; sọ l'ọo mbedua be ephe eme iphe-iphere! ¹⁸Ọo ya bu le-a; mu e-gude ehu-eghu mee phe iphe. Mu ta abyadu ele phe enya ke phuru phe obu-imemini; ophu mu abyadu edobe phe ndu. Ẹphe e-chi-chakpo mkpu l'o tsua mu etsutsu le nchi; ole mu ta abyadu angaru phe nchi.”

Egbushi ndu agwo nshi

9 ¹Tobudu iya bu; mu numa eka oochi mkpu ara iya arara asuje: “Unu kpitaru ntse; unube ndu echeje mkpukpu nche. G'onyenonu gudecha ngwo iya l'eka!” ²Noo ya; mu bya ahuma unwoke ishii g'ephe shi l'onu-oguzo, no l'uzo isheli eje abya. Onyenonu pagbaru ngwo iya l'eka. O nwekwarupho nwoke lanu ye ephe swi. O yeru uwe eka wacha; turu mkpara-ekwo le mgbureku. Ephe wuba je apfuru l'aguga orungeja ono, e gude onyirubvu mee ono.

³Noo ya; odu-biribiri Chileke ke Izurelu gbeshi l'eli chierobu ono, bu eka o shi nodu ono je anodu l'onu-abata eze-ulo Chileke ono. Noo ya; Chipfu bya ekua nwoke ono, yeru uwe eka wacha; bya eturu mkpara-ekwo le mgbureku ono; ⁴sọ iya: “Je etsoru mkpukpu Jierusalemu l'ophu jegbabe. Ndu agu aphu bya ara eka k'ebi ono, emegbabe l'ime mkpukpu ono be ii-me iphe-ohubama l'egedegee onu-iphu.”

⁵No iya; mu bya angabe nchi numa eka o sọ ndu ophu: “Unu tsoru iya; je etsoru mkpukpu ono gbushia ndu unu humaru. Unu ta aphukwaru phe obu-imemini; ophu unu edobekwa phe ndu. ⁶Unu gbushia unwoke, buwaa ogerenya; me ndu bu okoroby; me unwumboko; me unwany; mekpoo unwegirima. Ole oo go to dukwa ndu ophu e meru iphe-ohubama ono, unu e-byi eka. Eka unu a-wata iya bu l'ulo ono duru mu nsọ ono.” Ọo ya bu; ephe shi le ndu bu ogerenya, no l'atatiphu eze-ulo Chileke ono; wata phe egbushi.

⁷Ọ sukwa phe pho: “Unu merwushia eze-ulo ono emerwushi; unu egbushia nemadzu go toko oma iya sweta. Ngwa unu tugbua jeshia!” Ọo ya bu; ephe tugbua je etsoru mkpukpu ono gbushiahaa nemadzu.

⁸Teke ono, ephe egbushi nemadzu ono be mu no nkinyi mu; mu daa kpube iphu l'ali; chishia mkpu sọ: “Oowaa! Nnajiuphu, bu Chipfu! ?Iime gi gude oke ehu-eghu ngu-a, i tukoshi Jierusalemu-a gbushigbua ndu Izurelu ophu phoduru nu to?”

⁹Ọ sù mu: “Ejo-iphe, ndu Ízurelu; waa ọphu ndu Jiuda eme bẹ kwatakwaru paa ẹka apaa. Alì ono bụ iphe, jiru iya nù bụ egbu-ọchi. Mbù lẹ mkpụkpu ono bẹ bụ eme ejo-iphe, jiru iya ejiji. Ẹphe nọdu anọduje epfu sù: ‘Chipfu gwọbeakwaru alì-a. Chipfu taa hụmajekwa iphe, anyi eme.’
¹⁰Ọo ya bụ lẹ mu ta abyadù ele phẹ ẹnya kẹ p̄h̄uaru phẹ obu-imemini; ọphu mu abyadù edobe phẹ ndzù. Iphe ono, ẹphe mekọtaru ono bẹ mu e-vukọta kpube phẹ l'ishi.”

¹¹A bya ele ẹnya; nwoke ono, yeru uwe ẹkwa ọchaa; bya eturu mkpara-ẹkwo lẹ mgburẹku ono lwaphuta azù; bya asù iya: “Mu meakwaru iphe, ì sùru gẹ mu mee.”

Ọdu-biribiri Chileke lufuru l'eze-ulo Chileke

10 ¹Tọbudu iya bụ; mu bya elee ẹnya; mu hụma iphe, dù g'aba-eze, e gude mkpuma sáfàyà mee g'ọ nọ l'akpaminigwe, nọ nọghata ishi chierobu ono. ²Noo ya; Chipfu p̄fuaru nwoke ono, yeru uwe ẹkwa ọchaa ono sù iya: “Bahù lẹ mgbaka ọkpa ọgba-kperekpere, nọkota lẹ mkpula chierobu ono. Ye ẹka l'ime chierobu ono vọta icheku-ọku; vọ-jia ọbochi-ẹka ngu. L'ì je eworu iya ghaa lẹ mkpụkpu ono.”

Mu nọdu ele iya ẹnya; ọ bahù. ³Chierobu ono p̄f̄uchaaru l'uzo ndọhali eze-ulo Chileke ono lẹ teke nwoke ono bahuru; urwukpu bya ejichaa imime ọma eze-ulo ono ejiji. ⁴Tọbudu iya bụ; ọdu-biribiri Chipfu shi l'eli chierobu ono gbeshi je anọdu l'ọnu-abata eze-ulo Chileke ono. Urwukpu bya eji eze-ulo Chileke ono ejiji. Ogbu-nw̄inwii, shi l'ọdu-biribiri Chipfu ono bya eji ọma-ulo Chileke ono ejiji. ⁵Igiji ñkù chierobu ono bẹ a gbẹchaa l'azù ọma-unuphu anù g'ọodaepho g'ọ bụ olu Chileke, bụ Ọkali-be-kangokotaru-nù teke oopfu opfu.

⁶Teke Chipfu sùru nwoke ono, yeru uwe ẹkwa ọchaa ono g'ọ gùta ọku lẹ mgbaka ọkpa ọgba-kperekpere ono; mbù l'echilabọ chierobu ono; bẹ nwoke ono bahuru je ap̄furu l'aguga ọkpa ọgba-kperekpere lanù. ⁷No iya; chierobu lanù l'ime chierobu ẹno ono; machià ẹka gùta ọku, nọ l'echilabọ ẹka ono, ẹphe nọ ono. Ọ gùta ọku ono ye nwoke ono, yeru uwe ẹkwa ọchaa ono l'ẹka. Nwoke ono gude iya tũgbua.

⁸Lẹ mkpula ñkù chierobu ono bẹ iphe, dù g'ẹka nemadzù nọgbaa. ⁹Mu bya elee ẹnya hụma Ọkpa Ọgba-kperekpere ẹno, nọkota l'aguga chierobu ono. Ọkpa Ọgba-kperekpere ono dũchaa nanù nanù nọ-kubegbaa chierobu ono. Ọkpa Ọgba-kperekpere ono nọdu aphukotaepho ngerengere gẹ kirisòlàyitù. ¹⁰Ọkpa ọgba-kperekpere ono ẹphen'ẹno bẹ gbakọtaepho nanù. Ọ dũkọtaepho g'ọ bụ ọkpa ọgba-kperekpere ọzo; bẹ e pyoru l'ime iya. ¹¹Ẹphe -nọdu atũgbu; ẹphe atũko shia ọzo lanù l'ime ọzo ẹno ono, chierobu ono ghagbaaru iphu ono. Ọphu ọkpa ọgba-kperekpere ono aswì-jijedu aswì-ji mẹ chierobu ono nọdu eje. Ọ b̄uru ibiya ọphu chierobu ono gharu iphu; bẹ ọokwasejeru. Ẹphe -nọdu eje; bẹ ẹphe ta aswì-jijedu aswì-ji

m'ephe -phobewaa tugbaa. ¹²Ehu phe l'ophu; mekpoo okpurukpu phe; me eka phe; me nkù phe be bu enya jikotaru iya ejiji. O buru g'okpa ogba-kperekpere phe ono ephe no eno ono dukotakwapho bu ono. ¹³Mu numa geekugbaa okpa ogba-kperekpere ono "Galugalu."

¹⁴Chierobu ono nwekotaru iphu eno eno l'ehu l'ehu. Iphu lanu bu iphu chierobu; iphu k'ebò bu iphu nemadzu; iphu k'eto buru iphu oduma; iphu k'eno buru iphu ugo. ¹⁵No iya; chierobu ono bya angulihu imeli ime-li. O buru phe be bu iphe ono, nogbaa ndzu ono, mu humajeru l'aguga enyimu Keba ono. ¹⁶O nodu abujeru teke chierobu ono tugburu; okpa ogba-kperekpere ono, nogbaa phe l'aguga ono etsoru phe. Teke chierobu ono sashiru nkù g'ephe phelihu l'ali; be okpa ogba-kperekpere ono, nogbaa phe l'aguga ono anodujeepho g'ephe no; ephe ta alufudu l'eka ephe nogbacha. ¹⁷Teke chierobu ono no-kirishiru; ogba-kperekpere ono ano-kirishikwapho. Teke chierobu ono phelihuru; ephe angu-lihukwapho tsoru phe; kele unme iphe ono, nogbaa ndzu ono be nokota l'ime phe.

¹⁸Tobudu iya bu; odu-biribiri Chipfu ono lufu l'onu-ulo eze-ulo Chileke ono; je anodu l'eli chierobu ono. ¹⁹Mu nodu elekpoepho enya; chierobu ono sashia nkù phe; shi l'ali phelihukota. Ephe nodu ephe; okpa ogba-kperekpere ono nodu etso phe. Ephe pheru je anodu l'onu-abata oguzo ophu no l'uzo enyanwu-awawa leze-ulo Chileke. Odu-biribiri Chileke ke Izurelu nodu phe l'eli. ²⁰Oo phe be bu iphe ono, nogbaa ndzu ono, mu humaru le mkpula Chileke ke Izurelu l'aguga enyimu Keba pho. Oo ya bu; mu bya amaru l'oo chierobu be ephe bu.

²¹Ephe nwekotaru iphu eno eno; me nkù eno eno l'ehu l'ehu. Le mkpula nkù phe ono be iphe, dugbaa g'eka nemadzu nokota. ²²Iphu phe dukotae-pho g'iphu ndu ophu mu humajeru l'aguga enyimu Keba pho. Ophu nonu anodujeepho eje ala l'iphu nhamunha.

Ee-gbushi ndu Jierusalemu

11 ¹Tobudu iya bu; Unme Chileke bya apalia mu; paru jeshia l'onu-oguzo ophu no l'uzo enyanwu-awawa l'ulo Chipfu. L'onu eka eeshije abahu l'onu-oguzo ono be unwoke ukporo l'ise no. L'ime phe be mu humaru Jiazanaya nwa Azuru; me Pelataya, bu nwa Benaya, bu phe bu ndu-ishi ndu ono.

²Chipfu bya asu mu: "Nwa ndiphe; oo ndu-a be anoduje achi ejo idzu; buru phe anoduje le mgbazi g'e mee ejo-iphe le mkpukpu-a. ³Ephe nodu asuje: '?Toko orwudu teke aa-kpushi ulo too? Mkpukpu-a bu ite, eeshi iphe be o bu; anyibedua buru anu, eeshije l'ite ono.' ⁴Oo ya bu; pfua ejo-iphe e-me phe nu; nwa ndiphe; pfua iphe, mu suru l'oo-me phe."

⁵Tobudu iya bu; Unme Chipfu bya mu l'ehu; bya asu mu ge mu su: "Wakwa iphe, Chipfu epfu baa: Oo iphe ono be unu epfu; unube ndu Izurelu; ole mu makotaru iphemiphe, unu arì l'oriri. ⁶Unu gbushiwaru

ikpoto nemadzu le mkpukpu-a; iphe, jiru gbororo buru odzu ndu unu gbushiru egbushi.

7“Oo ya bu le-a; wakwa iphe, Nnajiuphu, bu Chipfu epfu baa: Ndu ono, unu gbushiru kube l'ime mkpukpu ono be bu anu ono; mkpukpu-a buru ite-oku ono; ole mu a-chita unubedua chifu le mkpukpu-a. 8Nduz oguechi be agu unu; ole oo oguechi ono be mu e-gude bapfuta unu. Noo iphe, Chipfu epfu bu ono. 9Mu a-chifuta unu l'ime mkpukpu ono; nwuru unu ye l'eka ndu ohozo; mbu nua unu aphu. 10Oo oguechi be ee-gude gbushia unu. O buru l'oke ali ndu Izurelu be mu a-nu unu aphu ono. Oo ya bu; g'unu amakwanuru l'oo mbedua bu Chipfu. 11Mbu le mkpukpu-a ta abyadu aburu unu ite, eeshi iphe; ophu unu abyadu aburu anu nodu l'ime iya. Mu a-nodu l'oke ali ndu Izurelu nua unu aphu. 12Oo ya bu; g'unu amakwanuru l'oo mbedua bu Chipfu; kele unu te etsoduru iphe, mu toru okpa iya su g'e tsoje; ophu unu te emeduru ekemu mu. Iphe, unu gbe mechia bu l'unu byaru emeahaa g'ohamoha ono, bupheru unu mgburu-gburu emeje.”

13No iya; mu nodukwadu epfu iphe ono; Pelataya nwa Benaya nwuhu. Mu bya adaa kpupyabe iphu l'ali; chia oke mkpu su: “Oowaa; Nnajiuphu, bu Chipfu! ?Iime gi gbushikota ndu Izurelu ophu phoduru nu to?”

E kwe ukwe k'alwalwa ndu alwataru alwata.

14Chipfu byakwa epfuaru mu ozo su: 15“Nwa ndiphe; ndu bu le Jierusalemu l'epfukwa opfu ehun du Izurelu; mbu unwune ngu ono a kpuru unu l'ephe le ndzu ono asuje: 'Ndu ono, a kpuru le ndzu ono be nonukaa-kwaru Chipfu uzanya. Ali-a l'ophu buwaru nke anyi.’

16“Oo ya bu; su phe: ‘Wakwa iphe, Nnajiuphu, bu Chipfu epfu baa: O bu eviya l'oo mbedua rwutacharu phe je edobe uzanya uzanya; l'ali ndu ohozo; mbu woru phe ghakaa le mkpukpu le mkpukpu ono; ole g'o duhabe be mu bulekwaru phe-a akpo gbobutaru mee; le mkpukpu le mkpukpu eka ono epe lagbaar ono.’ 17Oo ya bu; su phe: ‘Wakwa iphe, Nnajiuphu, bu Chipfu epfu baa: Mu e-shi l'ohamoha ono rwutakota unu; bya achikobe; mbu shi le mkpukpu le mkpukpu ono, a chikashiru unu; unu lagbaa ono chita unu chiphutaazu. Mu abya eworu ali Izurelu nu-phu unu azu.’

18“Epe a-lwaphuta azu l'ali ono; bya atuko iphe, aakpofu lenwa, no iya nu; me ebyi, eemegbabe l'ime iya wofukota. 19Mu e-me g'obu buru phe nanu; mu e-woru unme ophuu ye phe l'ehu; mu ewofu okpoma mkpolanu, epe nweru; woru okpoma, du belebele nu phe; 20k'ophu epe a-noduje etso iphe, mu toru okpa iya; bya anwube enya meahaa ekemu mu. Epe aburu ndibe mu; mu aburu Chileke phe. 21Obenu le ndu ophu kporu obu ye l'iphe, aakpofu lenwa ono; me l'ebyi, epe emegbabe; be mu e-woru iphe, epe eme kpukposhi l'ishi. Nokwa iphe, Nnajiuphu, bu Chipfu epfu bu ono.”

Alufu Odu-biribiri Chipfu le Jierusalemu

²²Tobudu iya bu; chierobu ono, okpa ogba-kperekpere nogbaa l'aguga ono woru nkù phe sashia; odu-biribiri Chileke ke Izurelu nodu phe l'eli. ²³Odu-biribiri Chipfu ono bya eshi l'ime mkpukpu ono gbalihu je edegebe l'eli úbvú, no l'uzo enyanwu-awawa mkpukpu ono. ²⁴Mu nodu aphu ophuleny, Unme Chileke goshiru mu; Unme ono palia mu je edobe l'eka ndu ono, a kpuru le ndzu ono no le Babilonu. Oo ya bu; mu phu-buhu ophuleny ono, mu shi aphu ono. ²⁵Tobudu iya bu; mu tuko iphe ono, Chipfu goshikotaru mu ono pfuaru ndu ono, a kpuru le ndzu ono.

Onye mpfuchiru Chileke, no onodu onye a kpuru le ndzu

12 ¹Tobudu iya bu; Chipfu bya epfuaru mu su: ²"Nwa ndiphe; o kwa l'echilabo ndu ekwefujeru mu ike be i bu. Ephe nwekwaru enya; ophu ephe aphudu iya uzo; ephe nweru nchi; ophu ephe ta anudu iya iphe; kele ephe ekwefuje ike.

³"Oo ya bu; nwa ndiphe; gwekobe iphe ngu g'onye a kpuru le ndzu ala ohozo. G'o bukwaru l'eswe teke ephe ele ngu enya; be ii-gweta gwefu l'eka i no; tugbua lasha eka ozo. ?A maru; ?iphe ono erwu-a phe l'ehu; e-gudekpooro l'ephe bu ndu kwefuru ike. ⁴Teke o beru l'eswe teke ephe ele ngu enya; gwetakota iphe ngu gwefu; g'onye a kpuru le ndzu ala ohozo. Teke o beru l'uzenyashi; kwalia teke ephe ele ngu enya; tugbua g'onye a kpuru le ndzu ala ohozo. ⁵Bvufua uzo l'igbulu mkpukpu le teke ephe ele ngu enya; shi l'eka ono vufu iphe ngu ono. ⁶Dee iphe ono l'ukuvu l'eka ephe ele ngu enya; vuta iya vufu le nchi ejihu. Li woru iphe kechia l'iphu g'i ti huma ali enya; kele mu mewaru ngu g'i buru iphe-ohubama duru ndu Izurelu."

⁷Oo ya bu; mu bya emee egube ono, a suru mu ge mu mee ono. O be l'eswe; mu bya egwefutakota iphe ono, mu gwekorú gude alufu g'onye a kpuru le ndzu ala ohozo ono. O bya erwua l'uzenyashi mu gude eka bvufu-a uzo l'igbulu ono. Mu gweta ivu mu le nchi ejihu gbeshi; ephe nodu ele mu enya; mu paru iya nmakobe l'ukuvu; o buru mu atugbu.

⁸Tobudu iya bu; o be l'utsu; Chipfu bya epfuru yeru mu su: ⁹Nwa ndiphe; ?o kwa le ndu Izurelu, bu ndu kwefuru ike ono ta ajiduru ngu su: ?Bu gunu be iime nno? ¹⁰Su phe le-a: Wakwa iphe, Nnajiuphu, bu Chipfu epfu baa: Ozi-a, dukwaru onye bu ishi le Jierusalemu; bya aduru onu-ulo ndu Izurelu l'ophu. ¹¹Su phe: Mbèdua bu unu iphe-nggoshi; mbu l'oo egube ono, mu mekotaru ono bu g'ee-mekota unu. Ephe a-wufu buru ndu a kpuru le ndzu lasha ohozo. ¹²Onye ophu bu onye-ishi l'echilabo phe be e-gweta iphe iya nmakoru l'ukuvu le nchi ejihu tugbua. Ee-bvufuru iya uzo l'igbulu g'o shia lufu. Oo-kwechi iphe l'iphu; g'o to gude enya iya huma ali ono. ¹³Mu e-woru ugbu mu geberu iya; g'o nmalahuru mu l'onyà;

mu eduru iya jeshia Bábilonu, bu alí ndu Kaludiya. O búru l'eka ono be ọo-ọodu nwùhu; ọle o to byakwanu egude enya iya huma alí ono. ¹⁴Ndu ono, eswipheje iya nu ono be mu a-chikashichaa nanu nanu; mbu ndu ejejeru iya ozi; me ndu ojoju iya g'ephe ha. Mu a-mita ogu-echi gude chipyabe phe.

¹⁵“Teke mu chikashieru phe pho; ephe tuko iphe, bu ohamoha dzuru; mbu mee ephe dzuru mkpukpu, nonu be ephe a-maru-a l'oo mbedua bu Chipfu. ¹⁶Ọle nwa ndu ophu habe nwahabe be mu e-me-a g'e te gude ogu-echi gbua; waa g'egu-ememe; me mgbu-onwu te egbu phe. Oo ya bu g'ephe anodu l'ohamoha ono, ephe jekporu; koshikota ebyi, ephebe ndu Izurelu shi emegbabe. Noo teke ephe a-maru l'oo mbedua bu Chipfu.”

Onye mpfuchiru Chileke, ehu aphu kpaakpaakpaa

¹⁷Tobudu iya bu; Chipfu bya epfuaru mu su: ¹⁸“Nwa ndiphe; gude ehu-anmanma ria nri ngu; li gude ehu-kpaakpaakpaa ndzu-agugu ngua mini. ¹⁹Su ndu ali-a: ‘Wakwa iphe, Nnajiuphu, bu Chipfu epfu le ke ndu bu le Jierusalemu; me ndu ali Izurelu baa: Ephe e-gude ndzu-agugu eri nri; teke ephe angu mini meji tofu phe tofu; kele ali phe be aa-tuko iphemiphe, no iya nu natachaa; kele ndu bu iya nu tsobewaru wenuka iwashi. ²⁰Mkpukpu, e bu ebubu l'ali ono a-bukotaru aka dabyiru iphoro; mbu l'ali ono be a-bukotaru ochobu. Oo ya bu g'unu amakwanuru l'oo mbedua bu Chipfu.’”

²¹Tobudu iya bu; Chipfu byakwa epfuru yeru mu su: ²²“Nwa ndiphe; ?buna gunu be etu ono, unube ndu Izurelu anmaje ono bu; mbu ono, unu asuje: ‘Mboku -nodu anwushi be ophulanya, a phuru aphuphu abujeru iphe-mmanu.’ ²³Su phe: ‘Wakwa iphe, Nnajiuphu, bu Chipfu epfu baa: Mu e-me getu ono ta aduhe; mbu l'aa-nmabuhu etu ono l'ali Izurelu.’ Su phe: ‘Mboku agbarwutakwaa teke ophulanya, a phukotaru e-meebekota g'a phuru iya. ²⁴Noo kele aa-phu-buhu ophulanya eregede l'ali Izurelu; l'agbabuhu iya aja, enwedu ishi. ²⁵Mbedua bu Chipfu e-pfukwa opfu; iphe, mu pfuru emee ge mu pfuru iya; o to nodu odu ememe. Mbu l'oo l'ogbo unube ndu ekwefujeru mu ike-a be mu e-mekota iphe, mu pfuru. Nokwa iphe, Nnajiuphu, bu Chipfu epfu.’”

²⁶Tobudu iya bu; Chipfu byakwa epfuaru mu su: ²⁷Nwa ndiphe; lewaro le ndu Izurelu epfu l'ophulanya ono, i phukotaru ono be bu iphe, e-me teke dukwadro enya; mbu l'iphe, iipfukota be bu iphe, a-no odu teme l'ovua. ²⁸“Oo ya bu su phe le-a: Wakwa iphe, Nnajiuphu, bu Chipfu epfu baa: O to dukwa opfu mu ono me nanu, akpo upfu ememe. Iphe, mu pfuru be e-mekota ge mu pfuru iya. Nokwa iphe, Nnajiuphu, bu Chileke epfu bu ono.”

Ikpe, a nmaru ndu mpfuchiru, epfu iphe, Chileke epfuduru

13 ¹Tobudu iya bu; Chipfu bya epfuru opfu yeru mu su: ²“Nwa ndiphe; pfuaru mu ndu mpfuchiru ke Izurelu g'oo-duru phe; mbu

ndu k'ono epfuchiru Chileke nta-a ono. Pfu a g'oo-du ndu ono bu iphe, gbatataru phe l'uche be epe epfukpofuje su l'oo Chileke be epe epfuchiru ono. Su phe le-a: 'Unu numakwa iphe, Chipfu epfu! ³Wakwa iphe, Nnajiuphu, bu Chipfu epfu baa: Nshio unube ndu eswe ono, bu ndu mpfuchiru; mbu ndu ono, anoduje etso iphe, obu phe pfuru phe; l'ebe abu l'o duru iphe, epe humaru ono. ⁴Unube Izurelu; ndu mpfuchiru unu dupepho ge nkuta-oswa, no l'ochobu. ⁵Unu ta agbajeduru okpa l'eka igbulu Izurelu gbashiru oru; ophu o buro ke kpukwaa ya akpukwa; g'o pfushia ike; kwaberu eswe ke Chipfu ono. ⁶Ophulanya epe aphuje bukota ophulanya iphoro. Iphe, epe asuje l'oo-me abukotajeru uka be epe dzushiru. Epe asuje: Wakwa iphe, Chipfu epfu baa'; l'ebe abu l'oo Chipfu be ziru phe nu; teme epe gb epe anoduje ele enya g'iphe, epe pfukotaru vu. ⁷?Tobudu uka be unu adzube l'ophulanya, unu aphu; bya epfuje iphe, abudu eviya le teke unu suru: Wakwa iphe, Chipfu epfu baa; l'ebe abu l'oo mbedua be pfuru iya nu?"

⁸Oo ya bu le-a; wakwa iphe, Nnajiuphu, bu Chipfu epfu baa: "Eshi ophu unu adzushi uka bya aphu ophulanya eregede be mu noakwaru unu le njo." Nokwa iphe, Nnajiuphu, bu Chipfu epfu bu ono. ⁹Ndu ono, aphuje ophulanya, bu uka ono; waa ndu ono, epfuje iphe, abudu ire-lanu ono be mu a-da eka l'ehu ke njo. Epe ta abyadu anodubaa l'eka ndibe mu no; ophu a byadu edebaa epha phe l'ekwo, e deshiru epha ndu onu-ulo Izurelu; ophu epe abyadu abahubaa l'ali ndu Izurelu ozobaa. Oo ya bu; g'unu amakwanuru l'oo mbedua, bu Nnajiuphu, be bu Chipfu.

¹⁰"Epe dusweru ndibe mu uzo; epe asuje le nchi du doo l'ebe abu le nchi du doo. Obujeru a -nodu akpu igbulu, eshihuduru ike; epehedua egude penti-ochaa eete iya. ¹¹Oo ya bu; pfuaru ndu ono, teru iya penti-ochaa ono; l'oo-zekposhihukwa. Oke mini e-dzekwa; akamini-mkpuma adaa; teme oke pherephere ezia ¹²Teke igbulu ono zekposhihuerupho; ?ndiphe ta ajidu unu su: '?Denuhunu penti-ochaa ono, unu teru iya ono?"

¹³"Oo ya bu; wakwa iphe, Nnajiuphu, bu Chipfu epfu baa: Mu e-gude oke ehueghu mu mee g'oke pherephere zia; mu egudekwapho ehueghu mu mee g'akamini-mkpuma daa; mebyishia ya; mee ya g'oke mini dzee; mee ya omeliwe. ¹⁴Mu e-nwutsushikota igbulu ono, unu teru penti-ochaa ono; mbu rwazekota iya jas u l'ali; k'ophu bu l'aa-humachaa eka a turu okpa iya. O -dakposhihuepho ono be unu a-bukotaru mkpurupyata l'ime iya. Oo ya bu; g'unu amakwanuru l'oo mbedua bu Chipfu.

¹⁵"Noo ge mu e-shi tukoshi igbulu ono oke ehueghu mu bu ono; tukoshi iya ndu ono, teru iya penti-ochaa ono. Oo ya bu; mu akakwanuru unu l'igbulu obu; me ndu rwaru iya arwarwa be nkephe buakwaru; ¹⁶mbu ndu mpfuchiru Izurelu ono, shi anoduje aphuru Jierusalemu ophulanya; mbu ndu ono, shi anoduje epfuru phe le nchi du doo l'ebe abu le nchi du doo. Nokwa iphe, Nnajiuphu, bu Chipfu epfu."

Iphe, e-me unwanyi, egudeje obvu eduphushi ndu Ízurelu

17“Oo ya bu; nwa ndiphe; gharu unwanyi ndibe unu iphu le ke njo; mbu ndu ono, bu iphe, epe ritaru l'obu phe be epe epfukpofuje ono. Pfu mpfuchiru ke njo l'opfu ehu phe; 18 su phe le-a: Wakwa iphe, Nnajiuphu, bu Chipfu epfu baa: Nshio unwanyi ono, adzutajegbaa obvu gbakachaa le nkwo-eka ono; teme epe nodu emeshi ekwa-ishi l'asu iya l'asu iya ge ndu ozo keje l'ishi. Ekwa-ishi ono buru iphe, epe egudeje achi nta ndzu ndu ozo. ?Bu ndzu ndibe mu be unu a-nodu achi nta iya; teme unu eche ndzu nkunu g'o duru unu too? 19 Unu gudewaa ese iswi nwa-ochileka bali; waa iswi iphiriba buredi; meswee mu; ophu unu akwabedu mu ubvu. Unu shi nno mee ndu tege anwuhudu nu; epe nwushihu; mee ndu ophu gbaru g'ephe nwushihu; epe nodu-chia ndzu. O buru iphe, kparu iya nu bu l'unu dzushiru ndibe mu uka; kele epe angabeje nchi me a -nodu adzuru phe uka.”

20 “Oo ya bu; ‘wakwa iphe, Nnajiuphu, bu Chipfu epfu baa: O buwaa ke mu l'obvu unu ono, unu gude anmakọ nemadzu g'ephe bu unwenu ono. Mu a-gbabushichaa obvu ono unu gbaa l'eka ono. Ndu ono, unu achi nta phe ono be mu e-mee g'ephe nweru onwophe; mbu ndu ono unu nma-kooru l'onyà g'unwenu ono. 21 Mu a-lashichaa ekwa-ishi unu ono; nafuta ndibe mu l'eka unu. Epe taa dalahubaedu unu l'eka ozo. Noo teke unu a-maru l'oo mbedua bu Chipfu.

22 “ ‘Eshi ophu unu gudewaa adzu uka mee g'aphu tsoru ndu pfuberekoto; l'ebe abu le mu meru g'aphu tsoru phe; unu gbetchia eyeru ndu iwashi okpu-ikike; mbu mee g'ephe te eshi l'ejo-iphe, epe eme lufuta; shi nno dzoo onwophe ndzu; 23 be unu ta abyakwa aphubaa ophulunya, abudu ire-lanu ono; ophuu unu abyadu epfubaa l'oo ophuu iphe, e-me nu bu ophuu. Mu a-nafuta ndibe mu l'eka unu. Oo ya bu g'unu amakwanuru l'oo mbedua be bu Chipfu.’ ”

Aanma ndu agwo obvu ikpe

14 1 Tobudu iya bu; ndu bu ogerenya ndu Ízurelu haru byapfuta mu; bya anoduchaa anoo l'ataphu mu. 2 Chipfu bya epfuru opfu yeru mu su; 3 “Nwa ndiphe; ndu-a be kporu obu ye l'agwo obvu. Epe woru ejo-iphe, epe e-vukota daa dobe onwophe l'ataphu. ?Denu ge mu e-shi haa phe g'ephe jitajekwadu mu iphe?

4 “Oo ya bu; pfuaru phe; su phe le-a: ‘Wakwa iphe, Nnajiuphu, bu Chipfu epfu baa: Teke o nweru onye Ízurelu, kporu obu ye l'agwo obvu; teme o woru ejo-iphe, bu iphe, oo-vukota daa doberu onwiya l'iphu; teme onye ono gbeteke ono jepfu onye mpfuchiru Chileke g'o jita iya iphe; be bu mbedua, bu Chipfu gedegede be a-karu onye ono egube oo-duru iya le k'ikpoto obvu ono, ogwo ono. 5 Noo ge mu e-me iya bu ono; shi nno

lọ-phuta ọkpoma ndu Ízurelu azu; mbu ndu ono, gudewaa agwo ọbvụ lufu mu l'ehu ono.'

6“Oo ya bu; pfiaru ndu Ízurelu su phe le-a: ‘Wakwa iphe, Nnajiuphu epfu baa: Ọphu g'izimanu lwa unu azu g'unu haa agwo ọbvụ ono, unu agwo phe ono; mbu g'unu haa iphe, bu ebyi ono, unu emegbaa ono.

7“ Teke o nwekpọru onye Ízurelu; ọzoo onye byaru abyabya le Ízurelu, bufuru onwiya l'eka mube Chipfu no; je akpọru obu ye lagwa iphe; teme o woru ejo-iphe, bu iphe, oo-vukota daa doberu onwiya l'atatiphu; be onye ono -gbẹ teke ono jepfu onye mpfuchiru Chileke g'o jita iya iphe; be bu mbedua, bu Chipfu gededede a-karu onye obu g'oo-duru iya. 8 Mu a-ghaerupho onye obu iphu le ke njo; mee ya iphe, ee-gude alo ndu ozo eka le nchi; mbu mee ya g'o buru onye ee-gude anma l'etu. Mu e-bufu iya l'echilabo ndibe mu. Oo ya bu g'unu amakwanuru l'oo mbedua be bu Chipfu.

9“ Teke o bu l'onye mpfuchiru Chileke be e dusweru uto; o pfua iphe abudu iya nu; be bukwa mube Chipfu meru g'onye mpfuchiru ono pfua ya; k'ophu mu a-machi eka; daa ya eka ke njo l'ehu; woru iya gbua; g'o to noduhe l'echilabo ndibe mu, bu ndu Ízurelu. 10 Ejo-iphe, epe meru ono be a-tukoru phe l'ishi. Oo iphe, e meru onye mpfuchiru Chileke ono be ee-me onye jeru iya ajita iphe kwapho. 11 Oo ya bu ge ndu Ízurelu ahaa agbafu l'eka mu; teme epe ahakwaapho egude ejo-ememe, epe eme emerwushi onwophe. Epe a-buru ndibe mu; mu aburu Chileke phe. Nokwa iphe, Nnajiuphu, bu Chipfu epfu bu ono.’”

Nuwa waa Danelu waa Jiobu

12 Tobudu iya bu; Chipfu bya epfuru opfu yeru mu su: 13 “Nwa ndiphe; o -buru le mkpukpu mesweru mu; ophu mu egudeedu ire phe eka; mu -machi eka ge mu daa phe eka ke njo l'ehu; be mu e-me g'o to duhe eka epe e-shije huma nri; egu emeahaa phe; teme mu abya egbushikota nemadzu me iphe-edobe phe. 14 O betakpoo nu umadzu eto-a nodu iya, bu iya bu Nuwa waa Danelu waa Jiobu be bukwa epebedua kpoloko be a-dzoo ndzu; kele epe pfuberekoto. Nokwa iphe, Nnajiuphu, bu Chipfu epfu.

15 “O -buru l'oo ejo anu-egbudu be mu yeru g'o je esweta mkpukpu ono; anu-egbudu ono tagbushikota ndu bu iya nu; mee ya; o buru ochobu; mbu k'ophu bu l'o to dudu onye adu ike aghata eka ono aghata; kele anu-egbudu ono tukoru eka ono sweta; 16 be eshi ophu mube Nnajiuphu, bu Chipfu no ndzu ge mu no iya-a; be umadzu eto-a -nodukponu l'ime iya be epe taa dukpokwanu ike adzo nwa nwoke; ọzoo nwa nwanji l'al'i ono. Oo epho epebedua be a-dzota kpoloko; ali ono a-dabyiru buru ochobu.

17 “Ozoo l'oo ogu-echi be mu gude bapfuta mkpukpu ono; su g'ogu-echi ono tuko mkpukpu ono jegbabe; gbushia nemadzu me iphe-edobe, no iya nu; 18 be mube Nnajiuphu, bu Chipfu pfuru su-a: Eshi ophu mu no ndzu ge mu no iya-a

bẹ ụmadzu ẹto ono -nọdukpoo ya nụ; bẹ ẹphe taa dọkpokwanu ike adzọ nwa nwoke; ọzoo nwa nwanyi. Ọo ẹpho ẹphebedua bẹ a-dzọta kpoloko.

¹⁹“Ọzoo lẹ mu meru ẹjo iphe-ememe bya l'alị ono; mbụ mu -gude oke ẹhu-eghu mu gwaa pẹ ọchi; mbụ gbushia nemadzu; mẹ iphe-edobe; ²⁰bẹ mụbe Nnajiuphu, bụ Chipfu epfu sụ-a: Eshi ọphu mu nọ ndzụ gẹ mu nọ iya-a; bẹ ọme l'ọo gẹ Nuwa waa Danẹlu waa Jiobu -nọdukpoo ya nụ; bẹ ẹphe taa dọkwa ike adzọta nwa nwoke; ọzoo nwa nwanyi l'alị ono. Ọo ẹpho onwophe bẹ ẹphe a-dụ ike dzọo; kele ẹphe pfulerekoto.

²¹“Lẹ-a; wakwa iphe, Nnajiuphu, bụ Chipfu epfu baa: Ọo-kabakwaro Jierúsalemụ njo; teke ono, mu e-gude uzi iphe ẹno, eye ebvu, gude byapfuta pẹ bya anụa pẹ aphụ ono. Uzi iphe ẹno ono bụ: Ogu-echi; waa ẹgu-ememe; mẹ ẹjo anụ-ẹgbudu; mẹ ẹjo iphe-ememe. Iphe ono bẹ mu e-gude bya egbushia nemadzu; mẹ iphe-edobe, nọ l'alị ono. ²²Ọle g'ọ dụhabe bẹ o nwekwaru-a ndu ọphu a-waa nụ. Ndu a-waa nụ ono bẹ bụ unwegirima unwoke mẹ unwegirima unwanyi, bụ ndu e-shi l'ẹka ono lufuta byapfuta unu. Teke unu hụmaru umere pẹ; waa g'ẹphe gude eme bẹ obu e-jizeta unu lẹ k'ẹjo iphe-ẹhuka ono, dapfutaru Jierúsalemụ ono; mbụ k'iphe, bụkpoo ẹjo iphe-ẹhuka, mu meru; ọ dapfuta iya ono. ²³Obu e-jizeta unu teke unu hụmaru umere pẹ; waa g'ẹphe eme; kele unu a-bya amaru l'o to nwedu iphe, mu mekọtaru l'ẹka ono, te enwechadaa iphe, kpataru iya nụ. Nokwa iphe, Nnajiuphu, bụ Chipfu epfu bụ ono.”

A turu Jierúsalemụ yeru vayinu, ọku keru

15 ¹Tọbudu iya bụ; Chipfu bya epfuru opfu yeru mu sụ: ²“Nwa ndiphe; ?Bụ gụnu bụ iphe, vayinu gude ka oshi ọzo, nọ l'oswa ree? ³?O nwekpọoru iphe, barụ urwu, eegudeje oshi iya eme tọo? Mbụ-a; ?e gudejekponu oshi iya apyita nggu, eekobeje iphe? ⁴Ọ bụchia l'ọku bẹ eewojeru iya chie; ọku ekee ya ishi labo; bya ekebashia echilabo iya ekebashia. ?Bụ gụnu bẹ ọ dụ k'ememe teke ono? ⁵Teke ọ bụ l'ọ tọ dudu iphe, ọoga mkpa iya teke o dzuru oke; ?bụ-chia teke ọku gbẹ kewa iya ishi labo bya ekebashia echilabo iya; bẹ ọ-gbẹchihuna bya enweru iphe ọ-bya adu ree k'egude mee tọo?

⁶“Ọo ya bụ lẹ-a; wakwa iphe, Nnajiuphu, bụ Chipfu epfu baa: Ọo ẹgube ono, mu wotaru vayinu ye l'ọku g'ọ buru nkụ l'ime iphe, bụ oshi, nọ l'oswa ono bụ gẹ mu e-me iphe, bụ ndu bukọta lẹ Jierúsalemụ. ⁷Mu a-ghachiru pẹ iphu lẹ ke njo. A makwaru-a l'ẹphe lufutawaru l'ọku ono; ọle ọ bukwapo ọku e-kepyashi pẹ. Teke mu ghachieru pẹ pho iphu lẹ ke njo; bẹ unu a-maru l'ọo mbẹdua bẹ bụ Chipfu. ⁸Mbụ-a; alị ono bẹ mu e-me g'ọ buru ochobu; kele ẹphe ta ahaduru adu gheleghelehele. Nokwa iphe, Nnajiuphu, bụ Chipfu epfu bụ ono.”

Gheleghelehele mkpukpu Jierúsalemụ

16 ¹Noo ya; Chipfu bya epfuru opfu yeru mu sụ: ²“Nwa ndiphe; mee gẹ Jierúsalemụ makpodarupho akpamara, ẹphe eme; ³sụ pẹ: Wakwa iphe, Nnajiuphu, bụ Chipfu epfuru Jierúsalemụ baa:

“Èka i shi, bụ iya bụ ẹka a nwuru ngu bẹ bụ l'alì Kénanu. Nna ngu bẹ bụ onye Amọru. Ne ngu buru onye Hetu. ⁴Mbọku, a nwuru ngu bẹ e te buduru ngu otubo ebubu; ophu o dudu onye wuru ngu ẹhu; mbụ mee ngu g'i dū ree; tẹme ophu a nyiduru ngu mẹ únú l'ẹhu; ophu o buro kẹ kpube ngu ẹkwa l'ẹhu. ⁵O to nwedu onye imemini ngu dū; ophu o dudu onye nweru obu-imemini kẹ g'o nweru iphe ono ophu oo-meru ngu. Iphe, mechiaru nū bụ l'a nwuru ngu gbado l'oma-ẹgu; kele i bụ nwa, aakpofu akpofu teke a nwuru ngu.

⁶“Tọbudu iya bụ; mu ghatashiepho l'ẹka ono bya ahuma ngu l'ẹka i da-byiru arwaswi onwongu lẹ mee ngu ono bẹ mu sūru ngu g'i dzuru ndzū. Mbụ o buru teke ono gū lẹ mee ngu ono puchiru ẹgube ono; bẹ mu sūru ngu: ‘Dzuru ndzū!’ ⁷Mu bya emee ngu; i vua evuvu g'oshi, nọ l'oswa ẹhu dū guu. I bya evuta; ha kẹ kpaphere; bya akaa kpurukutuku; ama ntumatu; era ji ngu obu; tẹme i bya agbaa eji kẹ wogalaa. Obenu l'i gba oto; dabyierupho nno.

⁸“Mu ghatashikwa ozo bya elee ngu ẹnya huma l'i kajiwaru k'ala lẹ ji; o o ya bụ; mu gude igburonu ẹkwa mu phukpute ngu; mbụ gude iya gbochia ngu oto, i gba ono. Mu kwe ngu ukwe lẹ mu a-buru nkengu; anyi lẹ ngu bya eworu ndzū gbaa; i buru nkemu. Nokwa iphe, Nnajiuphu, bụ Chipfu epfu.

⁹“Tọbudu iya bụ; mu bya awua ngu ẹhu; gude sashia ngu mee ono; bya eworu manū jia ngu; ¹⁰woru uwe, a kpangashiru iphe ẹrengete yee ngu; bya eyee ngu akpokpa, e meru l'akpo-anu. Mu woru ẹkwa-ochaa nmabẹ ngu; bya eworu uwe, ereshi ire ike yee ngu. ¹¹Mu gude iyagba kwangashia ngu akwa; bya agbabechaa ngu mgbaleka; bya anyabẹ ngu iphe-olu. ¹²Mu byakwapho eyee ngu eregede-imi; woru eregede-nchi ye ngu lẹ nchi; bya egude okpu, ama ntumatu su-chia ngu ishi. ¹³O buru g'e gude mkpola-ododo mẹ mkpola-ochaa memaa ngu bụ ono. Uwe, iyeje bụ uwe, e meru l'ẹkwa-ochaa; mẹ uwe, ere ire ntumatu; mẹ uwe, a kparu l'ẹkwa, e dengashiru iphe o dū ree l'ẹnya. Nri, iirije buru okpobe ukpokutu ereshi; mẹ manū-ẹnwu; mẹ manū-olivū. O o ya bụ; i bya amashiahaa mma ike bya aburu eze-nwanyi. ¹⁴Epha ngu bya atuko iphe, bụ ohamoha ngakota; o buru mma, iima kparu iya; kele ẹguru iphe ono, mu nuru ngu ono bẹ meru; mma, iima dzua oke. Nokwa iphe, Nnajiuphu, bụ Chipfu epfu.

¹⁵“Ole mma ono, iima ono gbẹ mee; i vuahaa ishi lẹ mkpopfu; bya egude kele udu ngu ngaru ẹkameka; bya awata agba ukpara. Iphe, bụ-kpoo ndu aghata aghata bẹ iwojeru onwongu togboru; mbụ woru mma ngu ono nū phe. ¹⁶Uwe ngu ono bẹ i haru hata gude mema ẹka i doberu agwajẹ iphe emema; o buru ẹka ono bẹ iinoduje agba ukpara obu. Egu-be iphe ono ta agbaduru g'o mee ememe ophu; mbụ l'o to gbaduru g'o dū nno. ¹⁷I wotakwarupho okpobe, iyagba ono, mu nuru ngu ono; mbụ iya-gba ono, e gude mkpola-ododo mu; mẹ mkpola-ochaa mu mee ono; gude

metaru onwongu ntẹkpe, a kpushigbaaru o du ge nwoke. O buru iya be i gude apharwushi onwongu obu. ¹⁸I bya achita ekwa ngu ono, e dengashiru o nodu ama mma ono; woru yegbachaa ntẹkpe ono; bya ewota manumu; me unwu-isensu mu cheberu phe l'iphu. ¹⁹Nri ono, mu nuru ngu ono; mbu okpobe utu-ereshi; me manu-olivu; me manu-enwu ono, mu nuru ngu gi rije ono be i wotakarupho gude gweeru phe eja, eshi mkpo. Oo epho go nwuru bu ge mu pfukotaru ono. Nokwa iphe Nnajiuphu, bu Chipfu ephu bu ono.

²⁰“Ophu kachakpo n bu li chitaru unwegirima unwoke; me unwanyi, i nwushiru mu ono gude gwahaa agwa ono; mbu woru phe mee nri agwa. ?Apharwushi ono, ipharwushi onwongu ono ta atsudu ngu iya to? ²¹I bya eworu unwegirima mu gbushia hua ahuhu l'oku gude gwaa agwa ono. ²²Iphe, bu ebyi ono, iimekotakpoo ono; me apharwushi ono, ipharwushi onwongu ono be iimekotakpoepho; ophu i ti nyataduru teke i shi buru nwata; mbu teke ono, i shi gbaru oto; dabyierupho nno; arwaswi onwongu le mee ngu ono.

²³“Iphe, Nnajiuphu, bu Chipfu ephu eyeru ngu lejo-ememe ono, iimegbabe ono bu: Nshio kwa ngu roo! Nshio kwa ngu roo ya nshio! ²⁴I kpushigbaru onwongu ulo-nshi; bya akpushikwarupho onwongu enya eka agwaje iphe l'iphe, bu edupfu, nonu. ²⁵I tukoru iphe, bu ishi gbororo, nonu dobegbaa enya-agwa; shi egube ono woru mma, iima phaa kutukutu. O nodu abujeru iphe, bu onye ghatasharu nu li pakaaru iya agada; bya eshi egube ono kabaa apharwushi onwongu eje. ²⁶I woru onwongu nu ndu Ijiputu epe pharwushia; mbu ndu obutobu ngu ono, egu nwanyi anoduje enwu phuruphuru lehu goku ono. Eme-aji ngu obu ka ngu pho anwunwe anwunwe lehu; i shi nno akpatsu mu ehueghu.

²⁷“Tobudu iya bu; mu watanu ngu adaa eka lehu ke njo; bya ekebotake oke ali ngu ono. Mu woru ngu nu ndu ohogu ngu ono; bu nwada ndu Filisitayinu bu ndu ehuechi oku; mbu ndu ono iphere apharwushi, i pharwushi onwongu gbenu ono.

²⁸“Ophu ukpara, i gbagbaberu libe iya ozo atsudu ngu iya; i choru ndu Asiriya jeshia; unu le ndu Asiriya pharwushichakpo onwunu; ophu o bukwapho lo tsuru ngu iya. ²⁹I gbafu; jepfu ndu Babilonu; mbu ndu ono, agba oke-ngho ono; unu lephe bya akabakpooro apharwushi onwunu; teme ophu o bukwapho lo tsuru ngu iya.

³⁰“Wakwa iphe, Nnajiuphu, bu Chipfu ephu baa: ‘Obu ngu dahwakwaru adzulakpa; o kwa iya kparu iphe, iimegbabe egube umere owa-a; mbu emeepho ge nwanyi-ukpara, enweedu iphere! ³¹I woru ulo-nshi ngu kpushicha l'iphe, bukpo mgbakata-uzo, nonu; bya eworu enya eka igwaje iphe kpushigbabe l'iphe, bukpo edupfu nonu. Gi gbeje jika anata okpoga-a; be i gbekwa ophu iimegbuedu umere nwanyi-ukpara. ³²I bu nwanyi, alu ji; ole i gbe eri ogori bya akaje aswaru unwoke ozo aswaru; eme le ji ngu.

³³ Onye agba ukpara be onye yee ya kwaru apfuje ugwo; obenu le gu-bedua gbe anuje nemadzu iphe g'unu l'iya kwaa; mbu li gbe anuje iphe, bu ndu shi ekameka iphe uphalazu g'ephe bya g'unu l'ephe shiru onya.

³⁴ Mbu l'agba ukpara nkengu gbe gbaa iche le k'unwanyi ozo; o to nwe-du onye achije ngu g'unu l'iya kwaa. I gbe eme iche; kele inuje nemadzu iphe g'unu l'iya kwaa; ophu o dudu onye anuje ngu nu.

³⁵ "Oo ya bu; gube nwanyi-ukpara; numa iphe, Chipfu epfu! ³⁶ Wakwa iphe, Nnajiuphu, bu Chipfu epfu baa: Eshi ophu i chishiru iphe, i nwe-ru enweru; bya agbabewa onwongu oto l'apharwushi, unu le ndu i yeru obu anoduje apharwushi onwunu ono; teme waa kejo agwa ono, i dobe-gbaaru ono; waa kele inuje phe mee unwegirima ngu; ³⁷ be iphe, ii-huma ahuma bu le-a; mu a-chikobe ndu ono, apharwushi ngu nu ono g'ephe ha, bu iya bu ndu ono, emeje ngu ehutso ono; ndu ophu i yeru obu; me ndu ophu du ngu ash; g'ephe ghakobe tsoo ngu ugu. Mu a-gbabe ngu oto l'iphu phe g'ephe huma-gbua ngu ime. ³⁸ Mu a-nu ngu aphu, aanuje nwan-nyi, riru ogori waa onye gburu ochi. Mu e-kpukposhi ngu oke ehueghu mu; bya egude anwuhu nua ngu aphu. ³⁹ Teke ono be mu e-nwuru ngu nu ndu ono, i yeru obu ono; ephe enwutsushikota ulo agwa ngu ono; tuko aka igwaje iphe nwukposhikota enwukposhi; yeshikota ngu uwe ngu; bya anatachaa ngu iyagba ngu; mbu mee ngu gi gbaru oto dabyiru nno.

⁴⁰ "Ephe a-chita ikpoto nemadzu bya etsoo ngu ugu. Ephe atua ngu mkpu-ma; bya egude ugu-echi phe gbua ngu see see. ⁴¹ Ephe a-tukota ulo ngu oku; nua ngu aphu leka ikpoto unwanyi ele ngu enya. Mu e-me ngu gi paru agba ukpara haa; li pfu-buhu ndu anoduje apharwushi ngu nu ugwo; ephe apha-rwushi-buhu ngu. ⁴² Noo teke ehuebebe ghubuhu mu eghe l'opfu ehue ngu; mu avubuhuru ngu ovuma ono mu shi avuru ngu ono; lebuhe ngu enya ogori; ⁴³ kele i ti nyataduru teke ono, i shi buru nwata ono. O bu-chiaru iphe, i meru bu li gude iphemiphe-a eme ehue ghuaaha mu eghe. Huma ahuma le mu a-tuko iphe ono, i mekotaru ono vuru byabe ngu l'ishi. Ophu bu ukpara be igba; bya emekwapho ebyi atu-ko iya l'eli. Nokwa iphe, Nnajiuphu, bu Chipfu epfu.

⁴⁴ "Iphe, bukpoo onye abya anma etu; be a-nmaje ngu letu su: "Oo ge ne du; bu ge nwa iya nwanyi aduje." ⁴⁵ Oo ne ngu be i yekotaru gberege-dege; mbu ne ngu ono woru ji iya; me unwegirima iya kpo ebo l'afu. O buepho g'unwune ngu unwanyi du bu ge gubedua dukwapho; ephe kpo-kwarupho ji phe; me unwegirima phe ebo l'afu. ?Toto ne ngu to budu onye Amoru; nna ngu buru onye Hetu?

⁴⁶ "Nwune ngu nwanyi k'ogerenya, bu Sameriya yee unwegirima iya be tukoru buru l'uzo isheli aka iya ophu i bu. Nwune ngu nwanyi ke nwa-ta, bu Sodomu yee unwegirima iya tukoru buru le ndohali aka iya ophu i bukwapho. ⁴⁷ O to budu-a li tsoaharu uzo, ephe eshi; ozoo li wataru eme ebyi, ephe tsoru emegbabe; obenu l'umere ngu l'iphemiphe, iimekpoo ememe; gbe bya aka nkephe eshihu aka."

48 “Wakwa iphe, Nnajiuphu, bu Chipfu epfu baa: Oo ge mu no ndzu ge mu no iya-a; bu g'o bu ire-lanu le nwune ngu, bu Sodomu yee unwada iya te emerwujeduru iphe-eji, ha g'ophu unu l'unwada ngu meru. 49 Waa ejo-iphe, nwune ngu ono, bu Sodomu meru baa: Yebedua yee unwada iya shi buru ndu etsenuka etsetse; buru ndu nweru nri k'etsutsu; obenu l'ephe te eshidu akpa ndu ozo ishi; mbu l'ephe te eshidu eyejeru ndu ukpa me ndu adudu g'o du phe aka. 50 Ephe shi buru ndu ekunuka onwophe; bya eme ebyi l'iphe mu. Oo ya bu; mu hūmae ya pho; mu bya edekufu phe.

51 “Samériya te emejahakpodaru nu ejo-iphe, i meru ebo. I kakota unwune ngu phe eme ebyi. O buru ebyi, iimegbabe be meru iphe, unwune ngu phe gbē bya adu g'ephe pfuberekoto. 52 Vukwaru iphere, i meru onwongu; kele i mewaru g'ikpe kaleru unwune ngu unwanyi. Oo kele ejo-iphe, i meru kabaa nkephe eji; be meru iphe, ephe du g'ephe ka ngu aburu ndu pfuberekoto. Mbu-a; vukwaru iphere, i meru onwongu; g'iphere bukwaru nkengu; kele i mewaru unwune ngu unwanyi g'ephe du g'ephe pfuberekoto.

53 “Ole-a; Sodomu yee unwada iya; me Samériya yee unwada iya be mu e-mekota g'iphe bya aduru le ree; egube o shi duhawaru phe. Mu e-mekwapho g'iphe duru ngu le ree teke ono, mu e-me g'o duru phe le ree ono. 54 Oo ya bu; g'iivutakwanu iphere, i meru onwongu; mbu g'iphere iphe, i mekotaru adu ngu; m'ephe gudee ya pho adu onwophe obu. 55 Unwune ngu unwanyi phe; mbu Sodomu me unwada iya; me Samériya yele unwada iya; be a-bya alwa azu l'onodu phe; mbu g'ephe shi du le mbu ono. Gubedua waa unwada ngu be ee-mekwapho g'unu lwa azu l'onodu unu. 56 I ti pfukutakpodanu nwune ngu nwanyi, bu Sodomu le teke ono, i shi eku onwongu ono; 57 mbu le teke ono, ejo-iphe ngu teke eshidu gbafta iphe ono. Ole nta-a be o duana ngu nno; unwada Edomu emewaa ngu iphe ochi; je akpachaa l'iphe, bu ndu obutobu iya phe; mekwapho unwada Filisitayinu. Mbu l'iphe, bu ndu bupheru ngu mgburugburu akpokotawaa ngu ebo l'afu. 58 Ii-ri urwu ukpara ono; me urwu ebyi ono, i mekotaru ono. Noo iphe, Chipfu epfu bu ono.

59 “Wakwa iphe, Nnajiuphu, bu Chipfu epfu baa: ‘Mu a-pfu ngu ugwo iphe, i meru; kele o to dudu iphe, i gubekwaduru ogbandzu ono, mu le ngu gbaru ono; mbu l'i wowaru ogbandzu ono mebyia. 60 Ole g'oduhabe be mu a-nyataela ogbandzu ono, mu le ngu gbaru teke i bu nwata ono; mu e-me ge mu le ngu gbaa ndzu, a-no jeye l'ojeje. 61 Oo ya bu; g'ii-nyata iphe, i mekotaru; iphere iya abya adu ngu; me mu dulataeru ngu pho unwune ngu unwanyi; mbu onye k'ogerenya me onye ke nwata. Mu e-woru phe dee ngu g'ephe buru unwu ngu unwanyi. Ole o to bukwanu kele mu le ngu gbaru ndzu be kparu iya nu. 62 Mu e-me g'ogbandzu mu le ngu nguru anguru; g'iimakwanuru l'oo mbedua be bu Chipfu; 63 k'ophu bu iphe, bukpo teke i nyataru iya; iphere adu ngu; teme onu aburu ngu

kpurukudukuu l'eka iphere jiru ngu iphu; le mu g'kotaru ngu nvu l'ejo-
iphe, i mekotaru g'o ha. Nokwa iphe, Nnajiuphu, bu Chipfu epfu.' ”

Etu, e gude ugo labo waa vayinu anma

17 ¹Noo ya; Chipfu bya epfuru opfu yeru mu su: ²“Nwa ndiphe; tua
ilu-opfu; gude etu pfuaru onu-ulo Izurelu opfu. ³Su phe; ‘wakwa
iphe, Nnajiuphu, bu Chipfu epfu baa: O nweru ugo, ha shii, nkù iya ha-
kwapho shii; eba iya hagbaa ogologo ogologo; teme o fua eba dengashiru
iphe igwerigwe. Ugo ono phee phaa bya adaa ubvu Lébanonu; je aworu
oshi sida l'ononu iya. ⁴O tu-butu ononu oshi ono; gude iya pheru lasha
ali ndu agba oke-ngho; je eworu iya dzabe le mkpukpu ndu oke-ngho
ono. ⁵O hatakwapho iphe, aakuje akuku, no l'ali ono je eworu kua l'ali,
emehuje iphe. Eka o woru iya kua bu l'aguga eze-mini g'oshi-wilo. ⁶O
bya efuta baahaa uba; buru vayinu, baru uba shingushingu; bya adu ke
kpuchi; du mkpulali. Ekali iya phobechaa onu l'ibe iya ophu o no; ole
ogbarabvu iya kepfuchaaru l'eka o kepfuru. Oo ya bu; o buru vayinu baa
uba jakashia ekali. Ekwo iya nodu abya ke pulapula.

⁷“Ole o nweru ugo ozo, hakwapho shii, nkù iya hakwapho shii; bya
efushikwapho eba du ogologo ogologo. No iya; vayinu ono gbeshi l'eka
ono, a dzaru iya ono gbaa ogbarabvu jefpushia ya; bya ajakashia ekali
jefpushia ya g'o gbaje iya mini. ⁸A dzaru iya l'eka ali du ree l'aguga eka
mini jiru ejiji; k'ophu o-jakashia ekali; mishia akpuru; buru vayinu, du
ubvu.’

⁹“Su phe: ‘Wakwa iphe, Nnajiuphu, bu Chipfu epfu baa: ?O du unu
g'a su l'ome vayinu ono a-nya to; g'e te pefu iya; woshia ya akpuru
g'o nwulwashihu? Irwu, o rwutakotaru k'ophuu a-nwulwashihukota. E
te ejekpodanu ele enya onye okpehu du; ozo ikpoto nemadzu g'a vua
ya l'ogbarabvu. ¹⁰O -buru l'e phetaru iya je adzabe l'eka ozo; ?oo-nya-a?
?To nwulwashihu-gbudu ree; me pherephere uzo enyanwu-awawa bya-
pfuta ya pho; mbu nwulwashihu bu l'eka a dzaru iya?’ ”

¹¹To budu iya bu; Chipfu bya epfuru opfu yeru mu su: ¹²“Waa iphe, ii-
pfuru ndu onu-ulo ono, bu ekwegekwe ono baa: ?O du g'unu ta amadu
iphe, etu-a, a nmaru unu-a bu to? Su phe; waa iphe, o bu baa: Eze ndu
Babilonu be jeru Jierusalemu je akputa onye eze; bya akpukokwapho
ndu-ishi mkpukpu ono kpulatakota ali Babilonu. ¹³Noo ya; o bya eduta
onye lanu, shi l'unuphu ndu eze; yee ya gbaa ndzu; mbu mee o ribuaru
iya angu. O tukokwapho ndu nweru enya l'ali ono kputachaa; ¹⁴k'ophu
ali-eze ono a-buru ali-eze, a kwatsuru akwatsu; ophu o byadu egbeliba
ishi egbeli ozo; gbahakwa l'o doberu ogbandzu ono; oo ya bu; l'oodubaa
kwaseru. ¹⁵Obenu l'iphe, eze ono meru bu l'o gbè kwefuru iya ike; ye ndu
oozije ozi g'ephe je Ijiputu je akpukooru iya inya; waa g'ephe rwutaru iya
ndu ojogu, du igwerigwe. ?O du unu g'onye meru iphe du nno a-nya to?

?Aa-ha iya g'o mee ya ria tọ? Mbụ-a; ?oo-mebyi ọgbandzu ono, ọ gbaru ono laa kẹ mmanụ tọ?

¹⁶“Wakwa iphe, Nnajiuphu, bụ Chipfu epfu baa: Ọ kwa gẹ mu nọ ndzụ gẹ mu nọ iya-a; bụ g'ọ bụ ire-lanụ l'ọ nwuhufutaje lẹ Bábilonu; mbụ l'alị k'onye eze, doberu iya l'aba-eze ono; mbụ onye ono, ọ tọ gụbeduru nte, ọ nuru iya iphe ono, bụ iya bụ onye ono, o mebyiru ọgbandzu, yẹ ya gbaru ono. ¹⁷Fero yẹ ndu ojogu iya, bụ ndu ike dū; mẹ ikpoto ndu ọzo, o rwukọru yeru onwiya bẹ taa dukwa ike adzọ iya l'ọgu lẹ teke ndu ọhogu iya e-vuru ẹja kụ-jia azu igbulọ iya; gude kwaberu iya k'ọgu; mbụ teke ono, ẹphe e-bvushi ose-ọgu g'e gbua ndu dū igwerigwe pyaapyaapya ono. ¹⁸Ọ tọ byadu ala kẹ mmanụ; noo kẹle o to meduru iphe, o riburu lẹ nte; ọphu o dobeduru ọgbandzu ono, ọ gbaru ono.

¹⁹“Ọo ya bụ lẹ-a; wakwa iphe, Nnajiuphu, bụ Chipfu epfu baa: Eshi ọphu mu nọ ndzụ gẹ mu nọ iya-a; bẹ nte ono, o riru, ọ tọ gụbeduru iphe ono; mẹ ọgbandzu mu ono, o mebyiru ono bẹ mu e-vuru byabẹ iya l'ishi. ²⁰Mu e-woru ụgbu mu geberu iya; l'ọ nmalahuru mu l'ọnyà. Mu akpuru iya laa Bábilonu je anụ-a ya aphụ l'ẹka ono; noo kẹle mu te egudedu ire iya ẹka. ²¹Ndu ojogu iya ọphu agbala agbala bẹ bụ ogu-echi bẹ ee-gude gbushia phe. Ndu ọphu phoduru nū bẹ a-chiru phekaa epheka. Ọo ya bụ g'ìmaru l'ọo mbedua, bụ Chipfu bẹ pfuru opfu.

²²“Wakwa iphe, Nnajiuphu,
bụ Chipfu epfu baa:
Ọo mbedua gededede bẹ
e-gude ẹka mu tų-butu
ononu oshi sida ono
dzabẹ;
mbụ lẹ mu a-tų-butu ononu
oshi ono l'ẹka ọ dū
penupenu;
je eworu dzabẹ l'úbvú,
ha l'eli bya aha
ephekerephe.

²³Ọo l'úbvú ndu Ízurelu,
ha l'eli bẹ mu a-dzabẹ
iya.
Ọo-jakashị ẹkali; mishiya mebyi;
buru oshi sida, dū ùbvù
shii.
Iphe, bụ unwenu, dū iche
iche bẹ a-kpajẹ ẹpfune
l'eli iya.
Ẹkali iya a-buru unwenu

ono ẹka ibvu du, ẹphe
a-nọduje.

24 Iphe, bukota oshi,
nọ l'egu bẹ a-maru l'ọo
mbẹdua,
bụ Chipfu bẹ emeje oshi,
ha l'eli g'ọ du mkpulali;
bya emeje ọphu du
mkpulali g'ọ ha l'eli.

Mu nọdu emejekwaphọ
g'oshi,
du oyii kpọhu nkụ;
bya emeje ọphu
kpọhuwaru nkụ g'ọ
byaahaa kẹ pulapula.

Ọ kwa mbẹdua, bụ Chipfu bẹ pfuru opfu ono; mu je l'e-me iya; gẹ mu pfuru iya.”

Onye meru ẹjo-iphe a-nwụhu

18 ¹Tọbudu iya bụ; Chipfu bya ẹpfuru opfu yeru mu sụ: ²?Bụ ọunu bẹ ẹtu ono, unu anmajẹ l'alị Ízurelu ono bụ? Mbụ ẹtu ono, unu anmajẹ sụ:

“Ndu bụ nna erije akpuru
vayinu, anwụ ọnu;
ézé agbẹ je akpọahaa
unwegirima yigayiga.

³“Waa iphe, Nnajiuphu bụ Chipfu ẹpfu baa: Ọo gẹ mu nọ ndzụ gẹ mu nọ iya; bụ g'ọ bụ ire-lanụ l'unu ta abyadu anmabaa ẹtu ono ọzo lẹ Ízurelu.
⁴Unu maru amaru l'iphe, bụ nemadzụ l'ọphu bẹ bụ mbẹdua nwe iya. Ndu bụ nna mẹ unwegirima bẹ bụ mu nwekọta pẹ. Ọo onye meru iphe-ẹji bẹ a-nwụhu nụ.

⁵“Ọ -buru l'o nweru onye pfulerekoto; buru onye emeje iphe, pfuru ọto; mẹ iphe, gbaru nụ; ⁶ọphu onye ọbu erijedu iphe l'ẹka aagwajẹ iphe l'úbvú; tẹme ọphu ẹnya iya adujedu l'ẹka agwa ndu Ízurelu nọ; tẹme ọphu onye ọbu emerwushijedu nyee nemadzụ ibiya; ọphu oojepfujedu nwanjị lẹ teke ọ nọ nsọ nwanjị; ⁷ọphu onye ọbu emekpajedu onye ọzo ẹhu; buru onye ewolajeru onye o jieru ụgwo iphe, o yeru iya l'itumo; ọphu ọonajedu nfu; ọ buru onye anujẹ onye ẹgu agụ nri; ọ nọdu anmabeje onye gba ọto iphe; ⁸ọphu onye ọbu te ejiejedu nemadzụ ụgwo ntụkwase; mbụ ọphu o to jiejedu nemadzụ ụgwo ele ẹnya urwu; tẹme ọ nọdu esefuje ẹka l'iphe, du ẹji; bya ekpejeru nemadzụ yẹle ibe iya ikpe pfuru nhamunha; ⁹bya emeje iphe, mu tọru ọkpa iya g'e meje; mbụ bya eyeru ẹhu eme ekemu

mu; onye ono bẹ bụkwa onye p̄f̄beru-ẹka-ọto. Ọo-nọdua ndzụ eviya. Noo iphe, Nnajiuphu, bụ Chipfu epfu bụ ono.

¹⁰“Ọle ọ -buru l'onye ono bẹ nwutaru nwa, eme kpanga kpanga kpanga; buru onye egbu ọchi; mbụ haru iphe ono eme; ¹¹ọphu nna nwata ono adudu iphe ono duru ọphu o mejeru; obenu lẹ yẹbe nwata ono gbẹ buru onye erije iphe l'ẹka aagwajẹ iphe l'úbvú; bya emerwushije nyee nemadzu ibiya; ¹²bya emekpajẹ ndu ukpa waa ndu adudu g'ọ dū p̄hẹ ẹhu; ọ nọdu anajẹ nemadzu iphe kẹ ẹhuka; buru onye te ewolajẹdu iphe, e yeru iya l'itumo; bya abukwarupho onye ẹnya iya aduje l'agwa; buru onye anọduje eme ẹbyi; ¹³bya aburu onye ejieje nemadzu ugwo ntukwase; mbụ onye ejieje ugwo ele ẹnya urwu; ?ọ dū unu g'aaha iya g'ọ dzuru ndzụ ọto? Ọ tọ dzukwaru ndzụ. Ọ -buru l'oomekota iphe ono, bụ ẹbyi ono bẹ ọ nwuhufutajekwa; ishi ọchi iya atukoru iya l'ishi nkiya.

¹⁴“Ọ -buru lẹ nwata ono byaru anwuta nwa; nwa ono, ọ nwutaru ono bya ahumakota ejo-iphe, nna iya ono mekotaru; ọ -humachaa ya; obenu l'o to meduru gẹ nna iya meru; ¹⁵mbụ ọphu o to rijedu nri l'ẹka aagwajẹ iphe l'úbvú; ọphu o to lejedu ẹnya l'ẹka agwa ndu Izurelu no; ọphu o to merwushijedu nyee nemadzu ibiya; ¹⁶ọphu ọ dudu onye oomekpajẹ ẹhu; ọphu ọ sụjedu gẹ nemadzu yeru iya iphe l'itumo tẹme l'oojie ya ugwo; ọphu ọ budu onye ana nfu; obenu l'oowojeru nri iya nū onye ẹgu agu; bya anmabeje onye gba ọto iphe; ¹⁷bya aburu onye esefuje ẹka iya l'iphe, bụ ejo-iphe; ọphu ọ budu onye ejieje nemadzu ugwo ele ẹnya urwu; ọzoo ntukwase. Ọ buru onye emeje ekemu mu; bya etsoje iphe, mu toru ọkpa iya g'e meje; bẹ onye ono taa nwuhukwa lẹ k'ejo-iphe, nna iya meru. Ọo-dzuru ndzụ. ¹⁸Obenu lẹ nna onye ọbu a-nwuhu k'ejo-iphe, o meru; kẹle ọ bụ onye riru nemadzu urwu; buru onye naru nwune iya nfu; bya emee iphe, ta adudu ree l'echilabo ndibe p̄hẹ.

¹⁹“Unu gbekwapho ajije sụ: ‘?Bụ gunu kparu iphe, nwa ta alajedu l'ochi k'iphe, nna iya meru?’ Eshi ọphu nwatibe iya eme iphe, p̄furu ọto; mẹ iphe, gbaru nū; bya anwube ẹnya emekota iphe, mu toru ọkpa iya g'e meje bẹ ọo-dzunuru ndzụ. ²⁰Ọo onye meru ejo-iphe bụ onye a-nwuhu nū. Nwa bẹ taa nwudu onwu iphe, nna iya meru; nna taa nwudu onwu iphe, nwa iya meru. Onye p̄f̄bererekoto bẹ aa-gu l'onye eme ree; nokwapho g'onye iwashi, bẹ ejo-iphe iya a-kwotoru l'ẹhu bụ ono.

²¹“Ọle ọ -buru l'onye eme ejo-iphe; byaru agbakuta ejo-iphe, o shi emekota azu; bya atuko iphe, mu toru ọkpa iya g'e meje meahaa; bya emeahaa iphe, p̄furu ọto; mẹ iphe, dū ree; bẹ ọo-dzukwaru ndzụ. Ọ tọo nwuhukwa. ²²Ejo-iphe, o mekotaru ono bẹ aa-zohakota; a taa gukoeduru iya ya. Eshi ọphu o meru iphe, p̄furu ọto ono; bẹ ọo-dzuru ndzụ. ²³?Unu dobesu l'anwuhu onye ejo-iphe atsoje mu utso? Ẹhu akajẹ mu atso utso mẹ onye ono haa ejo-iphe iya ono bya anodu-chia ndzụ? Nokwa iphe, Nnajiuphu, bụ Chipfu epfu.

²⁴“Obenu; ọ -būru l'onye p̄f̄uberekoto byaru aparu eme iphe, p̄f̄uru ọto haa; wata eme ẹjo-iphe; mb̄u meahaa ẹbyi, onye ẹjo-iphe anọduje emegbabe; ?onye ono a-dzuru ndz̄u t̄o? Wawakwa! O to nweḍu iphe, ḍu ree ono, o shi emek̄ota ono ọphu aa-nyatakwaḍu; noo kele e te gudeḍu ire iya ẹka. Ọo-nw̄uhu; laa l'iphe-ẹji ono, o mek̄otaru ono.

²⁵“Unu asuje l'iphe, m̄ube Nnajiuphu eme ta p̄f̄uduru nhamunha. Unu ngabekpodapho nchi unube ndu Ẹzurelu! ?Unu s̄uru l'iphe, mu eme ta p̄f̄uduru nhamunha? ?T̄o buchida unubeḍua be te emedu iphe, p̄f̄uru ọto?
²⁶Teke ọ bu l'onye p̄f̄uberekoto be haru ap̄f̄ubekoto; bya emeahaa ẹjo-iphe; be onye ọbu a-nw̄uhu k'ẹjo-iphe ono, o meru ono. ²⁷Ọzo bu le teke onye eme ẹjo-iphe par̄u eme ẹjo-iphe, oome haa; bya emeahaa iphe, p̄f̄uru ọto; me iphe, ḍu ree; be onye ọbu a-dz̄o onwiya ndz̄u. ²⁸Eshinu ọ byaru bya ari-phuta oriri azu k'ẹjo-iphe ono, o mek̄otaru ono; bya agbakuta iya azu; be ọo-dz̄uru ndz̄u; ọ t̄o nw̄uhudu. ²⁹Ole unube ndu Ẹzurelu gb̄e epfu le Nnajiuphu te emeḍu iphe, p̄f̄uru ọto. Unube ndu Ẹzurelu; ?buchia mb̄eḍua te emeḍu iphe, p̄f̄uru ọto t̄o? ?T̄obudu unubeḍua be gb̄e emejchia iphe, a p̄f̄uduru ọto ọbu?

³⁰“Oo ya bu; unube ndu Ẹzurelu; mu e-kpekwa unu ikpe g'iphe, onye-ṅonu meru gbaru. Nokwa iphe, Nnajiuphu, bu Chipfu epfu. G'izimanu lwadupho unu azu! Unu ahakota ẹjo-iphe, unu eme; ọo ya bu g'ẹjo-iphe ta aburu iya e-me g'unu buru mkpurupyata. ³¹Unu tukokpoo ẹjo-iphe, unu mek̄otaru g'ọ ha gwobekota; unu emee obu unu g'ọ buru obu ọphúú; unu abya anọdu ndz̄u ọphúú. ?Bu gunu kparu iphe, unu gude ẹka ekutaru onwunu ọnwu unube ndu Ẹzurelu? ³²Kele ọ t̄o ḍuḍu onye ọduje mu ree l'ọ nw̄uhuru. G'izimanu lwa unu azu; ge ndz̄u aburu nkunu! Nokwa iphe, Nnajiuphu, bu Chipfu epfu.

Ebvu-aphu, a guru ndu-ishi ndu Ẹzurelu

19 ¹“Guru ndu-ishi ndu Ẹzurelu ebvu-aphu. ²Gua ya su:

“Ne ngu shi buru ne oduma,
 no lechilabo oduma.

Ọ ze lechilabo ẹka unwu
 oduma doru ehe
 unwu iya.

³ O hefu nwa lanu l'ime
 unwu iya ono.
 Nwa iya ono bya aburu
 oduma, okpehu du;

Ọ bya anwuta g'eeshije
 egbu anu;
 bya ata nemadzu pyaapya.

⁴ Ohamoha bya anuahaa

- ke nkiya.
 Epe mee ya o nwulahu
 l'iduma phe.
 Epe gude eze ikekee
 nmata iya kpuru lashi
 ali Ijiputu.
- 5 Ne iya ahuma l'iphe,
 o tberu te ejedu
 g'o tberu iya;
 o duta nwa iya lanu ozo;
 hekwa hefuta;
 o buru oduma,
 okpehu du.
- 6 O tsoru oduma ibe iya
 jepheahaa g'o du iya;
 noo kele oobyawaa
 aburu oduma, okpehu du.
- O bya anwuta g'eeshije
 egbu anu;
 bya atahaa nemadzu
 pyaapya.
- 7 O woru aka epe
 kpushigbaaru ike
 nwutsushia;
 mbu aka egbobutaje
 phe nu;
 bya atuko mkpukpu
 phe mee umerekete.
- Ndu-agugu ndu erwutaje
 ndu ali ono lekiri,
 oosuje.
- 8 Tobudu iya bu; iphe,
 bu ohamoha bya
 akwageberu iya;
 mbu ndu shikota
 lekali ibiya ono
 mgburugburu.
- Epe bya eworu ugbu
 phe geberu iya.
- O nwulahu l'iduma,
 epe bvuru.
- 9 Epe gude ikekee nmata

- iya kpufuta;
 bya enwuru iya ye le
 mkpuchi;
 pata iya pajeru eze
 ndu Babilonu.
- Ephe nwuru iya ye
 le mkporo.
- Oo ya bu; a numa-buhu
 aka oosu ekiri l'ubvu
 ndu Izurelu.
- 10 Ne ngu dupho g'ome
 vayinu,
 no l'opfu-vayinu ngu.
- E yeru iya laguga mini;
 o mia wopfuru awopfuru;
 jashia aka igwerigwe;
 kele mini,
 tsuru iya l'ehu mebyi
 atsuru.
- 11 Ekali iya ono shihukota ike;
 dupho ree ke g'o buru
 mgboro onye eze.
- O jakpo du kpuchii
 kakota epfukala ozo shii.
 Uba iya kakota epfukala
 ozo l'eli k'ophu o
 sengoru iphemiphe
 ozo baru uba l'oswa.
- 12 Obenu l'e gude
 ehueghu vua ya
 l'ogbarabvu;
 mbu vuta iya togbo
 l'ali.
- Pherephere, shi l'uzo
 enyanwu-awawa
 bya ezia;
 akpuru iya kposhihu
 nkụ.
- A bya anyiswoshikota
 iya akpuru.
- Ekali iya ono, shihukotaru
 ike ono bya

akpòshihuchaa nkù;
 ọku woru iya nmaa
 swòkoswoko.

13 Nta-a bẹ e je eworu
 iya dzabẹ l'echiegu;
 mbù l'alì, kpọru gbengu;
 mini adudu mẹ ililekpọo.

14 Ọku bya eshi l'ẹkali
 iya lanu gbanwuhu;
 keyashichaa
 akpuru iya.

Ọphu o nweedu ẹkali,
 shihuru ike,
 nọkwadu iya nu;
 mbù ọphu dukwadu
 ree k'aburu mgboro
 onye eze.

Ọwa-a bụ ebvu-aphu g'e
 rwujekwa iya erwubvu.”

Ndu Ízurelu ekwefuru Chileke ike

20 ¹Tọbudu iya bụ; o be l'abalì k'iri l'onwa ise l'apha k'ẹsaa; o nweru ndu bụ ọgerenya ndu Ízurelu wuru bya gẹ mu kpatarụ phẹ ishi l'ẹka Chipfu. Ẹphe bya adọru l'iphu mu. ²No iya; Chipfu bya epfuru opfu yeru mu sù: ³“Nwa ndiphe; pfuru nu ndu bụ ọgerenya Ízurelu sù phẹ; wakwa iphe, Nnajiuphu, bụ Chipfu epfu baa: ?Ọ kwa l'ọo ishi bẹ unu byaru mu akpata? Ọo gẹ mu nọ ndzụ gẹ mu nọ iya; bụ g'ọ bụ ire-lanụ lẹ mu ta abyadụ ekwe g'unu kpata mu ishi. Nokwa iphe, Nnajiuphu, bụ Chipfu epfu bụ ono.”

⁴“Nwa ndiphe; woru gẹ kẹ nkepẹ dọ tọa jala; wota g'ẹphe eme tọa phẹ jala l'atatiphu. Mee g'ẹphe maru ẹbyi, nna phẹ shi emegbabe. ⁵Sù phẹ; wakwa iphe, Nnajiuphu, bụ Chipfu epfu baa: Mbọku ono, mu họtaru Ízurelu ono bẹ mu riburu oshilọkpa Jiékọpu angụ; bya emee g'ẹphe maru onye mu bụ lẹ teke ẹphe nọ l'alì Ijiputu. Mu pfuaru phẹ iya hoo haa sù phẹ: ‘Ọ kwa mbẹdua bụ Chipfu, bụ Chileke unu.’ ⁶Ọo lẹ mbọku ono bẹ mu riburu phẹ angụ lẹ mu e-dufuta phẹ l'alì Ijiputu; duru phẹ laa l'alì, mu chọtaru phẹ; mbù alì, bukota ọsu ayi-ayi; bọru iya bụ alì, kakota ree l'iphe, bụ alì nonu. ⁷Mu sù phẹ: Onyenonu wofukota ejo ọbvụ ono, unu doberu agwaphe ono, tuphaa. Unu te egudekwa agwa ndu Ijiputu merwushia onwunu. Ọ kwa mbẹdua bụ Chipfu, bụ Chileke unu. ⁸Obenu l'ẹphe gbẹ kwefuru mu ike; ọphu ẹphe ta angaduru mu nchi; ọphu ẹphe ta alwuduru ejo ọbvụ ono asọ oyi ono, ẹphe kpọru obu ye ono; ọphu ẹphe

ahaduru agwa ndu Ijiputu ono. Oo ya bu; mu su le mu a-tukoshi phe oke ehu-eghu mu mbu le mu e-kpukposhi phe oke-ehu-eghu mu le Ijiputu. ⁹Obenu le mu meru g'e te mebyi epha mu l'iphu ohamoha ono, ndu Izurelu shi bugbaaru ono; mbu ndu ono, mu no l'iphu phe mee ge ndu Izurelu maru mu shita l'edufuta, mu dufutaru phe le Ijiputu ono.

¹⁰“Oo ya bu; mu kwe dufuta phe le Ijiputu; duru phe lashaa l'echiegu. ¹¹Mu bya eworu iphe, mu toru okpa iya su g'e tsoje goshi phe; bya emee g'ephe maru ekemu mu; kele onye emeje iya nu be e-gude iya nodu ndzu. ¹²Mu bya eworu eswe atuta-unme doberu phe g'o buru iphe-ohubama, no le mgbaka mu l'ephe; k'ophu ephe a-makwanuru loo mbedua, bu Chipfu meru phe ephe du nso. ¹³Ole ndu onu-ulo Izurelu be kwefuleru mu-a ike l'echiegu ono. Ephe te ekwedu mee iphe, mu toru okpa iya su g'emeje; mbu l'ephe te ekwedu mee ekemu mu; mbu ekemu mu ono, bu onye meru iya nu lo nodu ndzu ono. Ephe woru eswe-atuta-unme ono, mu doberu phe ono phaa kutu-kutu. Oo ya bu; mu pfua ya ruhata iphu su le mu a-tukoshi phe oke ehu-eghu mu; woru phe gbushia l'echiegu ono. ¹⁴Obenu le mu meru g'e te pfubyi epha mu l'iphu ohamoha ono, bu ndu mu no l'iphu phe dufuta phe ono. ¹⁵Mu byakwapho ahalia aka ribuaru phe angu l'echiegu su le mu tee dueduru phe ala l'ali ono, mu nuru phe ono; mbu ali ono, buephoosu ayi-ayi; mbu ali, ono bu iya kakota ree l'iphe, bu ali nonu ono; ¹⁶noo kele ephe te ekwedu eme ekemu mu; teme ophu ephe te etsoduru iphe, mu toru okpa iya su g'e tsoje. Ephe woru eswe atuta unme mu phatoshia; noo kele oo l'agwa be obu phe du.

¹⁷“Ole mu phuleru phe-a obu-imemini; ophu mu te egbushiduru phe; mbu mee g'ephe chihu l'echiegu ono. ¹⁸Mu suru unwu phe l'echiegu ono: Unu te etsokwa iphe, nna unu phe toru okpa iya; ophu unu emekwa ekemu phe; ozoo g'unu gude agwa agwa phe merwushia onwunu! ¹⁹Oo mbedua bu Chipfu, bu Chileke unu. Unu tsoje iphe, mu toru okpa iya; mbu g'unu nwube enya meje ekemu mu; mekotaje iya g'o ha. ²⁰Unu emeje eswe-atuta-unme mu g'o du nso; k'ophu oo-buru iphe-ohubama mu l'unu. Oo ya bu; g'unu a-makwanuru loo mbedua bu Chipfu, bu Chileke unu.

²¹“Obenu l'unwu phe ono be kwefuhukwaru mu pho ike. Ephe te ekwedu mee iphe, mu toru okpa iya su g'ephe meje; ophu ephe ta anwubekpodaru nu enya l'eme ekemu mu; mbu ekemu mu ono, bu onye meru iya nu lo nodu ndzu ono. Ephe phatoshiru eswe-atuta-unme mu. Oo ya bu; mu pfua su le mu a-tukoshi phe oke ehu-eghu mu; mbu le mu e-kpukposhi phe ehu-eghu mu l'echiegu. ²²Ole mu mechaleru-a selaa aka azu; mee g'e te epfubyi epha mu l'iphu ohamoha ono, bu ndu mu no l'iphu phe dufuta phe ono. ²³Mu byakwapho eriaru phe angu l'echiegu ono su le mu a-chikashi phe g'ephe lachaa ohamoha, nonu; mbu g'ephe gbakashihu dzuru ali ndu ohozo; ²⁴kele ephe te ekwedu eme ekemu mu; mbu l'ephe jikaru eme iphe, mu toru okpa iya; bya aphantoshia eswe-atuta-unme mu. O buru aka enya phe du bu l'agwa, nna phe gwaru.

25 “Mu panuru phe nwuhaa g'ephe tsoje iphe, a toru okpa iya su g'ephe tsoje; bu iphe, adudu ree; mbu ekemu, ephe te e-gudedu anodu ndzu.

26 Mu bya emee ephe gude ngweja, ephe egweje merwushiahaa onwophe; mbu ephe huahaa okpara phe l'oku gude gweahaa eja. Iphe ono be mu meru g'eeshi ge ndzu-agugu rwuta phe; g'ephe amakwanuru l'oo mbedua bu Chipfu.

27 “Oo ya bu; nwa ndiphe; pfuaru ndu Izurelu su phe; wakwa iphe, Nnajiuphu, bu Chipfu epfu baa: Oo egube-a be nna unu phe gude gbarwua mu; bya ajika etso uzo ire-lanu mu. 28 Teke mu dubaru phe l'ali ono, mu riburu phe angu iya le mu a-nu phe ono be ephe byaru ahuma iphe, bukpo ubvu ubvu, hagbaa l'eli; mekpoo oshi, ekwo du ke gayii; ephe gweahaa ngweja l'eka ono; gude iya kpatsu mu ehueghu. O bukwarupho l'eka ono be ephe gweru ngweja unwu-isensu, eshi kweekweekwee; me ngweja-mee. 29 Tobudu iya bu; mu su phe: ?Bu gunu be eka ono, unu ejeje agwa iphe ono bu? Oo ya bu; e kuahaa eka ono Bama byasu ntanu-a. 30 Oo ya bu; pfuaru ndu Izurelu su phe; ‘wakwa iphe, Nnajiuphu, bu Chipfu epfu baa: ?Unu a-nodu emerwushi onwunu ge nna unu phe; mbu tsoru agwaphe ejo agwa, ephe shi anoduje agwa ono too? 31 Mbukponu le ntanu-a be unu anodujeela egwe egube eja ono; mbu eja ono, unu ahuje unwu unu l'oku gude egwe ono. Unu gude agwaphe agwa emerwushikpoepho onwunu eje. Unube ndu Izurelu; ?bu ge mu haa unu g'unu jitajekwadu mu iphe too? Eshinu mu no ndzu ge mu no iya-a be unu taa jitibaekwa mu iphe ozobaa. Nokwa iphe, Nnajiuphu, bu Chipfu epfu.

32 Unu asuje l'o du unu g'unu du g'ohamoha ozo, nogbaa nu; mbu g'unu du ge ndu mgboko, bu oshi me mkpuma be ephe abaru eja. Ole iphe ono, unu ari ono ta ayidu mee ememe ophu.

33 “Wakwa iphe, Nnajiuphu, bu Chipfu epfu baa: Eshinu mu no ndzu ge mu no iya-a be mu e-gude ike mu; me agburu-ehu mu; yeke oke ehueghu, mu e-kpukposhi unu; buru onye-ishi unu. 34 Mu e-gude eka ike; me agburu-ehu; yeke oke ehueghu, mu e-kpukposhi unu gude shi l'iphe, bu ohamoha ono dufuta unu; mbu shi l'iphe, bukpo ali ono, unu gbakashihuru laa ono chikobekota unu. 35 Mu e-duta unu lashia l'echiegu, ohamoha bupheru mgburugburu. O buru l'eka ono be mu l'unu a-nodu l'iphu l'iphu; mu e-kpee unu ikpe. 36 Oo egube ono, mu kperu nna unu phe ikpe l'echiegu ali Ijiputu pho bu ge mu e-kpe iya unu. Nokwa iphe, Nnajiuphu, bu Chipfu epfu.

37 “Mu e-chi unu echachi jasununu edobeahaa ogbandzu ono. 38 Iphe, bu ndu bu ekwegekwe ono; mbu ndu ono, anoduje atupya mu ono be mu a-loshikota l'ime unu. Mu e-dufutakwa phe-a l'ali ono, ephe laru je ebugbaaru ono; ole ephe taa bahukwanu l'ali Izurelu. Oo ya bu; g'unu amakwanuru l'oo mbedua bu Chipfu.

39 “Wakwa iphe, Nnajiuphu, bu Chipfu epfu baa: Unube ndu Izurelu; g'onyenonu le g'unu ha jekpowaro agwaa nshi iya. Ole unu

e-mechakwana ngaberu mu nchi; numa iphe, mu e-pfuru unu; unu aparu egwephe eja haa; mbu eja ono, unu gude apharwushi epha mu, du nso apharwushi ono. ⁴⁰ Oo l'ubvu mu, du nso; mbu leze ubvu Izurelu be mube Nnajiuphu, bu Chipfu suru l'iphe, bu ndu Izurelu a-nodukota; abajeru mu eja. O buru eka ono be mu a-nodu nata phe; teme o buru l'eka ono be unu a-noduje gwaa mu agwagwa; nu mu iphe, kachakpo ree, unu nweru; yee iphe, dukota nso, unu egwejeru nu mu. ⁴¹ Mu a-nata unu g'unu bu unwuisensu, eshi kweekweekwee le teke ono, mu dufutaerupho unu l'iphe, bu ohamoha ono, unu nokota ono; mbu rwufutakota unu l'iphe, bu mkpukpu ono, a chikashiru unu laa ono. Teke ono be mu e-goshikwanu ohamoha le mu bu onye du nso okpobe adudu. ⁴² Oo ya bu g'unu a-makwanuru le mu bu Chipfu le teke ono, mu e-dubata unu l'ali Izurelu, bu ali ono, mu riburu angu le mu a-nu nna unu phe ono. ⁴³ O buru l'eka ono be unu a-nodu; enya agbarwukota unu l'iphe, unu mekotaru; mbu iphe ono, unu mekotaru gude merwushia onwunu ono; unu abya adu onwunu ashi le k'ejo-iphe ono, unu mekotaru ono. ⁴⁴ Teke mu gude g'epha mu apfuru meeru unu iphe; mbu ophu mu te ejeduru eme unu iphe g'ejo-iphe unu gbaru; ozo g'iphe, unu eme rehuberu erehu; be unube ndu Izurelu a-maru l'oo mbe-dua bu Chipfu. Nokwa iphe, Nnajiuphu, bu Chipfu epfu.' ”

⁴⁵ Tobudu iya bu; Opfu Chipfu bya akparwuta mu lehu su mu: ⁴⁶ “Nwa ndiphe; ghachi iphu l'uzo ndohali pfuaru ndu ndohali iphe, a-nwuru phe nu; li pfua iphe, e-me oswa, no lechiegu ndohali; ⁴⁷ mbu g'i pfuaru oswa, no lechiegu ndohali su: Numa iphe, Chipfu epfu! Nnajiuphu, bu Chipfu suru: Mu abyaakwa ngu atifu oku. Oku ono e-kepyashikota oshi oyii ngu; me ophu kpohuru nku. Ire-oku ono be a-buru echinyi echinyi. Iphe, bukpo onye oku ono shitaru ibe iya ophu o no; shita l'uzo ndohali; jeye l'uzo isheli be oku ono a-nma swokoswoko. ⁴⁸ Onyemonye be a-makotaru l'oo mube Chipfu be turu oku ono. A ta abyadu echinyi iya echinyi.”

⁴⁹ Tobudu iya bu; mu su: “Haa! Nnajiuphu, bu Chipfu! Ephe epfukwaru mu asuje l'oo etu etu be mu anoduje anmashi.”

Chipfu a-miru ndu Izurelu ogu-echi

21 ¹ No iya; Chipfu bya epfuru opfu yeru mu su: ² “Nwa ndiphe; gha iphu l'ibiya ke Jierusalem; pfuru nuru mu eka ono, du nso ono; pfuru nuru mu ali Izurelu; karu phe iphe, e-me nu; ³ su iya: Wakwa iphe, Chipfu epfu baa: Lenu! Mu noakwaru ngu le njo. Mu a-mifuta ogu-echi mu l'obo iya; gude gbushikota ndu pfuberekoto me ndu eme ejo-iphe l'echilabo unu. ⁴ Eshi ophu mu e-gbushi ndu pfuberekoto me ndu eme ejo-iphe; be mu a-mita ogu-echi mu; gbua iphe, bukpo nemadzu l'ophu. Mu e-shi le ndohali gbua phe jasul'isheli. ⁵ Oo ya bu ge ndiphe l'ophu amaru l'oo mube Chipfu be mifutaru ogu-echi mu l'obo iya; ophu mu ta amiphuedu iya azu ozo.

6“Oo ya bu; tsua ude; gube nwa ndiphe! Tsua ude g'onye meji akufu akufu; gude oke aphu tsua ude l'iphe phe. 7Teke epehe jiru ngu su: 'Bu gunu kparu iphe, iitsu ude?' Iphe, ii-pfuru phe bu: 'Iphe, kparu iya nu bu l'o nweru nzi, abya nu. Teke nzi ono byaerupho be meji a-gbabu-hu onyemonye; aka atsushihukota onyemonye mee. Onyemonye be ehu a-rwushihukota; ikpere be a-nodu aphukota onyemonye doridori g'akpara-mini. Lenu l'obyaakwa; mbu nzi obu. O mefutaje ememe. Nokwa iphe, Nnajiuphu, bu Chipfu epfu bu ono.' ”

8Tobudu iya bu; Opfu Chipfu byakwa akparwuta mu l'ehu; bya asu mu: 9“Nwa ndiphe; pfuaru mu phe su: Wakwa iphe, Chipfu epfu baa:

“Ogu-echi be a baakwaru
o nodu atsu nkọ;
bya ajjwa iya manu o
nodu aphu onyo!

10 A bawaru iya;
o nodu atsu nkọ g'e
gude iya gbushia
nemadzu.

E huchawaru iya ehucha;
o nodu acha vaa
vaa g'ebemu-igwe.

?Anyi a-nodu ete eswa
le mgboro-eze ke
nwa mu kangokotaru
mgboro-eze ke ndu
ozo to?

11 Ogu-echi ono be iphe,
e medoru iya bu g'e
hua ya manu;
waa g'a dzulia ya.

A baakwaru iya ababa;
huwa iya manu.

Onye mgbugbumadzu
abyaakwaa iya adzuli.

12 Nwa ndiphe; raa ekwa;
chia mkpu;
kele ogu-echi ono
bukwa ndibe mu be
ocho abya.

Oo ndu-ishi le Izurelu
be ocho abya obu.

E nwutaakwaru ndu-ishi

lẹ́ Ízurelú;
waa ndibe mu t̄a
l'ip̄hu ogu-echi.

Gberu ẹ́ka ye l'olu.

¹³ Aa-dalekwa unu.

?Bù ḡunu bẹ́ e-me m'ò
bùru lẹ́ mgb̄oro-eze ono,
kangok̄otaru ndu
òzo ono bẹ́ ta an̄edu?

Nokwa ip̄he, Nnajiup̄hu,
bù Chip̄fu ep̄fu bù ono.

¹⁴“Oo ya bù; nwa ndip̄he; p̄fuaru p̄hẹ́ ip̄he e-me n̄; k̄ua ẹ́ka k̄paa. G'e gbua ogu-echi ugbo ẹ́bo; mb̄u g'e gbua ya ugbo ẹ́to. Oo ogu-echi, ee-gude gbushia nemad̄z̄u; mb̄u ogu-echi, ee-gude ts̄ua nemad̄z̄u ọ́-t̄su-ep̄fu; bya ab̄uru ogu-echi, ee-gude ḡbaa p̄hẹ́ mgburuḡburu. ¹⁵Mu dobek̄otawaru ogu-echi, ee-gude eḡbushi p̄hẹ́ l'ònu-oguzo p̄he; k'òp̄hu bù lẹ́ mej̄i a-n̄odu at̄ofu nemad̄z̄u at̄ofu; ndu a-la l'iswi a-ha igwerigwe. Oowaa! A bakwaru ogu-echi ono; ọ́ n̄odu acha vaa vaa g'ebemu-igwe. A dzulitawaru iya g'e gude iya gbushia nemad̄z̄u. ¹⁶Ḡube ogu-echi; gbua pharamu laa l'uzo ẹ́kuta-tara! Gbukwaapho laa l'uzo ẹ́kicha! Gbujek̄p̄oep̄ho laa l'ibiya ọ́p̄hu ip̄hu ngu n̄ok̄p̄oep̄ho laa. ¹⁷Mu a-k̄uk̄wapho ẹ́ka pyaa; ẹ́hu-eḡhu mu adazeta. Oo mb̄edua, bù Chip̄fu bẹ́ ep̄fu iya n̄.”

Ogu-echi eze ndu Bábilonu

¹⁸T̄obudu iya bù; Op̄fu Chip̄fu byakwa akparwuta mu l'ẹ́hu; bya asu mu: ¹⁹“Nwa ndip̄he; mee gbororo labo, bù ẹ́ka ogu-echi eze ndu Bábilonu e-shi bap̄futa p̄hẹ́ ọ́gu; g'uzo ono buk̄otakwaru lẹ́ mk̄p̄uk̄pu lan̄u bẹ́ ẹ́p̄he a-watak̄ota. Bvube itso ip̄he-ọ́hubama l'ẹ́ka uzo ono sw̄ibaru lẹ́ mk̄p̄uk̄pu ono. ²⁰Mee uzo lan̄u lẹ́ gbororo ono g'ò b̄uru ẹ́ka ee-shi gude ogu-echi bap̄fu mk̄p̄uk̄pu Raba kẹ́ ndu Am̄onu; l'ì bya eme uzo ọ́zo g'ò b̄uru ẹ́ka ee-shi bap̄fu Jiuda; mẹ́ ẹ́ka a kp̄ushiru ike lẹ́ Jierúsalem̄u. ²¹Noo kẹ́le eze ndu Bábilonu bẹ́ e-jeta p̄furu lẹ́ mgbakata-uzo ono; mb̄u lẹ́ mgbakata-uzo labo ono. Oo-j̄iadaa ip̄he; g'ò maru ip̄he, ee-me n̄. Oo-gude ap̄f̄u t̄a ido; l'ò j̄ita nw̄obvu iya; bya elee ẹ́nya lẹ́ mej̄i an̄; g'o gude maru uzo ọ́p̄hu oo-shi. ²²Ọ́ b̄uru l'ẹ́kutara iya bẹ́ ido kẹ́ Jierúsalem̄u a-daru laa. Oo-do ip̄he, ee-gude chik̄poshia Jierúsalem̄u; l'o zia g'a wata eḡbushi nemad̄z̄u; mẹ́ g'e chia mk̄pu ọ́gu; l'a bya edoo ip̄he, ee-gude nwutsushia ọ́nu ẹ́ka eeshije abah̄u lẹ́ mk̄p̄uk̄pu ono; l'a bya ak̄oshia obvudu-ẹ́ja; bya ekep̄hee mk̄p̄uk̄pu ono ekep̄he. ²³Ndu ọ́p̄hu yẹ́ ya ḡbaru nd̄z̄u bẹ́ ọ́o-d̄u g'ò bù ip̄he, te emedu ememe; obenu l'ọ́o-nyatak̄otaru p̄hẹ́ ẹ́jo-ip̄he, ẹ́p̄he mek̄otaru; bya ak̄p̄uk̄ota p̄hẹ́ lẹ́ nd̄z̄u. ²⁴Oo ya bù lẹ́-a; wakwa ip̄he, Nnajiup̄hu, bù Chip̄fu ep̄fu baa: Eshi ọ́p̄hu unu byaru bya emewaa a mawaru g'unu

emeberu ejo-iphe; mbu k'ophu bu l'iphe-eji, unu eme be dabyiwaru eba; bya egude iphemiphe, unu emekpoo ememe egoshi ejo-iphe, unu eme; be aa-kpokota unu le ndzu.

²⁵“Oowaa! Gube onye bu ishi le Izurelu; mbu gube onye ono, merwushiwuru onwongu ono; mbu gube onye iwashi ono; o rwuakwaru teke aa-nu ngu chiipfuu; nu-rwua ngu iya l'ishi. ²⁶Wakwa iphe, Nnajiuphu, bu Chipfu epfu baa: Toshia iphe, i keru l'ishi; kpufu okpu-eze ono. O to bukwa g'iphe shi du be o dukwadu. Ndu wozetaru onwophe ali be aabya ewolia eli; ndu e woliru eli be ee-wozeta ali. ²⁷Oo mkpurupyata! Oo mkpurupyata! Mu e-me mkpokpu ono g'o buru mkpurupyata; ophu a ta abyadu akpokwabaa ya akpokwa; jeye teke onye bu iya be o gbaru k'enweru mkpokpu ono a-bya; mu eworu iya nu iya.

²⁸“Oo ya bu; nwa ndiphe; pfuaru phe iphe e-me nu; su phe: Wakwa iphe, Nnajiuphu, bu Chipfu epfu l'opfu-ehu ndu Amonu; le k'iphe-iphere, epe eme ndu Izurelu baa:

“Oo ogu-echi! Oo ogu-echi!

A mifutaakwaru ogu-echi,
ee-gude ekwoshi
nemadzu ishi.

E huchawaru iya ehucha
g'e gude iya lwua
nemadzu alwulwu;
mbu l'e mewaru iya;
g'o chaa vaa vaa
g'ebemu-igwe.

²⁹“A makwaru-a l'a phujeru unu ophulanya iphoro; bya agbajewaru unu eja, bu uka be a dzushiru unu. Iphe ono g'o ha be aa-gako nyabe ndu ejo-iphe l'olu; mbu ndu ono, ee-gude ogu-echi gbushia ono. Mbu ndu ono, mboku, aa-nu phe chiipfuu nu-rwua phe iya l'ishi rwuwaru ono.

³⁰“Mi-phi ogu-echi ono azu l'obo iya. Oo l'eka unu futaru be mu a-nodu kpee unu ikpe; mbu l'ali ndiche unu. ³¹Mu a-tukoshi unu oke ehueghu mu; mbu le mu e-kpokposhi unu oke ehueghu mu, ata-pfupfufu. Mu e-nwuru unu nu ndu emeje nemadzu l'iwe; mbu ndu bu iphe, eemebyi emebyi bu iphe, doru phe enya. ³²Unu a-buru nku, eeye l'oku. Eka aaphushi mee unu wushi bu l'echilabo ali unu. A ta abyadu anyatabaa unu ozo; noo kele oo mube Chipfu be pfuru iya nu.”

Ejo-iphe, ndu Jierusalemu eme

22 ¹Tobudu iya bu; Chipfu bya epfuru opfu yeru mu su: ²“Nwa ndiphe; ?ii-kpe iya ikpe too? Mbu; ?ii-kpe-a mkpokpu-a, bu mkpokpu mgbugbumadzu-a ikpe too? Oo ya bu; je aturu iya ebyi, oomekota jalaa. ³Su iya: Wakwa iphe, Nnajiuphu, bu Chipfu epfu baa: Gube

mkpukpu-a i gudeakwa egbu ochi seta mkpurupyata kpube onwongu l'ishi; kele iigbushi nemadzu; bya egudekwapho agwaphe obvu emerwushi onwongu.

⁴“Ikpe ndu ono, iigbushi ono nmaakwaru ngu; teme i gudewaa agwa iphe, i jetaru merwushia onwunu. I mewaru ge mboku, ii-no-beru ndzu du tsokere; mbu l'apha, ii-no-beru ndzu be rwuakwaru nu. Oo ya bu le mu e-me ngu g'i buru mkpukpu ohamoha a-noduje eme iphe ochi; mbu le mkpukpu, nonu a-noduje atu ngu uzu ochi. ⁵Gube mkpukpu, aamaru ejo eka; teme iphe, tsuru ngu epfu buru nchika-ehu; huma le ndu bu ntse; me ndu bu uzanya a-nodu achi ngu ochi; ⁶Humawaro ge ndu-ishi ngu, nogbaa ngu l'ime gude ike, ephe nweru egbushi nemadzu. ⁷Oo l'ime ngu be ephe ta agubejeedu ne le nna phe iphe. O buru l'ime ngu be ephe no kpa ndu byaru abyabya eh; bukwarupho l'ime ngu be ephe no megbuta ndu nna phe anodedu; me ndu ji phe nwushihuwaru. ⁸Iphe duru mu ns; be unu ta agubejeedu iphe. Unu wowaru eswe atuta unme mu pharwushikota. ⁹O buru l'ime ngu be ndu asu asulasu no; ndu buepho iphe, ephe eshibeje ite iya bu gephe e-me gbua nemadzu. Oo l'ime ngu be ndu ejeje eria iphe, a tushiru lagwa no; mbu lagwa, nogbaa l'ubvu ubvu ono. Ephe nmakpuru l'ime ngu apharwushi onwophe. ¹⁰Ndu ophu ephe le nyee nna phe akwaje nokwapho l'ime ngu. Ndu ophu ejepfuje unwanyi teke ephe an ns; ndu iya; mbu teke unwanyi teke aswafudu nturuwu an ns;. ¹¹Oo l'ime ngu be nwoke waa nyee nwoke ibe iya emeje ebyi. Onye ophu egude egu ejo-iphe agu iya nu pharwushia nwune nyee nwa iya; onye ophu aburu nwune iya ke nwanyi; mbu nwa, nna iya nwuru gedegede be oomerwushije. ¹²O buru l'ime ngu be ndiphe erije uphalazu ge gbua nemadzu; a nodu anataje ntukwase; bya eri uphalazu. Nemadzu nodu anataje nwibe iya iphe iya k'ehuka; gee-shi g'unu rita urwu. Teme a gbakutawaa mube Chipfu azu. Nokwa iphe, Nnajiuphu, bu Chipfu epfu bu ono.

¹³“Lenu; mu egbukwaru ngu eka swikiswiki; k'urwu ono, i ritaru l'uzo apfuduru-oto ono; me k'ochi, eegbugbabe l'ime ngu ono. ¹⁴?Obu e-shihu ngu-a ike? Mbu; ?eka e-shihu ngu-a ike mboku, ono mu a-da ngu eka ke nj; lehu ono? O kwa mube Chipfu pfuru iya; mu je l'e-me iya. ¹⁵Mu a-chikashi ngu mee gephe tuko ohamoha dzuru. Mu ezekaa phe gephe lachaa mkpukpu le mkpukpu ozo. Mu emee g'emewushi ono, i merwushiru onwongu ono buru bugemu. ¹⁶I -buerupho mkpukpu, rwushihuru arwushihu lenya ohamoha ono; be ii-macharu-a l'oo mbedua bu Chipfu.”

¹⁷Tobudu iya bu; Chipfu byakwa epfuru yeru mu su: ¹⁸“Nwa ndiphe; ndu izurelu be dukwaa mu g'iphe, gbaru egba. Mbu l'ephe dukota g'ope; me ogbongu; me iphe-igwe; me mkpuma ota-njele, kwaru l'oku uzu. Iphe, ephe buepho be bu egba mkpola-ochaa. ¹⁹Oo ya bu; wakwa iphe, Nnajiuphu, bu Chipfu epfu baa: Eshi ophu unu bukotawaa egba mkpola-ochaa;

bè mu e-kpota unu kpokòbè lẹ Jierúsalemú. ²⁰Mbù l'òo ẹgube eekpokòbè-je m̀kpòl̀a-òchaa; m̀ẹ onyirubvu; m̀ẹ iphe-ìgwè; m̀ẹ m̀kpuma-òta-njele; m̀ẹ ogbongu chíru ye l'òku ọ̀zú g'ò dazee ya-a; b̀ù g̀ẹ mu e-gude ẹhu-eghu mu; m̀ẹ oke ẹhu-eghu mu rwukòta unu je achíru dobe lẹ m̀kp̀uk̀pu ono; wo-ru unu dazee adaze. ²¹Mu e-rwukòbè unu; kpukposhi unu oke ẹhu-eghu mu, ata pfupfufu ono; l'ò kee unu; unu azashíhukota azashíhu. ²²Òo ẹgube m̀kpòl̀a-òchaa, adazehu je l'òku ọ̀zú-a; b̀ù g'unu a-nòdu l'ime m̀kp̀uk̀pu ono dazehu. Ọo ya b̀ù g'unu amakwaǹuru l'òo m̀b̀edua, b̀ù Chipfu b̀ẹ tukoshiru unu oke ẹhu-eghu mu.”

²³Tòbudu iya b̀ù; Chipfu bya epfuru opfu yeru mu ọ̀zo sù: ²⁴“Nwa ndiphe; s̀ù alí ono-a: I b̀ù alí, e teke at̀urwudu ẹjo-iphe, nò iya nù; ọ̀phu mini edzeduru kpua ya lẹ m̀b̀òku oke-ẹhu-eghu mu ono. ²⁵Ndu mpfuchiru Chileke, nò l'ime m̀kp̀uk̀pu ono b̀ẹ achíru m̀kp̀uk̀pu ono ẹjo idzu; g'oduma, aba hanyíhanyi alajashí anù, o gburu. Ẹphe egbushije nemadzu; nakoo ẹku; m̀ẹ iphe, vugbaa oke aswa. Ẹphe mewaa; g'unwanyi, jì phẹ anòedu paa ẹka l'ime m̀kp̀uk̀pu ono. ²⁶Ndu-uke, nò lẹ m̀kp̀uk̀pu ono b̀ẹ kpakashíwaru ekemu mu; t̀uko iphe mu, d̀ù nsò merwushikòta emerwushi. Ẹphe ta akpajèdu oke l'iphe, d̀ù nsò; yẹ iphe mmanù ọ̀zo. Ẹphe anòduje ezi nemadzu l'ò to nwedú iphe, d̀ù iche l'iphe, aasò nsò; yẹ iphe, a ta sòdu nsò. Ẹphe wowaru ẹnya nmanyíbe; ọ̀phu ẹphe ta akpajèdu ishi k'eme eswe-at̀uta-unme mu g'ò d̀ù nsò. A nòdu anòduje epfutoshi ẹpha mu l'echilabò phẹ. ²⁷Ndu b̀ù ndu-ishi lẹ m̀kp̀uk̀pu ono b̀ẹ d̀uepho g'ẹjo-nk̀uta-òswa, alajashije anù, o gburu. Ẹphe egbu ọ̀chi; mb̀ù egbushi nemadzu g'ee-shi g'ẹphe rita urwu l'ọ̀zo, apfuduru-oto. ²⁸Ndu mpfuchiru Chileke, nò lẹ m̀kp̀uk̀pu ono b̀ẹ e-gude ọ̀phulenyà ọ̀ghoshi yẹle agbarù phẹ ẹja, b̀ù-kota ọ̀ka; kpachia ẹjo-iphe, ndu ono eme akpachi. Ẹphe asuje: Nnajiuphu, b̀ù Chipfu s̀uru-a l'ẹba ab̀ù l'ò nweru iphe, Chipfu pfuru. ²⁹Ndu alí ono b̀ẹ akpapyà nemadzu ishi; bya ana nfù. Ẹphe akpa ndu ọ̀kpa; m̀ẹ ndu adudu g'ò d̀ù phẹ ẹhu; bya eme ndu b̀ù mbyambya ewere; ọ̀phu ẹphe emejeduru phẹ iphe, gbaru g'e meeru phẹ iya. ³⁰Mu bya elee ẹnya nemadzu l'echilabò phẹ, b̀ù onye a-kp̀uk̀wa igbulò ono; mb̀ù onye a-pfuru lẹ mgbaka onye l'ẹphe l'alí ono; g̀ẹ mu te emebyishi iya; ọ̀phu ọ̀ t̀ò dudu onye mu humaru. ³¹Ọo ya b̀ù; mu tukoshi phẹ oke ẹhu-eghu mu; gude ẹhu-eghu mu, ata pfupfufu kepyashí phẹ; mb̀ù woru iphe ono, ẹphe mekòtaru ono byabẹ phẹ l'ishi. Nokwa iphe, Nnajiuphu, b̀ù Chipfu epfu b̀ù ono!”

Unwune labò, eri ogori

23 ¹Tòbudu iya b̀ù; Chipfu bya epfuru opfu yeru mu ọ̀zo; bya asù mu: ²“Nwa ndiphe; o nweru unwanyi labò, b̀ù ne lanù nwuru phẹ. ³Ẹphe wata agba ọ̀kpara lẹ Ijiputu; mb̀ù l'ẹphe shíro teke ẹphe b̀ù nwata gbata ọ̀kpara. Ọ̀ b̀uru l'ẹka ono b̀ẹ ẹphe nò a nòdu anòduje apyítóshi phẹ ẹra; mb̀ù l'òo l'ẹka ono b̀ẹ ẹphe anòduje l'arwaphe phẹ ẹka l'ehe

ono, akwòkwadu buruburu ono. ⁴Èpha onye k'ògerenya bẹ bụ Ohola. Èpha nwune iya nwanyị buru Oholiba. Èphe bụ ndibe mu. Èphe nwùshia ùnwegirima unwoke; mę ùnwegirima ùnwanyi. Ohola bẹ bụ Samériya. Oholiba buru Jierúsalemu.

⁵“Ohola wataruro agba ùkpara teke ọ bụkwadu nkemu. Ọ wataru awu-ko ndu o yeru obu; mbụ ndu ọ-lwua-olaa shi lẹ Asiriya. ⁶Ndu ono yekotaru uwe, dọ urwukpu-urwukpu; mę ndu bụ ndu eze; mę ndu-ishi. Èphe bụkota ùnwokorobya, amagbaa ntumatu; bụkotaru ndu agba l'inya; nòdugbaa l'eli inya pẹ. ⁷O woru onwiya mee nwanyị-ùkpara unwoke ndu Asiriya; mbụ ndu ọphu nweru ęnya. O gude agwa ndu ọowu-ko ono merwushia onwiya. ⁸Ọphu ọ haduru agba ùkpara ono, o shi lẹ Ijiputu gbata ono. Ọ buro teke ọ bụ nwata bẹ yele unwoke wataru akwakwa. Èphe nọdu anọduje arwa iya ẹka l'ehe ono, akwòkwadu buruburu ono; agboshi iphe ekpu iya. ⁹Tòbudu iya bụ; mu bya enwuru iya ye l'ẹka ndu o yeru obu ono, bụ iya bụ ndu Asiriya; mbụ ndu ono, agụ iya ẹgu ono. ¹⁰Èphe gbabẹ iya ọto; kpua ùnwu iya unwoke mę ùnwanyi lẹ ndzụ; bya egude ogu-echi pua yebedua teerii. Ọo ya bụ; ọ buru onye ùnwanyi gude nmaahaa l'ẹjo ẹtu; kele ọo iphe, gbaru iya nù bẹ e meru iya.

¹¹“Nwune iya nwanyị, bụ Oholiba humachakwaa iphe ono; ẹgu ẹjo iphe nkiya gbekporo kabaa kẹ nwune iya njo; mbụ l'ọ gbẹ ka nwune iya agba ùkpara obu. ¹²Ọ nọdu awukokwapho ndu obutobu pẹ, bụ ndu Asiriya; mbụ ndu bụgbaa eze; mę ndu-ishi mkpukpu pẹ; mę ndu ojogu pẹ, kwaru onwophe ngwa; degegbaru l'eli inya; bụkotaru unwokoro, amagbaa ntumatu. ¹³Mu bya ahuma l'o merwushifwaru onwiya. Èphenebo ono tukowaa buru ndu umere pẹ rehuru erehu.

¹⁴“Yebedua bẹ kwataru akwata yemibaa ishi eyemi l'ùkpara obu. Ọ humaru unwoke, e seru l'igbulọ; mbụ ndu Babilonu, e gude penti uswe-uswe see; ¹⁵mbụ ndu e seru èphe kebegbaa akpo l'upfu; kebechaa ẹkwa, ekpo pẹ wiyawiya l'ishi. G'èphe ha bẹ dukotaephe gẹ ndu-ishi ugbo-inya ndu Babilonu; mbụ ndu shi mkpukpu Kaludiya. ¹⁶Ahuma, ọhuma pẹ; èphe wata iya agụ ẹgu. O yefu ndu-ozì g'èphe je ezia pẹ ozi l'alì Babilonu. ¹⁷Tòbudu iya bụ; ndu Babilonu byapfuta iya; g'èphe l'iya wata akwakwa. Èphe gude ẹgu nwanyị agụ pẹ nù pharwushia ya. E merwushichae ya pho ono; èphe bya adu iya ashi; ọ gbakuta pẹ azu. ¹⁸Teke ono, ọ gbaaharu ùkpara ono; bya agbagbukporu ọto tua onwiya jalaa ono; bẹ mu gude ẹhu-eghu gbakuta iya azu; ẹgube mu gbakutaru nwune iya. ¹⁹Ọle ọ gbẹ kabaa eyeru ẹhu l'agba ùkpara obu; g'ọ nyataru g'ọ shi agba iya lẹ teke ọ bụ nwata nọdu lẹ Ijiputu. ²⁰O shi nọdu l'ẹka ono awu-ko ndu o yeru obu; mbụ ndu ẹhu-nwoke pẹ dukota gẹ kẹ nkafu-igara; bya aburu ndu ùnwuda pẹ dọ gẹ k'inya. ²¹Ọo ya bụ l'egu ẹjo-iphe ono, i shi anọduje eme teke i bụ nwata lẹ Ijiputu ono bẹ anọduje agukwadu ngu; mbụ teke ono, e shi anọduje arwaphe ngu ẹka l'ehe; apyikashi ngu ẹka l'opu era ngu ono.”

22 “Gube Oholiba; wakwa iphe, Nnajiuphu, bu Chipfu epfuru ngu baa: Mu a-kpali ndu ono, i yeru obu ono; mbu ndu ono byawaru adu ngu ashi nta-a ono; g'ephe ghakobe buru ohogu ngu. Mu e-me g'ephe shi lekameka wufuta tsoahaa ngu opfu; 23 mbu ndu Babilonu; me ndu Kaludiya; me ndu Pekodu; me ndu Showa; me ndu Kowa; ephe le ndu Asiriya l'ophu. Ephe a-bukotaru unwokorobya, amakota ntumatu; bugbaaru ndu eze; me ndu-ishi mkpukpu; me ndu-ishi ugbo-inya; me ndu nogbaa l'oke okwa; bya aburu ndu nogbaa leli inya. 24 Ephe e-gude ngwogu; me ugbo-inya du l'iche l'iche; bya achiru igwe oha bapfuta ngu. Ephe a-nodukota lekameka kwaberu ngu k'ogu. Ephe a-chiru iphe, e gudeje ezeru onwonye keze iya me ke nshi; bya ekpukotaru okpu, e meru l'igwe. Mu e-nwuta ngu nwuru nu phe g'ephe na ngu aphu; mbu g'ephe mee ngu egube o du phe ree. 25 Mu e-gude okophoo mu; mee ngu umerekete. Ephe e-befu ngu imi waa nchi. Ndu ophu phoduru l'ime ngu be ee-gude oguechi gbushia. Ephe akpu unwu ngu unwoke me unwada ngu le ndzu. Ndu ophu phodufuaru l'ime ngu bu oku e-tsu phe. 26 Ephe e-yeshikotakwa ngu pho uwe, i yeru lehu; natachaa ngu iyagba, ama mma, i nwekotaru. 27 Mu e-me g'ebyi, iime; me ukpara ono, i shi le Ijiputu gbata ono laa nlanan. I ti byadu anyatabaa ya; ke go gua ngu egu ozo; ophu i ti byadu anyatabaa Ijiputu ozo.”

28 “Mbu le-a; wakwa iphe, Nnajiuphu, bu Chipfu epfu baa: Mu abyaakwaa ngu enwuru ye leka ndu du ngu ashi; mbu leka ndu ono, i gbakutawaru azu; kele ephe duwaa ngu eji ono. 29 Ephe e-gude ndumashi tukokpoo iphe, i seru akanya iya nata ngu. Ephe a-gbabe ngu oto; i dabyiru egube ono. Ukpara ono, iigba ono be e-meru iphere iya kpua ngu le sagaa. Ejo-ememe ngu ono; me ukpara, iigba ono; 30 be bu iya meru g'iphe ono dapfuta ngu; kele i wataru awu-ko ohamoha, nonu; bya egude agwa phe merwushia onwongu. 31 I tsowaru uzo, nwune ngu nwanyi tso-ru. Mu a-pakwanuru okoro iphe-ehuka iya dee ngu leka.”

32 Wakwa iphe, Nnajiuphu,

bu Chipfu epfu baa:

“Ii-ngu iphe l'okoro ono,

nwune ngu nwanyi

nguru;

mbu l'okoro ono,

ha ke galagala;

bya adu omilomi ono.

Aa-chi ngu ochi;

bya eme ngu ujikputeru;

kele iphe no l'okoro

ono be jiru ke pyimu.

33 Ii-je iphe-ehuka jasuru

l'òotsuahaa ngu
 atsutsu gẹ mee.
 Ọ bụru mkpurupyata
 waa ọla-l'iswi bẹ
 ịi-ngụ nno.
 Ono bụru iphe,
 nwune ngu nwanyi,
 bụ Samériya nguru
 nguphodoru ngu.
 34 Ịi-ngụ iya;
 ngu-gbua gberegedege.
 Li tukposhia ya yegiri
 yegiri;
 bya alabashia onwongu
 era alabashi.
 Mu pfuakwaru nkemu.
 Nokwa iphe, Nnajiuphu,
 bụ Chipfu epfu bụ ono.”

35 Ọo ya bụ ọ-a; wakwa iphe, Nnajiuphu, bụ Chipfu epfu baa: “Eshi
 ọphu ị zohawaru mbedua; woru mu ịicha l'okotazu; bẹ ejo-ememe ono,
 iime ono; mę ukpara ono, ịgba ono bẹ ii-ritakota urwu iya.”

36 Tọbudu iya bụ; Chipfu sụ mu: “Nwa ndiphe; ?ii-kpe Ohola yee Oho-
 liba ikpe ọo? Ngwanu; karu phe ebyi, epe emegbabe; 37 mbu l'ephe bụ
 ndu eri ogori; egbu ọchi. Epe gudewaa agwa, epe gwotaru merwushia
 onwophe. Epe nodu egudeje unwu, epe nwushiru mu tua utara l'agwa
 phe. 38 Waa iphe, epe mekwaru mu pho bụ ọwa: Ọ teke onokwaphe bẹ
 epe merwushiru eka duru mu nsọ; bya emebyishikota eswe-atuta unme
 mu. 39 Ọo ọ mboku ono, epe gude unwu phe gwee eja nu agwa phe ono;
 bẹ epe bahuru l'eka duru mu nsọ ono; woru iya merwushia. Noo iphe,
 epe meru l'ulo mu bụ ono.

40 “I zicharu ozi g'e zia ndu shi uto enya g'ephe byachaa; epe wuru
 bya. Ọ bụru ndu ono bẹ ị sacharu onwongu degeberu; ị bya etee iphe
 l'enya; bya egude iyagba memaa onwongu emema kwaberu phe. 41 Ị bya
 asugaru l'aba, amashi mma ike. A bya eworu teburu dobe ngu l'iphu. Ị
 chita unwu-isensu mę manu mu tukobe l'eli iya. 42 Ikpoto nemadzu, bu-
 gbaa idokpamkpata nodu akwa evu ekpu iya. E duta ndu shi l'echiegu,
 ngu-jishiru mee epho epe bya; waa ndu ozo yee epe swi. Epe bya
 agbabe iya mgbaleka; kpube iya okpu, ama ntumatu. 43 Noo ya bụ; mu sụ
 g'ephe duta yebedua ono, gbawaru ukpara jasụ o kpojohu ono; g'ephe l'iya
 wata eri ogori kele o buwaa nwanyi-ukpara. 44 Ọo ya bụ; epe jepfuahaa
 phe egube ono ejepfufe nwanyi-ukpara ono. Mbu epe jepfuahaa Ohola
 yee Oholiba; phaahaa unwanyi ono kutukutu. 45 Ndu e-kpe phe ikpe bụ

unwoke p̄f̄beru-eka-oto Ephe a-nma p̄h̄e ikpe ogori; waa ikpe ochi. Noo kele ephe eri ogori; bya aburu ndu egbu ochi.”

⁴⁶Wakwa iphe, Nnajiuphu, bu Chipfu epfu baa: “G'a chita ikpoto nema-dzu bapfuta p̄h̄e; mbu g'e nwuru p̄h̄e nu ndu e-me ge ndzu-agugu rwuta p̄h̄e; bya atuko iphe p̄h̄e kwa l'okwata. ⁴⁷Igwe-oha ono a-tu p̄h̄e mkpuma; bya egude ogu-echi egbutsushi p̄h̄e. Ephe e-gbushichaa unwu p̄h̄e unwoke me unwada p̄h̄e; bya atseshia oku l'ulo p̄h̄e. ⁴⁸Noo ge mu e-shi mee g'emewushi onwonye laa nlanu l'ali-a bu ono; k'ophu unwanyi l'ophu e-gudekwanu iya kwaa enya; g'ephe te eje eme egube ono, unu meru ono. ⁴⁹Aa-gwata unu ugwo emewushi ono, unu emewushi onwunu ono. Unu e-vuta ejo-iphe o nwutaru unu; mbu nshi ono unu agwo ono. Oo ya bu; g'unu amakwanuru l'oo mbedua, bu Nnajiuphu bu Chipfu.”

Etu, e gude ite, e shiberu l'oku nmaa

24 ¹Tobudu iya bu; o be l'apha ke tete g'onwa iri du l'abali iri; Chipfu bya epfuru opfu yeru mu su: ²“Nwa ndiphe; dee iphe ntanu-a bu l'ekwo; mbu ntanu-a gedegede; kele oo ntanu-a gedegede be eze ndu Babilonu kephetaru Jierusalemu k'ogu. ³Nmaaru ndu ono, bu ekwegekwe ono etu; su p̄h̄e: Wakwa iphe, Nnajiuphu, bu Chipfu epfu baa:

“ Shibe ite; shibe iya

l'oku kuru mini ye iya!

⁴ Chiru mkpirikpu

mkpirikpu anu ye iya;

mbu ndu ophu a

hotaru ahota;

utapfu iya;

me upfumeka iya;

mbu-a woru aka

kachaa aburu okpobe

anu chi-jia ya achi-ji.

⁵ Li kpota aturu,

kachakpo ree gbua;

chiru anu iya ye l'ohu

ite ono;

shighee anu ono eshighe.

Shighee yee okpu iya

eshighee.

⁶“ Oo ya bu le-a; wakwa iphe, Nnajiuphu, bu Chipfu epfu baa: Nshio gube mkpukpu ono, egbu ochi ono! Nshio ite ono, gbawaru egba ono; mbu ite ono, egba iya tee hefuedu ehofu ono. Gushia anu ono nanu nanu; g'o to dukwa ophu aa-ha g'o phodu. ⁷Kele mee ndu o gbushikotaru be yee ya tukowaru nmakuru l'eli mkpuma; o to wushiduru iya l'oma ali

ẹka urwuku gege ekpochikpoo ya nu. ⁸Oo ge mee ndu ono akpalia mu ẹhu-eghu; k'ophu mu a-bya agwata iya ugwo iphe, o meru kparu iphe, mu doberu mee ndu ono l'eli mkpuma; g'o to du iphe, e-kpochi iya eja.

⁹“Oo ya bu le-a; wakwa iphe, Nnajiuphu, bu Chipfu epfu baa: Nshio gube mkpukpu ono, egbu ochi ono! Mbedua e-yebakwaro nku l'oku obu g'o kabaa shii. ¹⁰Mu a-kube nku ono g'o ha l'ikpo l'ikpo.

“Mu eworu oku zunwua ya.

Gude iya shighee anu
ono eshighee.

Mu eyekobechaa ya iphe,
emeje g'iphe shi mkpo.

Mu eshia ya g'okpu iya
kpebatachaa uke
ekpebata.

¹¹“Li bya agbe teke ono shikwasẹ ite iphoro ono l'eli ovokoku ono; shia ya gbiriri jeye oku adu l'ite ono shii; mbu shia ya g'onirubvu, e gude mee ya chaa ziri; k'ophu inyi, no iya nu a-dazehu; mbu gegba, o gbaru ono kee oku gbiriri jasi ookechafu. ¹²Noo kele e mewaru iya jasi ike labo bu; ophu egba, o gbaru ono ekwedu eheshihu. Nta-a be oku e-ke egba ono, o gbaru ono. ¹³Iphe, bu inyi ono, du ngu lehu ono be bu urwuali. Eshi ophu mu mekotaru ge mu e-me hufu ngu inyi ono; ophu o kwedu ge mu hufu ngu iya; be a ta abyadu ehufubaa ngu iya jasi teke mu e-gude oke ehuh-eghu mu mee ngu g'o du mu. ¹⁴Oo mube Chipfu pfuru opfu ono. O rwuakwaru teke mu e-me iya. Mu ta abyadu esela onwomu azu; ophu mu abyadu aphu obu-imemini; ophu mu ta abyadu asu le mu tee meedu ge mu tuseru. Ee-kpe ngu ikpe g'umere ngu waa iphe, iime gbaru. Nokwa iphe, Nnajiuphu, bu Chipfu epfu bu ono.”

Anwuhu Nye Ezekelu

¹⁵Tobudu iya bu; Chipfu bya pfuru opfu yeru mu su: ¹⁶“Nwa ndiphe; mu abyaakwa egude onu echachi lanu nyichata ngu onye ono, i yeru enya ono. O le-a; ba agukwa aphu; ophu i rakwa ekwa; mbu g'enya-mini ta alwafutakwa ngu lenya. ¹⁷Tokepoephe nwehu tsu ude. Ta kwashikwaru onye nwuhuru anwuhu enya-mini. Kee iphe, iikeje l'ishi egube iikeje iya; l'i yee akpoka ngu. Te ekechikwa iphe lonu; ophu i rikwa nri, ndu aphu tsoru erije.”

¹⁸Oo ya bu; mu pferu ndu ono opfu ono l'utsu; o be l'uzenyashi; nyee mu nwuhu. O be le nchitabohu iya; mu bya emekota egube ono, a suru ge mu mee ono. ¹⁹Tobudu iya bu; ndu ono bya aja mu su: “?Tii kaduru anyi iphe, iphe-a, iimegbabe-a bu lehu anyi?”

²⁰Tobudu iya bu; mu su phe le Chipfu pfuru mu su-a; ²¹ge mu su ndu Izurelu: “Wakwa iphe, Nnajiuphu, bu Chipfu epfu baa: Mu abyaakwa

eme ẹka-dụ-nso mu g'ọ tọ dūhe nso; mbụ ẹka ono, a kpuru o shihu ike, bụ ẹka unu gude eku onwunu ono; mbụ ẹka ono, unu yeru ẹnya ono; bya aburu ẹka ono, dū unu ree ono. Ẹnwu unu unwoke mē Ẹnwu unu Ẹnwanyi, bụ ndu ophu unu haru l'azụ; bē bụ ogu-echi bē ee-gude gbushia phe. ²²Oo ẹgube ono, mu meru ono bē unu e-mekota. Unu tee kechidu iphe l'onu; ophu unu eridu nri, ndu nọ l'aphu erije. ²³Unu e-kebe iphe l'ishi ẹgube unu ekejehawa iya; yee akpokpa unu. Unu taa agudu aphu; ophu unu taa aradu ẹkwa; ole unu a-jo ẹhu bvube l'opfu ejo-iphe ono, unu meru ono; mbụ l'unu a-nodu atsụ ude l'ime onwunu. ²⁴Ezekẹlu a-buru unu iphe-ohubama. Iphe ono, o mekotaru ono bē unu e-mekota. Teke iphe ono nwuerupho; unu amaru l'oo mbedua, bụ Nnajiuphu bụ Chipfu.

²⁵“A bya lẹ gubedua; nwa ndiphe; mboku ono, mu a-nafu phe ẹka ono, a kpushiru ike ono, bụ ẹka ephe gude ẹhu-utso iya eku onwophe ono; mbụ ẹka ephe yeru ẹnya ono; bya aburu ẹka dū phe ree l'obu ono; mbụ mboku ono, mu a-nafu phe Ẹnwu phe unwoke mē Ẹnwu phe Ẹnwanyi ono; ²⁶bē onye nahuru gbalaa; a-byapfuta ngu bya edooru ngu iphe emenu. ²⁷O buru mboku ono bē ii-bebe kuhaa onu ngu; gu l'onye ono nahuru nū ono epfugba opfu; i ti bueduru onye te epfudu opfu ozo. Oo ya bụ; l'i buru phe iphe-otube-nvo. Ephe a-maru-a l'oo mbedua bē bụ Chipfu.”

Eepfu iphe, e-me ndu Amonu

25 ¹Tobudu iya bụ; Chipfu bya epfuru opfu yeru mu sụ: ²“Nwa ndiphe; ghachiru ndu Amonu iphu; pfuchiru mu; karu phe iphe, e-me phe nū. ³Su phe lẹ-a: ‘Unu numakwa iphe, Nnajiuphu, bụ Chipfu epfu. Wakwa iphe, Nnajiuphu, bụ Chipfu epfu baa: Eshi ophu i teru ẹswa kpua ulo mu, dū nso; teke e merwushiru iya; teme o nodu atso ngu utso l'e meru ali Izurelu; o buru ochobu; waa l'a kpuru ndu Jiuda lẹ ndzu laa ali ozo; ⁴bē mu e-nwuru ngu nū ndu ọzo ẹnyanwu-awawa g'ephe nworu ngu. Ephe a-bya anodu l'ime ngu nwechaaru ali-eze ali-eze; bugbaaru eburu l'ime ngu. Ephe e-ri akpuru oshi ngu; ngua mini era-eswi ngu. ⁵Mu e-me mkpukpu Raba g'ọ buru ẹka inya-kamelu akpaje nri. Mu emee ali ndu Amonu g'ọ buru ẹka aturu a-dojeru atuta unme. Oo ya bụ g'unu amakwanuru l'oo mu bụ Chipfu.

⁶“Lẹ-a; wakwa iphe, Nnajiuphu, bụ Chipfu epfu baa: Eshi ophu i kuru ẹka pyaa; tee ebvu; gudekota ejo obu teru ẹswa kpua ndu Izurelu; ⁷bē mu a-machi ẹka; bya adaa ngu ẹka kẹ njo l'ẹhu. Mu e-nwuru ngu nugbaa ohamoha, nonu g'ephe lwua ngu alwulwu. Mu e-dekufu ngu l'iphe, bụ oha, nonu; mee ngu l'i chihu l'iphe, bụ mkpukpu nonu; mbụ mee ngu g'i buru mkpurupyata. Oo ya bụ g'ii-maru l'oo mu bụ Chipfu.’”

Iphe, ee-me ndu Mowabu

⁸Wakwa iphe, Nnajiuphu, bụ Chipfu pfuru baa: “Eshi ophu Mowabu waa Siye suru ‘Lekpodapho; ndu onu-ulo Jiuda bē dukwaa gē ndu

ohamoha ozo'; ⁹be mu e-me g'ibiya ke Mowabu ono gheru onu; e -shi le mkpukpu ndu ophu no l'iphu egu, bu iya bu eka kakota ree l'ali ono; mbu e -shi le mkpukpu Betu-Jieshimotu; me Belu-Meyonu; me Kiriyatayimu. ¹⁰Mu e-nwuru Mowabu yeke ndu Amonu nu ndu uzo enyanwu-awawa; g'ephe nworu; ophu a ta abyadu anyatabaa ndu Amonu anyata ophu l'echilabo ohamoha. ¹¹Mu anu ndu Mowabu aphu. Oo ya bu g'ephe amakwanuru loo mbedua bu Chipfu."

Iphe, ee-me ndu Edomu

¹²Wakwa iphe, Nnajiuphu, bu Chipfu epfu baa: "Eshi ophu ndu Edomu gwataru ndu Jiuda ugwo iphe; be ephe shiakwa l'ugwo iphe ono, ephe gwataru ono meswee; k'ophu paru eka. ¹³Oo ya bu le-a; wakwa iphe, Nnajiuphu, bu Chipfu epfu baa: Mu a-machi eka gude ke njo daa Edomu eka l'ehu. Mu e-gbushi unwoke; me eku, no iya nu. Mu emee ya g'o buru ochobu. A -gbu le mkpukpu Temanu rwua le mkpukpu Dedanu be bu ogu-echi be ee-gude gbushia phe. ¹⁴Mu e-gude ndibe mu, bu ndu Izurelu gwata ndu Edomu ugwo iphe ono, ephe meru ono. Ephe e-me ndu Edomu googhu mu; mbu mee phe goke ehu-eghu mu gude habe mu l'ehu. Oo ya bu g'ephe amakwanuru loo mbedua agwa phe ugwo iya. Nokwa iphe, Nnajiuphu, bu Chipfu epfu."

Iphe, ee-me ndu Filisitayinu

¹⁵Wakwa iphe, Nnajiuphu, bu Chipfu epfu baa: "Eshi ophu ndu Filisitayinu gudewaa ejo obu melata; mbu gwata ugwo iphe; bya egude kele ndu Jiuda shiro teke k'ichee du phe ashi; eme g'ephe mee phe g'ephe buru mkpurupyata; ¹⁶be wakwa iphe, Nnajiuphu, bu Chipfu epfu baa: Mu a-machi eka ke njo daa ndu Filisitayinu l'ehu. Mu eme ge ndu Kereti chihu; mee ndu ophu phoduru nu, bu le mgboru eze-enyimu g'ephe buru mkpurupyata. ¹⁷Mu a-kwatakpo akwata gwata phe ugwo iphe, ephe meru; mbu gude oke ehu-eghu mu nu phe aphu. Oo ya bu g'ephe amakwanuru loo mbedua bu Chipfu; le teke mu agwata phe ugwo iphe, ephe meru ono."

Iphe, ee-me mkpukpu Taya

26 ¹Tobudu iya bu; o be l'apha k'iri le nanu; le mboku mbu lonwa onoya; Chipfu bya epfuru opfu yeru mu su. ²"Nwa ndiphe; eshi ophu ndu Taya ekweru ndu Jierusalemu une asuje phe: 'Hee!' Eka ono, iphe, bu ohamoha eshije eje azu aswa ono be dakposhihuwaru nu. Mgbo, e yeru iya be guhachawaru gheru onu; ge mu eshije iya g'o du mu. Nta-a, mkpukpu ono dakposhihuwaru-a be buwaa g'iphe bya ejeaaru mu le ree. ³"Oo ya bu le-a; wakwa iphe, Nnajiuphu, bu Chipfu epfu baa: Gube mkpukpu Taya; mu noakwaru ngu le njo. Mu a-chita oha, du igwerigwe

g'ephe bapfuta ngu; mbu l'oo egube ono, eze-enyimu enwutaje akparamini ke gbukumu-a; bu ge mu e-nwuta phe; g'ephe byapfuta ngu. ⁴Ephe e-tsukposhi igbulo, e gude kpu-buta mkpukpu Taya; bya enwukposhikota ulo-eli, no iya nu. Mu e-kwochatachaa eja mkpokpo-ulo ono; bya emee aka ono go buru mkpuma mmanu be a-nodu iya nu. ⁵Taya a-buru phere-re-ali no lechi eze-enyimu; buru aka aa-noduje asusa ugbu-ikokoro phe go korohu. Mkpukpu ono a-buru iphe, ohamoha a-lwu alwulwu. Nokwa iphe, Nnajiuphu, bu Chipfu epfu.” ⁶Ndu ophu bugbaa l'ime egu be ee-gude ogu-echi gbushia. Oo ya bu g'ephe amakwanuru l'oo mbedua be bu Chipfu.

⁷“Wakwa iphe, Nnajiuphu, bu Chipfu epfu baa: Oo Nebukadineza, bu eze ndu Babilonu, bu eze, ka ndu eze; mbu onye ono, shi l'uzo isheli; be mu e-me go dapfu ndu Taya. Oo-chita inya; me ugbo-inya; me ndu agba l'inya; me igwerigwe ndu ojogu gude bya. ⁸Oo-gude ogu-echi gbushikota ndu ophu bu l'ime egu. O bvua ose-ogu gude kepheta ngu; bya akpo obvudu-eja go nodu kpa oronmono jasul'igbulo ngu. Oo-pali iphe, eegudeje egbobuta onwonye; gude tsoo ngu ugu. ⁹Oo-nodu asu okurukpo, eegudeje akukposhi ulo l'igbulo mkpukpu ngu ke pfuu. Oo-gude ngwogu iya nwukposhia ulo-eli ngu. ¹⁰Inya, oo-chiru a-duta-be igwerigwe; k'ophu bu l'udzu, ephe gude okpa ekpokashi be e-lichaa ndibe ngu mkpachi. Igbulo, e gude kpu-buta mkpukpu ngu ono be a-nodu ete nmenmenme; l'igiji, ephe a-nodu ede; mbu ndu agba l'inya; me ikpoto ugbo-inya, oochi teke ono, oo-shi l'oguzo unu abata ono; mbu g'onye abahu le mkpukpu, e nwukpofuru igbulo iya enwukpofu. ¹¹Uyi-okpa inya iya ono be a-zokota gbororo, no l'ime ngu tolitoli. Oo-gude ogu-echi gbushia ndibe ngu. Itso ngu, shihuru ike a-ngashihuchaa buru memeeje l'ali. ¹²Ephe a-lwu eku ngu alwulwu; gwee ngwaswa ngu tutua. Ephe e-nwukposhikota igbulo, e gude kpu-buta ngu; nwutsushikota ulo no l'ime ngu, e meru o nodu ama mma; bya evukoo mkpuma ngu me oshi ngu; mekpoo mkpokpo-ulo ngu; je enwuru ye leze-enyimu. ¹³Mu e-me gebvu ono, i guje ono buru nyonyoronyo. Ebvu ono, i gudeje une akpo ono be a ta abyadu anumbaa ozo. ¹⁴Mu e-me ali ngu go buru mkpuma mmanu bu iphe, a-nodu iya nu; li buru aka aa-tusaje ugbu, e gude egbu ema go korohu; ophu a ta abyadu akpukwaba ngu akpukwa; kele oo mube Chipfu pfuru iya. Nokwa iphe, Nnajiuphu, bu Chipfu epfu bu ono.”

¹⁵Wakwa iphe, Nnajiuphu, bu Chipfu epfuru mkpukpu Taya baa: ?O du ngu g'ali, nokota l'aguga eze-enyimu taa nmakotadu jijijijii le teke ii-da; mbu le teke ono, ndu e mekagbaaru iphe a-nodu atsu ude ono; mbu teke ono ee-gbushi nemadzu l'ime ngu ono? ¹⁶O buru teke ono be ndu-ishi, bugba l'aguga eze-enyimu e-nyizetakota l'aba-eze phe; bya eyeshikota akpawuru-uwe phe. Ephe e-yeshikota uwe phe, e mengashiru o nodu ama mma ono. Ndu-agugu e-rwuta phe. Ephe agwodoshihu l'oma ali mmanu;

anmagbaa pyaapyaapya tekenteke; l'ọ kpọ pẹ ọnu-opfu; mbụ iphe bya-pfutaru ngu nụ. ¹⁷Ephe erwuaru unu erwubvu sụ:

“Egube g'e mekwanuru i
buru mkpurupyata;
gube ohamoha ono,
a maru amaru ono;
mbụ gube oha,
okpehu shi dụ shii bu
ndu akpa lẹ mini bukọta
iya.

Gube oha ono shi alwushi
ogu ike lẹ mini;
mbụ gubedua;
mẹ ndu bu ngu l'ime.

Ndu bu l'ibiya ono;
bẹ i shi mee ephe
tuko anmagbaa
rwuurwuu lẹ
ndzụ-agugu.

¹⁸ Nta-a bẹ ndu bu l'aguga
eze-enyimu anmakota
pyaapyaapya l'eka
i daru.

Alị, mini so-phegbaaru
mgburugburu
l'eze-enyimu bẹ
ndzụ-agugu rwutaru;
kele i daru.

¹⁹“Wakwa iphe, Nnajiuphu, bu Chipfu epfu baa: Teke mu e-me mkpu-kpu ngu ono g'ọ buru ochobu; mbụ g'ọ dụ g'eka e te ebuedu ebubu; mbụ teke mu e-gude oke eze-enyimu ime alị bapfuta iya; bya emee g'oke mini ono gbamia ya; ²⁰bẹ mu e-mekwa gẹ gule ndu ophu ekpoda ekpoda; tuko kpoda l'iduma; mbụ g'i lapfu ndu teke k'azụ. Mu e-me ngu g'i nwuda l'ime alị gẹ mkpokpo-ulo, mebyishihuru teke ndiche. Ndu unu l'ephe a-swiru bu ndu ala l'uwurukutu-maa; ophu i ti byadu alwabaa azụ ozo; mbụ kẹ bya ebubaaru l'alị, ndu nọ ndzụ. ²¹Mu e-me ngu g'i laa ejo alala; mee ngu l'i chihu-gbua ree. A chọ ngu nta chọ imo; oke a ta abyadu ahumabaa ngu ozo. Nokwa iphe, Nnajiuphu, bu Chipfu epfu bu ono.”

Iphe, e-me ndu Taya

27 ¹Tobudu iya bu; Chipfu bya epfuru opfu yeru mu sụ: ²“Nwa ndiphe: yoru ndu Taya oshi; ³sụ iya: Gube mkpukpu Taya, nọ

l'onu eka eeshije abahu l'eze-enyimu; buru mkpukpu, iphe, bu ndu bugbaa l'aguga eze-enyimu abyaje azuta aswa. Wakwa iphe, Nnajiuphu, bu Chipfu epfu baa:

“ ‘Oowaa gube Taya;
i suru l'i maerberu mma.

4 Eka oke ali ngu kparu
be bugbaa l'echi
eze-enyimu.

Ndu kpuru ngu nu kputsee
meru ngu k'ophu i
mafufuru mma ngu
l'ishi.

5 Ndu kuru ugbo-mini
ngu be bu l'ubvu
Seniru be ephe gburu
oshi payinu gude kua ya;
bya ejekwapho l'ubvu
ubvu Lebanonu bua
oshi sida gude bvua
itso ugbo-mini ngu ono.

6 O buru oshi-akpurata,
shi l'ali Beshanu be
e gude pyishia eku-ugbo
ngu;
o buru oshi-sayipuresu,
e bukoru l'aguga
enyimu Sayipurosu
be e gude mee omali
ugbo-mini ngu ono;
bya egude eze-enyi
mee ya ona.

7 Ekwa-ochaa, a kparu o du eguru,
shi le Ijiputu be e kweru
l'imeli ugbo-mini ono;
bu iya bu iphe,
emeje iya g'o gba oso;
bya aburu iya be
eegudeje ahube
iya ama.

Iphe, e gude kwekota
l'ugbo-mini ono
ge mini ta abahujeshi

iya bẹ bụ ẹkwa,
 dū urwukpu-urwukpu;
 mẹ ẹkwa, dū uswe-uswe,
 shi l'aguga enyimu
 mkpukpu Elisha.

⁸ Unwoke mkpukpu Sayidonu;
 mẹ unwoke mkpukpu
 Avadu bẹ bụ ndu
 shi akpokotaru ngu ugbo;
 gube Taya.

Unwoke ngu, bụ ndu
 iphe doru ɛnya bẹ
 bukota ndu
 angakotaru ngu
 ugbo-mini.

⁹ Ndu-bu-ogerenya mkpukpu
 Gebalu, mẹ ndibe phe,
 maru eme ɔna;
 bẹ anɔduje l'ugbo-mini ngu;
 emezigbaa ẹka o
 rifushihuru ɔzo.

Iphe, bụ ugbo-mini,
 nokota l'eze-ɛnyimu;
 mẹ ndu angakota
 ugbo-mini ono bẹ
 abyajẹ ngu azuta aswa.

¹⁰ “Unwoke ndu Peshiya; mẹ unwoke ndu Lidiya; yẹ unwoke ndu Putu shi bukotaru ndu ojogu ngu alwuru ngu ọgu. Ẹphe achijeru iphe, ẹphe egudeje egbobuta onwophe; mẹ okpu-igwe phe kobegbaa l'eli igbulọ ngu. Ẹphe meru ngu ị du úbvú. ¹¹ Unwoke ndu Avadu; mẹ unwoke ndu Helẹku bẹ bụ ndu echejeru ngu igbulọ ngu nche gba mgburugburu. Unwoke ndu Gamadu bụ ndu anɔdujeru ngu l'ulo-eli. Ẹphe ewojeru iphe, ẹphe egudeje egbobuta onwophe kobegbaa l'eli igbulọ, e gude kpụ-buta mkpukpu ngu. Ẹphe meru; mma ngu dzua edzudzu.

¹² “Ndu Tashishi shi buru ndu azuje ngu aswa; kele i nweru ẹku, parụ ẹka l'udu iya l'udu iya. Ẹphe shi egudeje mkpola-ochaa; mẹ iphe-ígwè; mẹ ogbongu; mẹ mkpuma ọta-njele; bya azụ-nweta ngu ophu i nweru. ¹³ Ndu Jiavanu; mẹ ndu Tubalu; mẹ ndu Mësheku shi achijeru ohu; mẹ ngwa, e gude onyirubvu mee; gude bya ngu azuta aswa. ¹⁴ Unwoke Betu-Togarama shi akpujeru inya, eegudeje eje ozi; mẹ inya, eegudeje alwu ọgu; mẹ inya-mulu bya ngu azuta aswa. ¹⁵ Unwoke ndu Dedanu bẹ unu l'ẹphe shi azugbaje aswa. Igwerigwe ndu bugbaa l'aguga eze-ɛnyimu shi bukotaru

ndu azu ngu aswa. O buru eze-enyi yele oshi-eboni be ephe shi egudeje pfa aswa iphe, ephe zuru. ¹⁶Ndu Edomu be shi azuje ngu aswa; kele iphe, iimeshi emeshi be du igwerigwe. Ephe shi egudeje mkpuma emeraludu; bya ngu azuta aswa; me ekwa du uswe-uswe; me ekwa, a kparu o nodu ama mma; me ekwa ocha; me mkpuma koralu; me mkpuma rubi. ¹⁷Ndu Jiuda; me ndu Izurelu be unu l'ephe shi azugba aswa. Ephe shi egudeje witi, shi le Minitu; me igberi; me manu-enwu; me manu mmanu; waa manu-balumu; bya ngu azuta iphe, i meshiru.

¹⁸“ ‘Ndu Damasukosu gudekwapho l'i meshiru iphe, du igwerigwe; waa kele i nweru eku ntumatu; ephe nodu egudeje mee, shi le Helubonu; me eji aturu, shi le Zaharu azu ngu aswa. ¹⁹Ndu Danu; me ndu Jiavanu, shi le Uzalub be azuje ngwaswa ngu. Ephe nodu egudeje igwe, a kparu akpukpu; yee kashiya; me kalamosu, bukota iphe, eegudeje eme manu-anyinyi, eshi kwekweekwee; bya ngu azuta aswa. ²⁰Ndu Dedanu shi egudeje ukpo, eegudeje nodu l'eli inya bya ngu azuta aswa. ²¹Ndu Arabu; me iphe, bu ndu-ishi ndu Keda be bukota ndu shi azuje ngu aswa. Ephe achijeru aturu; me ebili; yee eghu bya ngu azuta aswa. ²²Ndu Sheba; me ndu Rama be shi azujekwa ngu pho aswa. Ephe shi egudeje manu, vu oke aswa; me mkpuma, vu oke aswa; me mkpola-ododo; bya azu-nweta ngwaswa ngu. ²³Ndu Haranu; me ndu Kane; me ndu Edenu; yee ndu agbagbaa oke-ngho, shi le Sheba; me ndu agba oke-ngho, shi le mkpukpu Ashuru; mekpoo mkpukpu Kilimadu be shi azukotakwa ngu pho aswa. ²⁴Iphe, ephe shi azuje ngu aswa iya bu uwe, amagbaa mma; me ekwa, du urwukpu-urwukpu; yele ekwa, a kparu dengashia ya iphe edengashi; me jilajila ukpo, vokashiru avokashi, aatogboje l'oma-ulo; mbu ophu e gude okpukpu swia; bya elichaa ya ke kpukpurukpu. ²⁵Ugbo-mini ndu Tashishi bu gube Taya be ephe anoduje evuru iphe.

“ ‘I duapho g'ugbo-mini,
e dojiru iphe,
anyishi erwa ike;
o nodu l'echilabo
eze-enyimu.

²⁶Ndu l'akpo ngu l'ugbo
kpotawaru ngu je
edegebe l'echi
eze-enyimu.

Obenu le pherephere,
shi l'uzo enyanwu-awawa
a-bya ezijashia ngu
iphiriba iphiriba
l'echilabo eze-enyimu
ono.

27 Eku ngu; mę iphe,
 i gude agba ngho;
 mę ngwaswa ngu;
 mę ndu etso ugbo-mini ngu;
 mę ndu angaru ngu
 ugbo-mini;
 mę ndu aguchijeru ngu
 ugbo-mini;
 mę ndibe ngu,
 agba oke-ngho;
 mękpoo ndu ojoğu ngu
 g'ęphe ha; mę iphe,
 bukpo ndu ozo no
 l'ugbo ngu ono;
 be e-kpolahu l'echilabo
 eze-ęnyimu mboku ono,
 ugbo-mini ono e-kpu.

28 Aguga aguga
 eze-ęnyimu be
 a-nmahukota jijijiii
 le teke ndu angaru
 ngu ugbo-mini
 a-tushi uzu-ekwa.

29 Iphe, bukpo ndu gude
 eku-ugbo akpo ugbo
 be a-pakotaru ugbo
 phe nwuhaa.

Ndu anga ugbo-mini;
 mę ndu etso ugbo-mini
 ono be a-pfuchaaru
 l'aguga eze-ęnyimu.

30 Epe a-kwatakpo akwata
 chia oke mkpu ekwa;
 mbu kwatakpo rashia
 ekwa ngu ike.

Epe e-kpota ntu kpukposhi
 onwophe l'ishi;
 bya arwaswikota
 onwophe le ntu.

31 Epe a-kpushi ishi ngu;
 bya eyee uwe-aphu.
 Epe e-gude obu,

aphu jiru ejiji kwaa
 ekwa ngu;
 mbu gua aphu ngu
 gushia ya ike.

32 O buru teke ono,
 ephe a-nodu ara ekwa ngu;
 agu aphu ngu ono;
 be ephe a-guru ngu
 ebvu-aphu owa-a su:

?Bu mkpukpu ole be
 bujekporu
 mkpurupyata l'echilabo
 eze-enyimu egube-a,
 mkpukpu Taya
 bu iya-a?

33 Teke e shi evushije
 ngwaswa ngu e -shi
 l'eze-enyimu;
 be i shi emeje ephe
 eji oha, du igwerigwe.

O buru eku ngu,
 paru eka;
 me ngwaswa ngu be
 i gude mee ndu eze,
 nogbaa le mgboko-a
 ephe nweru iphe.

34 Obenu le nta-a be mini
 mebyishiwaru ngu
 l'ohu eze-enyimu.

Ngwaswa ngu ono;
 yee ndu tso ngu nu;
 be mini rikotawaru
 unu l'ephe.

35 “Iphe, bukpo ndu bukota l'aguga eze-enyimu be iphe, meru ngu nu nyiru ishi edzu; ndu bugbaa eze phe nmahukota rwuurwuu l'eka ndzu-agugu rwutaru phe. Iphu gbapfubechaa phe agbapfube l'eka ndzu agu phe. 36 Iphe, bu ndu agbagbaa oke-ngho l'ohamoha be ata mgbede le k'iphe nwuru ngu nu. I lawaru ejo alala; ophu i ti byadu adubaa adudu ophu.’”

Iphe, e-me eze ndu Taya

28 1 Noo ya; Chipfu bya epfuru opfu yeru mu su: 2 “Nwa ndiphe; pfuaru onye-ishi ndu Taya su iya: Wakwa iphe, Nnajiuphu, bu

Chipfu epfu baa: Eshi ophu iitu onwongu epha sù l'ì bụ Chileke; l'ì sùgaru l'aba-eze Chileke l'echilabọ eze-onyimu; l'eka ì bụ nemadzụ mmanụ; mbụ l'ì tì bụdu Chileke; e -gudekpọoro l'ìiri l'ì maru iphe gẹ Chileke. ³?Ì ka Daneļu amaru iphe ọọ? ?Ìiri l'ọ tọ duedu iphe, e domiru edomi; ì tìi tũko-chaada g'ọ ha maru ọọ? ⁴I gudewaa mmamiphe ngu; mę egomunggo, ì nweru kpaá ẹku kuberu onwongu; bya evukọo mkpọla-ododo; mę mkpọla-ọchaa kùbe l'ulo-ẹku ngu. ⁵I gude aswa ono, ì maru g'aazuję; mee ẹku ngu kabaa shii. Ì gbę gude l'ì nwewaru iphe bya etuahaa onwongu oke epha.

⁶“Ọo ya bụ; waa iphe Nnajiuphu, bụ Chipfu epfu baa: Eshi ophu ìiriye l'ì maru iphe; mbụ l'ì mawaru iphe gẹ Chileke; ⁷bę mu e-rwutaepho ndu ọhozo g'ephe bya etsoo ngu ọgu; mbụ ndu ọha, kachaa enweru ejo-ọkpoma l'iphe, bụ ọha l'ophu. Epehe a-mita ogu-echi phe gude mee gę mma, ìima; mę mmamiphe ngu ono buru ọla-l'iswi. Ûbvù, ì dọ bę epehe e-worugwoọ lę ntụ. ⁸Epehe a-lọ-tsuta ngu; nwuru ngu ye l'ilu; mbụ l'ephe e-gbu ngu l'ike l'echilabọ eze-onyimu. ⁹?Ìi-nwekwaduru onu, ii-gude sù ndu ono, e-gbu ngu nù ono m'ephe -byaepho; l'ì bụ Chileke? Ndu e-gbu ngu nù ono -byaepho; bę ìi-maru-a l'ọo nemadzụ mmanụ bę ì bụ; l'ì tì bụdu Chileke. ¹⁰Ìi-nwuhu anwuhu onye akpapyì l'eka ndu ọhozo. Ọ kwa mbędua pfuru iya. Nokwa iphe, Nnajiuphu, bụ Chipfu epfu.”

Adada eze ndu Taya

¹¹Tọbudu iya bụ; Opfu Chipfu byakwa akparwuta mu l'ehu; bya asu mu: ¹²“Nwa ndiphe; raa ẹkwa eze ndu Taya sù iya: Wakwa iphe, Nnajiuphu, bụ Chipfu epfu baa: I shi buru onye a sùru l'ọ dębe ree; bya aburu onye shi maru mmamiphe shii; bya eshikwapọ buru onye mafuru mma l'ishi. ¹³I shi buru lę Ẹdęnu; mbụ lę mgbabu Chileke. Iphe, bụ mkpuma, vugbaa oke aswa bę meru ngu; ì nọdu ama mma. Mkpuma ono bę bụ rubi; mę tọpazù; mę emeraludu; mę kirisólàyitù; mę ónikùsù; mę jiasùpà; mę sáfayà; mę tọkwásù; mę berilu. Iphe, e doru mkpuma ono kę ọọ; bya egude kpapyabę iya o shihu ike bụ iphe, e meru lę mkpọla-ododo. Iphe ono bę e meru doberu ngu lę mbọku e keru ngu; ì futa mgboko. ¹⁴A wuru ngu manụ l'ishi g'ì buru chierobu, anọduje eche nche; mbụ l'ọo iphe ono bę mu meru ngu g'ì buru. I shi nọdu l'eli úbvù, dọ nsọ kę Chileke. I shi edejeru lę mkpuma, egbugba kę nwìinwii.

¹⁵“Eshi kę mbọku, e meru ngu bę ọta ta adujeduru ngu l'ehu jasụ teke a byaru ahuma l'iime ejo-iphe. ¹⁶I gbę gude l'ì nweru ngwaswa, ha shii wata eme kpangakpangakpanga; shi nno wata iphe-eji. Ọo ya bụ; mu chifu ngu; ì gude iphere lufu l'úbvù Chileke ono. Mu nwufu gube chierobu, anọduje eche nche ono lę mkpuma, egbugbaa nwìinwii ono. ¹⁷I gude kęle ìima mma tseahaa etsetse; bya arwutoshia mmamiphe ono, ì makọtaru ono arwutoshi opfu l'ọo l'ì dọ ùbvù. Ọo ya bụ; mu pata ngu tųa l'alì;

mee ngu i buru onye ndu eze wataru ele enya ke phoriphori. ¹⁸I gudewaa ikpoto ejo-iphe, i meshikotaru; me aswa, i gude ugho azu merwushikota eka-du-nsọ ngu. O buru iya meru; mu menaa oku shi l'ime ngu gbanwuhu; woru ngu tsua tsufu. Mu woru ngu mee; i buru ntụ, wushiru l'omali; mbu i buru ntụ ekpofu l'iphu ndu ele ngu enya. ¹⁹Iphe, bu ohamoha, makotaru ngu nu be iphe, meru ngu nu tufuru ehu. I laru ejo alala; ophu i tii byadu adubaa adudu ophu.”

Iphe, e-me mkpukpu Sayidonu

²⁰Tobudu iya bu; Chipfu bya epfuru opfu yeru mu su: ²¹Nwa ndiphe; ghachiru mkpukpu Sayidonu iphu; pfiaru mu phe iphe, a-nwuru phe nu; ²²su iya: “Wakwa iphe, Nnajiuphu, bu Chipfu epfu baa: Mu noakwaru ngu le njo; gube Sayidonu. Mu e-me gi maru ge mu du-be akpabiri. Oo ya bu; gephe amakwanuru l'oo mbedua be bu Chipfu le teke ono, mu a-nu phe aphu; goshi phe le mu bu onye du nsọ ono. ²³Mu e-me gejo-ehu dafuta iya; mee g'iphe, bu oma ogbororo iya sokota gborogboro le mee. Ee-gbushi nemadzu epe adakaa l'ime gube mkpukpu ono; mbu e-gude ogu-echi gbushia nemadzu lekameka le mkpukpu ono. Oo ya bu gephe amakwanuru l'oo mu bu Chipfu.”

Eekebe ndu Izurelu l'oma

²⁴“Ndu epe le ndu Izurelu bunyabe ta abyadu abubaaru ndu epe du ashi; mbu l'ephe taa dzukashibedu phe; ophu epe taa lakashibaedu phe g'ogarambo. Oo ya bu gephe amakwanuru l'oo mbedua, bu Nnajiuphu bu Chipfu.”

²⁵Wakwa iphe, Nnajiuphu, bu Chipfu epfu baa: Teke mu dufutaerupho ndu Izurelu l'eka a chikashiru phe epe laa be bu l'ime phe be mu e-goshi ohamoha le mu bu onye du nsọ. Oo ya bu; epe abya eburu l'ali nkephe, bu iya bu ali ono, mu nuru nwozi mu, bu Jiekoju ono. ²⁶Epe e-buru l'eka ono l'ehu-guu; nodu iya kwashia unuphu; kooaha ya opfu-vayinu. Epe eburu iya l'ehu-guu teke mu a-nu ndu epe l'ephe bunyabe aphu, bu ndu ono, shi emekpa phe ehu ono. Noo teke epe a-maru l'oo mu bu Chipfu, bya aburu Chileke phe.

Iphe, e-me ndu Ijiputu

29 ¹O be l'apha k'iri ono le g'onwa iri du l'abali iri l'ebo; Chipfu pfiaru yeru mu su: ²“Nwa ndiphe; ghachiru Fero, bu iya bu eze ndu Ijiputu iphu le ke njo; gude pfiaru mu iya iphe, a-nwuru iya nu; pfiukwarupho ndu Ijiputu l'ophu iphe, e-me phe nu. ³Pfiaru iya su iya: ‘Wakwa iphe, Nnajiuphu, bu Chipfu epfu baa: Mu nowaru ngu le njo; gube Fero, bu eze ndu Ijiputu; mbu gube ejo oke agiyi, zee l'echi enyimu ngu. Iisuje l'enyimu Nayilu bu nkengu; l'oo gubedua meru iya doberu onwongu.’ ⁴Ole

mu e-woru ikekee dzubechaa ngu l'okpu-agba; bya emee g'ema, nokota l'enyimu ngu bya eripfua l'ekiri, no ngu l'ehu. Mu a-kpufuta ngu l'enyimu eka ono i no ono; yele ema ono, ripfuru l'ekiri, ngu ono. ⁵Mu a-paru ngu haa l'echiegu gu l'ema, nokota l'enyimu ngu. Ii-da l'oma egu; a taa patadu ngu apata; ophu o buro ke lia ngu elili. Mu e-woru ngu nu anu-egbudu, bu le mgboko; me unwenu, ephe l'eli g'i buru nri phe. ⁶Oo ya bu ge ndu bukota le Ijiputu amakwanuru l'oo mbedua bu Chipfu.

“Noo kele: i shi buru ndu Izurelu oshi ekperema. ⁷O nodu abujeru: ephe -kuba ngu eka; i nyakwoshihu; yejashia phe ukuvu. Teke ephe dakoberu ngu; i nyajihu; ephe adaa dajia okpu-upfu. ⁸Oo ya bu; wakwa iphe, Nnajiuphu, bu Chipfu epfu baa: Mu e-gude ogu-echi bapfuta ngu; gbushia unwoke ngu me eku ngu. ⁹Ali Ijiputu be a-buru mkpurupyata; mbu l'oo-buru ochobu. Oo ya bu; g'ephe amakwanuru l'oo mbedua be bu Chipfu. Iphe, kparu iphe, mu e-me nno bu l'i suru l'enyimu Nayilu be bu ngu nwe iya; l'oo ngu meru iya.

¹⁰“Oo ya bu; mu noakwaru ngu le njo; bya anoduru enyimu ngu ono le njo kwapho. Mu e-me ali Ijiputu g'o buru ola-l'iswi; mbu g'o buru ochobu e shikpo le mkpukpu Migudolu; jas le mkpukpu Asuwanu; mbu je akpachakpo l'oke unu le ndu Kushi. ¹¹Okpa nemadzu; ozo k'anu-egbudu ta abyadu aghabubaa ya; ophu o dudu onye byaru ebubaaru l'eka ono jas ukporo apha labo anwa laa. ¹²Mu e-me ali Ijiputu g'o yifuaru l'eka a-buru ochobu g'ali ndu ozo buhawaa. Iphe, bu mkpukpu, nokota l'ime iya a-buru eka egbara phuru; ukporo apha labo mgburugburu. Ephe a-dupho ge mkpukpu ozo, a lwuru alwuluwuhawaa. Mu a-chikashi ndu Ijiputu g'ephe laa ohamoha, nogbaa nu; mbu chikashia phe g'ephe toko iphe, bu mkpukpu, nonu dzuru.

¹³“Ole-a; wakwa iphe, Nnajiuphu, bu Chipfu epfu baa: A -noepho ukporo apha labo ono be mu e-dufutakota ndu Ijiputu ono l'iphe, bu mkpukpu ono, a chikashikotar phe ephe laa ono. ¹⁴Mu e-shi l'eka a kpuru ndu Ijiputu laa ono duphutakota phe azu; duru phe laa ali Paturosu, bu iya bu ali eka ephe futaru. O buru eka ono be ephe a-nodu buru ali-eze, enya lwaru. ¹⁵Oo-buru ali-eze, enya kachakpo alwalwa; ophu o to byadu apalihubaa k'aka ohamoha ozo shii. Mu e-me iya g'o kwatakpo lwaa ali k'ophu bu l'o to duedu oha, o byaru a-du ike bubaaru ishi phe ozo. ¹⁶Ijiputu ta abyadu abubaaru mkpukpu, ndu Izurelu chiru upfu kwe ozo. Ndu Izurelu e-gudeje Ijiputu nyata l'oo ejo-iphe be ephe meru; teke ephe chijeru upfu kwe l'eka o no g'o yeru phe eka ono. Oo ya bu g'ephe amakwanuru l'oo mbedua, bu Nnajiuphu bu Chipfu.”

**Nebukadineza,
alwu-kpe ndu Ijiputu**

¹⁷Tobudu iya bu; o be l'apha k'ukporo l'esaa le mboku onwa mbu furu; Chipfu bya epfuru opfu yeru mu su: ¹⁸“Nwa ndiphe; Nebukadineza, bu

eze ndu Bábilonu bẹ chíru ndu ojogu iya ye g'ephe je achíahaa ndu Taya onwu l'ẹka. Ndu ojogu iya ono bẹ o meru ishi kworihuchaa phe akworihu; ukuvu swashihukota phe aswashihu l'ẹka ephe evu iphe. Oḽe Nebukadineza yee ndu ojogu iya ono ta adudu urwu, ephe ritaru l'ogu ono, ephe tsoru ndu Taya ono. ¹⁹Oo ya bu; waa iphe, Nnajiuphu, bu Chipfu epfu baa: Mu abyawaa eworu Ijiputu nu Nebukadineza, bu eze ndu Bábilonu. Nebukadineza bẹ e-gwe ẹku ndu Ijiputu tutua atutu. Oo-tuko ali ono lwua alwulwu; gwee iphe phe g'ọ hakota. O buru iphe ono, o gweru ono a-buru obunggo, ee-bu ndu ojogu iya. ²⁰Mu wowaru ali Ijiputu nu iya g'ọ buru obunggo, mu buru yee ndu ojogu iya k'akanya ephe seru; mbu l'ephe lwuru mu ugu. Nokwa iphe, Nnajiuphu, bu Chipfu epfu ono.

²¹“Teke o beerupho mboku ono bẹ mu e-me g'ike bya adu ndu Izurelu; mu abya emekwapho gube Ezekelu g'i saa onu pfua opfu l'echilabo phe. Oo ya bu g'ephe amakwanuru l'oo mbedua bu Chipfu.”

Aayo oshi Ijiputu

30 ¹Noo ya; Chipfu bya epfuru opfu yeru mu su: ²“Nwa ndiphe; pfuaru phe iphe a-nwuru phe nu. Su phe: ‘Wakwa iphe, Nnajiuphu, bu Chipfu epfu baa: Chia mkpu su:

“ ‘Nshio mboku ono!

³ Noo kele mboku obu
dukwaa ntse;
mbu le mboku,
bu ke Chipfu dukwa
ntse.

Mboku ono bẹ a-gbahu
tsukiribaa.

Teke ono bẹ ohamoha
a-la l'iswi.

⁴ Ogu-echi bẹ e-gude
bapfu ndu Ijiputu.
Ejo iphe-ehuka bẹ
a-byapfuta ndu Kushi.
Teke ndu e gbushiru
a-daka le Ijiputu;
bẹ aa-tuko ẹku phe
gweta tugba;
L'ọ bya aburu mkpukpu,
dakposhihuru
adakposhihu.

⁵ Ndu Kushi; me ndu Putu;
me ndu Lidiya;

mẹ ndu Arabu l'ophu;
 mẹ ndu Libiya;
 mēkpoo ndu alì ono
 unu l'ẹphe tuko gbaa
 ndzu ono bẹ ee-gude
 ogu-echi tuko ẹphe
 lẹ ndu Ijiputu gbushia.

6“ Wakwa iphe, Chipfu epfu baa: Iphe, bukpo ndu turu ikè yeru Ijiputu bẹ a-dashikota; ndu bu ike du iya nu, o gude eku onwiya ono bẹ a-bvu. Ee-shiepho lẹ mkpukpu Migudolu gude ogu-echi gbushia phe l'ime mkpukpu ono jasụ lẹ mkpukpu Asuwanu. Nokwa iphe, Nnajiuphu, bu Chipfu epfu. 7Epe a-buru ochobu g'alì ndu ozo bukwapfo. Mkpukpu, phe a-dakposhikwapfo; egbara aphua ya; ge mkpukpu ndu ozo dakposhikwarupho egbara phua ya ono. 8Noo teke ẹphe a-maru l'oo mu bu Chipfu; mbu teke ono, mu a-tufu oku lẹ Ijiputu ono; teme ndu agbajeru phe mkpu bẹ e gweakwarupho arakabya.

9“ Mboku ono bẹ mu e-zi ge ndu-ozì shi l'eka mu no gude ugbo-mini je eyeeru ndu Kushi ebvu l'eka ẹphe tusaru ehu ono. Ejo iphe-ehuka bẹ e-rikpote phe lẹ mboku ono, Ijiputu a-la l'iswi ono; mbu l'ejo iphe-ehuka ono byafutaje.

10“ Wakwa iphe, Nnajiuphu, bu Chipfu epfu baa: Ikpoto ndu Ijiputu bẹ mu e-me g'ẹphe shi l'eka Nebukadineza, bu eze ndu Babilonu chihu. 11Yebdua waa ndu ojoju iya, bu ndu kachaa ejo okpoma l'iphe, bu ohamoha nonu bẹ ee-dubata g'ẹphe lwua alì ono alwulwu. Epe a-mita ogu-echi phe tsopyabe ndu Ijiputu; gbushia nemadzu gbuja alì ono egbuji. 12Mu e-me g'enyimu Nayilu tashihukota; mu abya eworu alì ono ree ndu eme ejo-iphe. Oo l'eka ndu ohozo bẹ mu e-shi mee alì ono g'o laa l'iswi; mēkpoo iphemipe, nokota iya nu. Mube Chipfu bẹ pfuakwaru nu.

13“ Wakwa iphe, Nnajiuphu, bu Chipfu epfu baa: Mu e-mebyishikota agwa; mee g'iphe, e dobegbaaru agwa agwagwa chihu lẹ mkpukpu Memufisu. Ophu o dudu onye byaru abubaaru ishi, lẹ Ijiputu. Mu e-me ge ntsu-mebvu dzuru alì Ijiputu. 14Mu e-me g'alì Paturosu buru ochobu. Mu a-tufu oku lẹ mkpukpu Zowanu; mu anua mkpukpu Tebesu chipfuu. 15Mu e-kpukposhi mkpukpu Sinu, bu agbabe-adzuru ndu Ijiputu oke ehu-eghu mu. Mu e-mekwapfo g'ikpoto ndu mkpukpu Tebesu chihu. 16Mu a-tu oku lẹ Ijiputu. Ndu mkpukpu Sinu bẹ a-nodu l'oke iphe-ehuka. Mkpukpu Tebesu bẹ ee-chikposhi. Mkpukpu Memufisu bẹ a-nodu eje iphe-ehuka mkpurumkpuru. 17Unworoobyia ndu mkpukpu Avenu;^a me ke ndu mkpukpu Pi-Besetu bẹ ee-gude ogu-echi gbushia. Ndu mkpukpu ono, ndu ophu ghuduru nu bẹ aa-kpukota lẹ ndzu. 18Mboku ono a-gbahu

^a 30:17 Mkpukpu Avenu bukwa iya pho bu “Mkpukpu Onu.”

ndu mkpukpu Tahupanahesu tsukiribaa; mbu mboku ono, mu e-me ge Ijiputu te enweheru ike ono. Oo l'eka ono be mu e-me g'okpehu ono, ephe gude eku onwophe ono buu. Urwukpu be e-rikpute iya erikpute. Iphe, bu unwada iya be aa-kpukota le ndzu. ¹⁹Mbu le mu a-nu ndu Ijiputu aphu. Oo ya bu g'ephe amakwanuru l'oo mbedua bu Chipfu.' ”

Arwuhu ndu Ijiputu

²⁰O be l'apha k'iri le nanu g'onwa mbu du l'abali esaa; Chipfu bya epfuru opfu yeru mu su: ²¹“Nwa ndiphe; mu nyakwowaru Fero, bu eze ndu Ijiputu oshi-eka. E teke ekebedu iya ya iphe k'agbagba; ophu o to dudu iphe, aakpaje ye l'eka okpu jihuru g'o dzekwata, a kpawaru ye iya; k'ophu oo-du ike gudeshia ogu-echi. ²²Oo ya bu; wakwa iphe, Nnajiuphu, bu Chipfu epfu bu owa: Mu nowaru Fero, bu eze ndu Ijiputu le njo. Mu anyakwoshi iya oshi-eka labo; mbu nyakwofua ya eka ophu du ree; waa ophu a nyakwowaru anyakwo pho; mbu mee g'ogu-echi, o gude l'eka nafu iya; daa. ²³Mu a-chikashi ndu Ijiputu g'ephe dzuru ohamoha; mbu chikaa phe g'ephe toko mkpukpu, nonu dzuru. ²⁴Mu e-me g'eka shihu eze ndu Babilonu ike; woru ogu-echi mu ye iya l'eka. Obenu le Fero be mu anyakwoshi eka. Oo-nodu l'iphu eze ndu Babilonu atsui oke ude g'onye etsugbuphodoru ndzu ubele. ²⁵Mu e-me eze ndu Babilonu g'eka shihukota iya ike; obenu le Fero be eka a-nodu atukota ke lwakpalwakpa. Noo teke ephe a-maru l'oo mu bu Chipfu; mbu teke ono, mu e-woru ogu-echi mu ye eze ndu Babilonu l'eka; o zeaharu iya ndu Ijiputu ono. ²⁶Mu e-dukashi ndu Ijiputu g'ephe dzuru ohamoha; mbu chikashia phe g'ephe toko mkpukpu, nonu dzuru. Oo ya bu g'ephe amakwanuru l'oo mu bu Chipfu.”

Oshi sida, no l'ubvu ubvu Lebanonu

31 ¹O be l'apha k'iri le nanu le mboku, onwa k'eto furu; Chipfu bya epfuru opfu yeru mu su: ²“Nwa ndiphe; su Fero, bu eze ndu Ijiputu ye igwe oha iya le-a:

“ ‘Bu onye be aa-tukporu
ngu yeru le g'i gude
habe shii?

³ Lewaro Asiriya ono,
shi buru oshi sida
nodu l'ubvu ubvu
Lebanonu ono;

O shi nwegbaaru ekali,
amakota ntumatu;
o jaa kpuru ke yeketee;
so-kputekota oswa,
o no.

- O vua; haa l'eli;
 mkpakponu iya ephe
 l'akpaminigwe je
 anmaa aka l'imeli.
- ⁴ Mini, nokota l'eka ono
 mee iya;
 o nodu abya ke
 kpukakpuka.
 Mini, shigbaa l'ime ali
 anwushi mee ya;
 o vua ha ogologo.
 Mini, shigbaa le nggele
 ogba ono nodu
 aso-phekota upfu
 iya mgburugburu;
 O buru aka ono be mini
 ono eshije sowaruro
 dzuru oshi nokota
 l'oswa ono.
- ⁵ No iya; o vua; kakota iphe,
 bu oshi,
 no l'oswa ono l'eli.
 O kabaa ajakashu ajakashu;
 teme ekali iya tsechaa
 ogologo ogologo.
 O jakashuru egube ono;
 kele mini du l'eka
 ono okpobe adudu.
- ⁶ Iphe, bukpo enu,
 ephe l'eli kpashikota
 epfune lekali iya.
 Iphe, bu anu-egbudu
 buru le mkpula iya
 be ephe azushi unwu.
 Iphe, bu ohamoha,
 hagbaa shii lwakotaru
 le mkpula ibvu iya.
- ⁷ Iphe, oshi ono ama be
 du biribiri;
 o jakashuru nodu ke
 kpuchii;
 kele ogharabvu iya

noçhaa je agebe l'eka
mini du okpobe
adudu.

8 O to nwedu oshi sida,
noçbaa le mgbabu
Chileke duru ophu
aturu iya nu.

Ophu oshi payinu
atuduru ekali iya.
Mbu ophu oshi mmanu
ta ajakashì-beduru
g'ekali iya jakashiru.

Ophu o to dudu oshi,
noçbaa le mgbabu
Chileke duru ophu
mapfuru iya le mma.

9 Oo mbedua meru iya;
o nodu ama mma;
jakashia ekali
igwerigwe egube ono;
Mbu k'ophu bu l'iphe,
bu oshi,
nokota le mgbabu
Edenu,
bu mgbabu Chileke
ono ejikotaru iya
enya.

10 “Oo ya bu le-a; Wakwa iphe, Nnajiuphu, bu Chipfu epfu baa: Eshi ophu o vuliru imeli imeli; mbu vughatakota iphe, bu epfukala; temanu o nodu eku onwiya; kele o ha l'eli ¹¹ be mu nwuwuru iya nu onye bu ishi ohamoha; g'o pfua ya ugwo g'ejo-iphe oome gbaru; mbu le mu nwutawaru iya nwucha. ¹² Ndu ohozo; mbu ndu oha, bu phe kakota ejo okpoma be butawaru iya tua; ngeghata. Ekali iya dakachaaru l'ubvu ubvu; mekpoo le nsuda nsuda. Unwu ekali iya nyakwoshihuwaru dabyicharu le nggele ali ono. Iphe, bu mkpukpu, nokota le mgboko, bu ndu shi nodukota iya le mkpula be lufuta-kotawaru nu; gbado iya. ¹³ Iphe, bu enu, ephe l'eli; bya anyinwua oshi ono, daru adada ono. Anu-egbudu l'ophu bya anodugbaa l'ekali-oshi ono. ¹⁴ Oo ya bu; g'o to nweheru oshi ozo, noçbaa l'aguga mini, byaru evutabaa kuahaa onwiya; kele ole o ha l'eli; mbu ke g'o vuta g'ephe l'akpaminigwe je anmaa eka l'imeli. Mbu l'o to nwedu oshi, amitakpo mini amita l'ali, byaru a-habaa l'eli egube ono; kele e mewaru phe g'o buru anwushihu be ephe a-nwushihu; laa l'ime ali; mbu je anodu ephe le ndiphe, nwushihuwaru kpoda l'ilu.

15 “Wakwa iphe, Nnajiuphu, bú Chipfu epfu baa: Mbòku ono, ò larú l'ali-maa bẹ mu meru g'aphú kpukposhi mgboko. Mu gude mini-ime-ali woru iya bye-mia; bya emee; nggele nõgbanu tabushihu ẹbo; ẹnymu sòbuhu asòso. Ò búru opfu ẹhu iya bẹ mu gude mee g'úbvú úbvú Lébanonu nõdu l'aphú. Iphe, bú oshi, nõkota l'ẹgbudu nwulwashihukota anwulwashihu. 16 Mu meru g'òhamoha nmakòta jijijiji l'òda, ò daru teke mu nwuru iya chie l'ali-maa g'ò lapfu ndu òphu kpolahuhawaru l'ilu; tẹme oshi, shi p'fugbakwaarupho lẹ mgbabu Edeņu; mbu oshi ndu òphu shi kakòta ree; bya ahacha okporokpo l'úbvú úbvú Lébanonu, bú iya bú oshi, mini shi dukota l'ẹka ẹphe nõ rengurengu bẹ obu byaru ejizeta l'ime ali ẹka ẹphe nõ; teke ono ò daru ono. 17 Iphe, bú ndu shi nõdu l'ibvu iya, bú ndu shi búru agbarike iya bẹ yẹ ya tũkoakwarupho lakòta l'ali-maa; lapfu ndu òphu e gude ogu-echi gbushia.

18 “?Bũkpoo oshi ole lẹ Edeņu atũkporu ngu l'úbvú, ì dũ; yẹ g'i gude paa ẹka apaa? Obenu l'aa-tũko unu l'oshi Edeņu; nwuru chie l'ime ali. Unu lẹ ndu te ebuduru úbvú; waa ndu e gude ogu-echi gbushia bẹ a-tũko zẹ l'ẹka lanu. Noo g'òo-duru Fero yẹ igwe ọha iya bú ono. Nokwa iphe, Nnajiuphu, bú Chipfu epfu.’ ”

A kuru Fero oshi

32 1 O be l'apha k'iri l'ẹbo lẹ mbòku, ọnwa k'iri l'ẹbo furu; Chipfu bya epfuru opfu yeru mu sù: 2 “Nwa ndiphe; kuru Fero, bú eze ndu Ijiputu oshi; sù iya: Irije l'ì bú oduma l'echilabò ọhamoha; obenu l'ì dũ g'ẹjo-oke-agiya bu l'eze-ẹnymu. I shi lẹ nggele ngu pafuta onwongu; gude ọkpa akpako mini; bya aswongashia ya aswongashi. 3 Wakwa iphe, Nnajiuphu, bú Chipfu epfu baa: Mu e-woru ikpoto ọha mee ugbu; gude nmata ngu. Ẹphe e-gude ugbu mu ono kpufuta ngu. 4 Mu a-tũ ngu l'ali; mu e-woru ngu chia ogbu l'oma ẹgu. Mu e-me g'iphe, bũkpoo ẹnu, ẹphe l'eli bya eripyabẹ ngu; mu e-gude ngu zũ-jia anũ-ẹgbudu, nõ lẹ mgboko l'ophu ẹpho. 5 Mu a-tũka anũ ngu nanunanu l'úbvú úbvú; mbu lẹ mu e-me g'odzu ngu tũko nsũda nsũda sweta. 6 Mu e-me g'ali nwũkota shokoshoko lẹ mee ngu, a-nõdu asò kẹ gborogboro; mbu sò jeyekotakpo l'úbvú úbvú; tẹme mee ngu bẹ e-jikòta nggele ejiji. 7 Teke mu a-kponyi ngu ẹnya; bẹ mu e-me g'akpaminigwe jikpute; mee gẹ kpokpode, nõkota iya nũ gbahukota ọchii. Mu e-gude urwukpu sò-kpute ẹnyanwu; òphu ọnwa ta abyadu echi echichi ophu. 8 Iphe, bũkpoo iphe, echije echichi, nõ l'igwe bẹ mu e-me g'ẹphe gbahukotaruru ngu ọchii. Mu e-me g'ali ngu gbakòta ọchii. Nokwa iphe, Nnajiuphu, bú Chipfu epfu.

9 “Mu e-me g'obu gbarwua ndu dũ igwerigwe lẹ teke mu e-me g'ì búru mkpurupyata l'echilabò ọhamoha ono; mbu l'ali, ì tì madu. 10 Mu e-me ọha, dũ igwerigwe g'ẹphe terwuhu l'iphe, a-nwuru ngu nũ. Ndu eze pẹ bẹ ndzũ-agugu opfu ẹhu ngu e-rwuta; lẹ teke mu e-ze ogu-echi mu l'iphu

phẹ. Mbọku, ịi-buru mkpurupyata bẹ ẹhu a-nọdu anmakọta onyemonye rwuurwu lẹ ndzụ-agugu; l'iphe, bukpo teke nonu.

¹¹ “Kele Nnajiuphu, bu Chipfu epfukwa su: ‘Ogu-echi eze ndu Babilonu bu a-bya ngu l’ehu. ¹² Mu e-me ge ndu okpehu du gude ogu-echi phe gbushia ikpoto nemadzu, bu ndu nkengu. Mbụ l’o ndu ono bu oha, kachakpo ejo-okpoma ono bẹ unu l’iya e-me. Iphe ono, Ijiputu gude eku onwiya ono bẹ ephe e-chi pyaapya. Iphe, bu ikpoto nemadzu, nokota l’eka ono a-bukotaru mkpurupyata. ¹³ Mu e-gbushikota iphe, bu eswi iya l’eka mini doru nyimunyimu. Okpa nemadzu ta abyadu aswongabaa mini ono ozobaa; ophu okpa eswi abyadu aswongabaa ya. ¹⁴ Noo teke mu e-me mini phe g’o doo risaa bu ono; mekwaa ya pho g’o so asoso ge manu olivu. Nokwa iphe, Nnajiuphu, bu Chipfu epfu. ¹⁵ Teke mu e-me Ijiputu g’o buru ochobu; woru ali ono mee g’o to duhe iphe, a-nodu iya nu; mbu teke mu e-gbutsushi iphe, bu ndu bu l’eka ono bẹ ephe a-maru l’o mu bu Chipfu.’ ¹⁶ Waa ebvu-aphu, aa-nodu aguru iya baa. Unwada ohamoha bẹ a-nodu agu iya; ephe a-guru iya Ijiputu; yee ikpoto oha Ijiputu. Nokwa iphe, Nnajiuphu, bu Chipfu epfu.”

¹⁷ No iya; o be l’apha k’iri l’ebo lẹ mbọku onwa k’iri l’ebo ono du l’abali iri l’ise; Chipfu bya epfuru opfu yeru mu su: ¹⁸ “Nwa ndiphe; raa ekwa ikpoto oha Ijiputu; mee phe g’ephe l’ohamoha, a maru amaru tuko wuda l’ime ali; mbu g’ephe tuko wulahu l’azu iya ophu g’ephe lapfu ndu ophu kpodawaru l’ilu. ¹⁹ Su phe:

“?Unu dobesu l’unu ka ndu ozo ama mma to?

Unu wuba lamihu; je azeshia l’eka ndu daru odaleba ze.’

²⁰ “Ephe a-dashi l’eka ndu ophu e gude ogu-echi gbushia daru. A mitaakwaru ogu-echi; bya akpufutawa; yele igwe oha iya ono akpufuta. ²¹ Iphe, bu ndu okpehu du, no l’ali-maa a-su Ijiputu yee ndu agbajeru iya mkpu: Ephe tsulahuakwaru; bya awushiru l’eka ndu te ebuduru ubvu dabyigbaaru; mbu ephe lẹ ndu e gude ogu-echi gbua bya azekota l’eka lanu.

²² “Asiriya bẹ no l’eka ono yele ndu ojogu iya l’ophu. Ilu ndibe iya, e gbushiru egbushi bẹ no-pheru iya mgburugburu; mbu ndu e gude ogu-echi gbushia. ²³ Ilu phe bẹ bu l’ime nsu bẹ o nokota. Ikpoto ndu nkiya bẹ ze-pheru ilu iya mgburugburu. G’ephe ha bẹ e gbukotaru egbu; mbu l’o ogu-echi bẹ e gude gbushikota ndu ono, shi akpataje ndzụ-agugu abya ndu bu l’ali ndu no ndzụ l’ehu ono.

²⁴ “Elamu bẹ nokwapho l’eka ono yele igwe oha iya l’ophu, do-pheru ilu iya mgburugburu. G’ephe ha bẹ e gude ogu-echi gbushikota; ephe dakota odaleba. Iphe, bu ndu ono, shi eyeje ndu bu l’ali ndu no ndzụ ebvu ono bẹ wudakotawaru l’ime ali. Ephe gude iphere laa yele ndu ophu laru l’ilu. ²⁵ E meru iphe-azee doberu Elamu l’eka ndu e gbushiru egbushi kuru; ilu igwe oha iya no-pee ya mgburugburu. G’ephe ha bukota ndu e gude ogu-echi gbushia; ephe dakota odaleba. Ephe shi buru ndzụ-agugu duru

ndu bu l'alì ndu nõ ndzù; obenu lẹ nta-a bẹ ẹphe gudewaa iphere lapfu ndu ophu l'alì-maa. A togbowaru pẹ l'ẹka a togboru ndu ophu e gburu egbugbu.

²⁶“Mẹsheku; mẹ Tubalu bẹ nõkota l'ẹka ono; ẹphe l'igwe oha phe, nõ-pheru ilu pẹ mgburugburu. G'ẹphe ha bukota ndu daru odaleba, e gude ogu-echi gbushia; kele ẹphe shi eyeru ndu nõ ndzù ebvu. ²⁷?Tobudu l'alì-maa bẹ ẹphe lẹ ndu ojogu, ike du, daru odaleba ono tukoru lakota? Ẹphe gude ngwoḡu pẹ lakota l'alì-maa; e swibechaa pẹ ogu-echi pẹ l'ishi. Ejo-iphe, ẹphe meru tukocharu l'okpu pẹ; e -gudekpoooro l'ẹphe lẹ ndu ojogu, ike du; shi emeje ndzù erwuta ndu bu l'alì ndu dzù ndzù.

²⁸“Gubedua, bu Fero kwapho bẹ aa-nyakwo anyakwo; unu lẹ ndu daru odaleba aze l'ẹka lanu; mbu unu lẹ ndu e gude ogu-echi gbushia.

²⁹“Edomu bẹ nõ l'ẹka ono; yele ndu eze iya; mẹ ndu-ishi iya g'ẹphe ha. Ẹphe bukpo ndu okpehu shi du; ole a tukowaru ẹphe lẹ ndu e gude ogu-echi gbushia toḡbo l'ẹka lanu. Mbu l'ẹphe lẹ ndu daru odaleba tukowaru ze l'ẹka lanu; ẹphe lẹ ndu wudaru l'ilu tukowa swiru.

³⁰“Iphe, bu ndu-ishi uzo isheli; mẹ iphe, bu ndu Sayidonu l'ophu bẹ nõkotakwapho l'ẹka ono. Ẹphe gudewaa iphere lapfushia ndu ophu e gburu egbugbu. Ẹphe shi egudeje ike, du pẹ nu eyeru ndiphe ebvu; obenu l'ẹphe nwushihuwaru daa odaleba; ẹphe lẹ ndu e gude ogu-echi gbushia tuko zeshia l'ẹka lanu. Ẹphe vuru iphere ẹphe lẹ ndu ala l'ilu tuko kpoda.

³¹“Fero yele igwe oha iya a-huma pẹ; gude iya dua onwiya obu lẹ k'igwe oha iya, e gude ogu-echi gbushia. Nokwa iphe, Nnajiuphu, bu Chipfu epfu.

³²“O bu eviya lẹ mu meru iya g'o yee ndu bu l'alì ndu nõ ndzù ebvu; ole ee-meela-a yebedua waa igwe oha iya g'ẹphe lapfu ndu daru odaleba; mbu ndu e gude ogu-echi gbushia. Nokwa iphe, Nnajiuphu, bu Chipfu epfu bu ono.”

Ezekelü bẹ eeme g'o buru onye-nche

33 ¹No iya; Chipfu bya epfuru opfu yeru mu su: ²“Nwa ndiphe; pfuaru ndibe unu su pẹ: Teke mu meru g'a bya etsoo mkpu-kpu ogu; ndu mkpu-kpu ono -hota onye lanu lẹ ndibe pẹ g'o chejeru pẹ nche; ³onye ono -huma ẹka ogu abyafuta ndu mkpu-kpu ono bya egbua opu g'o gude karu ndu ono; ⁴onye -numacharu oda opu ono; ophu o to ngaduru nchi; ogu ono -bya egbua ya; bẹ bu onye obu vu ochi onwiya. ⁵Eshi ophu o numacharu opu ono; ophu o ngaduru nchi; bẹ bu iya e-vuru ochi onwiya; kele o m'o -ngaru nchi; m'oo-dzo-a onwiya ndzù. ⁶Obenu; o -buru l'onye-nche humaru ẹka ogu abya; ophu o to gbuduru opu gude karu ndu ono; ogu ono -bya egbua onye lanu l'ime ndu ono; bẹ iphe, meru g'o gude e gbua onye obu bu kele o meru ejo-iphe; obenu lẹ mu e-gude onye-nche ono g'o laa l'ochi onye ono, e gburu ono.

7“Nwa ndiphe; mu meakwaru ngu onye-nche ndu Ízurelu. Ọo ya bu; nga-bekwa nchi numa iphe, mu epfu; gude iya nmaaru phe okwa. 8Teke mu pfuru onye ejo-iphe su: ‘Gube onye ejo-iphe; i nwuhufutajekwa’ ophu i ti pfuduru iya g’o haa iphe, oome; be onye ejo-iphe ono a-nwuhukwa l’opfu ejo-iphe, oome; obenu l’oo gubedua be mu a-kpa ishi ochi iya. 9Obenu; o -buru l’i nmaru onye ejo-iphe okwa g’o haa ejo uzo iya; ophu o to kwedu; be oo-nwuhu l’opfu ejo-iphe, oome; obenu le gubedua dzoakwanaru onwongu ndzu.

10“Nwa ndiphe; su ndu Ízurelu le-a: Unu epfuje su: Ejo-ememe, anyi meshiru; waa iphe-eji, anyi meru be anyi-gbuwaa anyi l’erwa. Anyi noduwaa l’ime iya eyifuwa eyifu. ?O nwekwaduru g’anyi e-shi dzubaaru ndzu to? 11Su phe; wakwa iphe, Nnajiuphu, bu Chipfu epfu baa: ‘Oo ge mu no ndzu ge mu no iya-a bu g’o bu ire-lanu l’anwuhu onye ejo-iphe ta atsojedu mu utso; o chia g’onye ejo-iphe haa ejo uzo iya; bya adzuru ndzu. Unu ghaa umere! Unu ghaa umere; haa ejo uzo unu g’o ha! Oowaa! ?Bu gunu meru iphe, unu a-nwushihu; unube ndu Ízurelu?’

12“Oo ya bu; nwa ndiphe; su ndu ali unu-a: Umere oma onye pfuberekoto ta abyakwa adzo iya m’o -buru l’o nonyaru o meahaa iphe, du eji; ophu ejo-iphe, onye ejo-iphe meru te emedu iya g’o laa l’iswi; m’o -buru l’o gharu umere haa ejo-iphe iya. Ole o -buru l’onye pfuberekoto nonyaru meahaa iphe-eji be e te egudekwa kele o shi buru onye pfuberekoto haa ya g’o nodu ndzu. 13O -buru le mu suru onye pfuberekoto l’o-dzuru ndzu; umere omaa ya ono gbey bya atsuru iya lenya; o wata eme ejo-iphe be o to nwekwa iphe, du ree ono, o shi emekota ono, aa-nyatakwadu me nanu. O nwuhufutaje le k’ejo-iphe ono, o meru ono. 14Ole teke mu suru onye ejo-iphe l’o nwuhufutaje; o bya ahaa eme ejo-iphe meahaa iphe, pfuru oto; waa iphe, du ree; 15o -buru l’iphe, o nakoru ndu o jieru ugwo be o nu-phukotaru phe azu; bya ewolakota iphe, o zitaru l’iphuru; bya emeahaa iphe, a suru ge meje; paru eme ejo-iphe haa; be oo-dzuru ndzu; o to byadu anwuhu. 16O to nwedu iphe-eji, o meru me nanu, a bya anyatakwaduru iya ozo. O mewaru iphe, pfuru oto; waa iphe, du ree; o je adzuru ndzu.

17“Ole ndu ali unu gbey epfuje su: ‘Nnajiuphu te emejedu iphe, pfuru oto.’ Ole oo ephebedua gbey ophu ephe emejedu iphe, pfuru oto. 18O -buru l’onye pfuberekoto haru apfubekoto; bya awata eme ejo-iphe be oo-nwuhukwa le k’ejo-iphe ono. 19Obenu o -buru l’onye ejo-iphe be haru eme ejo-iphe iya ono bya emeahaa iphe, pfuru oto; me iphe, du ree; be ee-gudekwa ke ree ono, oome ono; mee ya l’o dzuru ndzu. 20Ole-a; unube ndu Ízurelu; epfuje su: ‘Nnajiuphu te emekwa iphe, pfuru oto.’ Ole mu e-kpechaa onyemonye g’unu ha ikpe g’iphe, onye meru gbaru.”

Eepfu l’a Iwuru Jierusalemu

21O be l’apha k’iri l’ebo, e -shi teke a kpuru anyi le ndzu ono; mbu g’onwa iri du l’abali ise; nwoke lanu, shi le Jierusalemu pyofu; bya epfuaru mu

sụ: “Mkpukpu ono bẹ dakpòshihuakwaru nù.” ²²Ọ bụru l'ụzenyashi ụnya-phu iya; tẹmanu nwoke ono, pyofuru nù phọ byapfuta mu; bẹ ẹka Chipfu kparwutawaru mu l'ẹhu; bya eme ọnu mu kùhaa; mu pfuahaa opfu. Ọwa nwuadaru tẹme o rwua l'utsu iya teke nwoke ono byapfutaru mu. Ọo ya bụ; a kùhaa mu ọnu; mu pfuahaa opfu; ọphu mu ta abụedu onye te epfudu opfu.

Iphe-ẹji, ndu Ízurelu

²³Tọbudu iya bụ; Chipfu bya epfuru opfu yeru mu sụ: ²⁴“Nwa ndiphe; ndu bugbaa l'ẹka ono, e mebyishiru l'alì Ízurelu ono bẹ asuje: ‘Ébiriamu bụ onye lanụ bẹ ọ bụ; o shi nwekotaleru-a alì ono. Obenu l'anyịbedua ha igwerigwe; a nùwaru anyi alì ono g'anyi nweru.’

²⁵“Ọo ya bụ; sụ phẹ: ‘Wakwa iphe, Nnajiuphu, bụ Chipfu epfu baa: Eshi ọphu unu atajekwadu anụ, mee nọ; ẹnya unu dukwadu l'ẹka agwa unu nọgbaa; unu nọdu egbu ọchi; ?unu arì l'alì ono bukwađu okiphe unu tọo? ²⁶Unu kporu obu ye l'ogu-echi unu; unu nọdu eme ẹbyi; tẹme onyenonu nọdu apharwushi nyee nemadzụ ibiya. ?Unu arì l'alì ono bukwađu okiphe unu tọo?’

²⁷“Sụ phẹ lẹ-a; ‘Wakwa iphe, Nnajiuphu, bụ Chipfu epfu baa: Eshi ọphu mu nọ-a ndzụ gẹ mu nọ iya-a bẹ ndu ono kwaru l'ẹka ono, a lwuru alwu-lwu ono bẹ bụ ogu-echi bẹ ee-gude gbushia phẹ. Ndu ọphu lufuru nọdu l'oma ẹgu bẹ e-woru nù anụ-egbudu g'ẹphe vọ kpatakpata. Ndu ọphu nọgbaa l'ẹka a kpushiru ike; mẹ ndu ọphu nọ l'ogba bẹ bụ ẹjo iphe-ememe e-gbushi phẹ. ²⁸Mu e-me alì ono g'ọ dabyiru bụru ochobu. Ike iya ono, o gude eku onwiya ono bẹ a-bvù nù. Iphe, bụ úbvù, nọkota lẹ Ízurelu bẹ a-bukotaru ochobu; k'ọphu ọ tọ dudu onye byaru aghajabaa ẹka ono aghaja. ²⁹Ọo teke ono bẹ ẹphe a-maru l'ọo mu bụ Chipfu ono; mbụ teke mu mee-rupho alì ono g'ọ bụru ochobu l'opfu ẹbyi, ẹphe meshiru ono.’

³⁰“A bya lẹ gubedua; nwa ndiphe; ndu alì unu epfugba opfu ẹhu ngu l'ibiya k'igbulọ, nọgbaa nù; mẹ l'onu-mgbo, dọ l'ulo, nọgbaa nù. Ẹphe anọduje epfuru nwibe phẹ sụ: ‘Unu bya anuma ozi, Chipfu ezi-o!’ ³¹Ndibe mu abyapfuta-je ngu egube ẹphe abyajekpo ono; bya anọdu l'iphu ngu g'ẹphe ngabẹ nchị numa iphe, iipfu; ọle ẹphe te emejedu iya. Ọo l'onu bẹ ẹphe asuje l'ẹphe yeru mu obu; obenu l'obu phẹ anọduje aji momomo g'ẹphe e-shi ria urwu l'uzo, apfuduru-oto. ³²Eviya eviya; ọ tọ dudu iphe ozo, ẹphe guberu ngu; abụedupho l'ì bụ onye agụ ebvu, atso ntumatu; akpo une ẹrengete eye iya. Mbụ l'ẹphe anumajecha iphe, iipfu; obenu l'ẹphe te emejedu iya ememe. ³³Ọo teke iphe-a meebekontakpoerupho egube ono, o mefutaje ono; tẹme ẹphe agbẹ teke ono maru l'o nweru onye mpfuchiru Chileke, shi nọdu l'echilabọ phẹ.”

Onye eche aturu yee aturu iya

34 ¹Tọbudu iya bụ; Chipfu bya epfuru opfu yeru mu sụ: ²“Nwa ndiphe; pfuaru ndu eche aturu Ízurelu iphe, a-nwuru phẹ nù.

Pfuaru phe sù phe: Wakwa iphe, Nnajiuphu, bụ Chipfu epfu baa: Nshio ndu ono, eche aturu le Ízurelu, buepho onwophe be ephe eleta enya. ?To gbaduru ge ndu eche aturu leta aturu phe enya too? ³Unu anguje era, a pyitaru iya; bya eye uwe, e gude eji iya mee; bya egbua ophu kachaa atsu eba; ole unu gbephe ophu unu te eletajedu yebe igwe aturu obu enya. ⁴Unu te emejedu g'ike du ndu ophu ike bvuru; ophu unu te emejedu g'ehu du ndu ophu iphe eme ike; ophu unu ekebejedu ndu ophu iphe-ehuka mekaru iphe l'onyá. Unu te eduphutajedu ndu ophu kpaphuhuru nu azu; ophu unu ta achojedu ndu ophu tuphashihuru etuphashihu. Oo ehuka ehuka; yee ejo obu be unu egudeje eche phe. ⁵Oo ya meru iphe, ephe gbakashihuru; kele ephe te nwedu onye eche phe nu. Teke ono, ephe gbakashihuru ono; be ephe je aburu nri anu-egbudu. ⁶Aturu mu be aghaphegbaa leze ubvu; me l'ubvu nshii. Ephe tuko gbakashihukota tsoru mgboko l'ophu; ophu o dudu onye jeru phe achocho; ozoolekpoo nu enya phe.

⁷“Oo ya bu; unube ndu eche aturu; unu numa iphe, Chipfu epfu!

⁸Wakwa iphe, Nnajiuphu, bụ Chipfu epfu baa: Oo ge mu no ndzu ge mu no iya-a bu go bu ire-lanu l'eshinu igwe aturu mu te enwedu onye eche phe nu; anu nodu egbushi phe; mbu ephe bya abwaru nu nri anu-egbudu; ophu ndu eche aturu mu ono ta achojedu igwe aturu mu ono; o buru onwophe be ephe eleta enya; gbeparu ikpoto aturu mu ono haa; ⁹g'unube ndu eche aturu ono numakwa iphe, Chipfu epfu. ¹⁰Wakwa iphe, Nnajiuphu, bụ Chipfu epfu baa: Unu lenu; mu noakwaru ndu ono, eche aturu ono le njo; mu e-gudeshi phe le k'aturu mu ono. Mu e-me g'ephe chebuhu igwe aturu ono; k'ophu ndu ono, eche iya ono ta adedu ike anu onwophe nri. Mu alofu phe aturu mu l'onu; g'ephe ta abheru nri phe.

¹¹“Wakwa iphe, Nnajiuphu, bụ Chipfu epfu baa: Oo mbedua l'onwomu e-je acho aturu mu ono; bya echeahaa phe. ¹²Oo egube ono onye eche aturu achoje igwe aturu iya, nashihuru iya tuphashihu teke o no swiru iya l'onwiya ono; bu ge mu a-cho aturu mu. Mu a-cho phe humakota l'eka ephe gbakashihuru je anodugba teke ono mboku shi gbahu tsukiribaa ono. ¹³Mu e-dufutakota phe l'iphe, bu ohamoha; mbu shi le mkpukpu nonu rwukobe phe; duru phe dobe l'ali nkephe. Mu e-cheje phe l'ubvu, nogbaa le Ízurelu; me l'aguga nggele; me l'eka e bukota ebubu l'ali ono. ¹⁴Mu e-cheje phe l'eka nri du ree. O buru l'eli ubvu Ízurelu be ephe a-noduje akpa nri. O buru l'eka ono nri du shii, ephe ataje nri ono be ephe a-zeshije. O buru l'eka ono nri du shii ono; mbu l'ubvu, nogbaa le Ízurelu be ephe a-taje nri. ¹⁵Mube Nnajiuphu, bụ Chipfu suru-a: Mu e-che aturu mu; chiru phe je edobe l'odu.

¹⁶“Mu a-cho ndu ophu tuphahuru etuphahu; bya achilata ndu ophu gbakashihuru nu. Mu ekee ndu ophu iphe-ehuka mekaru iphe; l'eka e mekaru phe iphe. Mu emee g'ike du ndu ophu ike bvuru. Obenu le ndu ophu ha okporokpo; me ndu ophu ike du be mu e-me g'ephe buru mkpurupyata. Mu a-nodu eche aturu ono egube o gbaru g'e cheje phe.

17“*A bya l'unube aturu mu; waa iphe, mube Nnajiuphu, bu Chipfu epfu anu unu baa: Unu lenu; mu e-kperu aturu yee ibe iya ikpe; mu ekpeeru ebili yee mkpi ikpe. 18?Teke o suduru unu; mbu nri ono, unu ata l'eka nri du ree ono to?* ?*O gbaru g'unu gudefua okpa zotoshia nri unu ophu phoduru nu to?* ?*To zduduru unu; mbu mini oma ono, unu angu ono?* ?*O gbaru ke g'unu gudefua okpa swoo ndu ophu unu ngu-phodoru erwu to?* 19?*Bu g'aturu mu taa nri, unu zopyashiru l'okpa; bya angufua mini, unu gude okpa swoo erwu to?*

20“*Oo ya bu; 'Wakwa iphe, Nnajiuphu, bu Chipfu epfu baa: Lenu! Oo mbedua l'onwomu e-kperu aturu ophu ha okporokpo; yee ophu joru ehuru ikpe. 21Eshi ophu unu gude mgbureku; gude ukuvu unu akwaphu phe; bya egude mpu unu adukashi ndu ophu ike ta adudu; jasu unu chikashia phe nanunanu; 22be mu a-nafuta igwe aturu mu ono; g'a ta alwuhe phe alwulwu ozobaa. Mu e-kperu aturu yee ibe iya ikpe. 23Teke ono be mu e-ye onye lanu, echeje aturu, bu iya bu Devidi, bu nwozi mu g'o leta phe enya. Oo ya a-noduje anu phe nri; teme o buru yebedua bu onye a-noduje eche phe; bya aburu onye eche phe okpobe echeche.*

24“*'Mbedua, bu Chipfu be a-buru Chileke phe. O buru nwozi mu, bu Devidi a-buru onye-ishi phe. Mube Chipfu pfuakwaru. 25Mu l'ephe a-gba ndzu ehuru-guu; mu a-chifukota ejo anu-egbudu l'ali ono; k'ophu ephe e-buru l'echiegu; kuje mgbenya l'ime oswa; o too nweduru iphe, e-me phe nu. 26Mu a-goru onu-oma nu phe; ephe l'eka no-pheru ubvu mu mgburugburu. Mu e-me ge mini dzejeru phe l'orwuberu iya. Onu-oma ono be a-nodu edze ge mini. 27Iphe, bu oshi, no legu be a-nodu ami mebyi l'orwuberu iya. Ali be e-mehujekwapho iphe, e meberu iya. Ndu ono be o to dudu iphe, e-me phe nu l'ali phe. Ephe amaru l'oo mbedua bu Chipfu le teke ono, mu a-nyakwo odogoro igwe ono, e yeru phe ono; mbu nafuta phe l'eka ndu ono, gbaru phe ohu ono. 28Iphe, bu ohamoha ta abyadu alwuba phe alwulwu ozobaa; ophu anu-egbudu ta abyadu egbushibaa phe ozobaa. Ephe e-buru tusaru ehuru; ophu o to dudu onye e-yebaaru phe ebvu. 29Mu a-nu phe ali, a maru amaru l'oomehuje iphe. Ephe ta abyadu abubaaru ndu egu eme l'ali ono; ophu ephe abueduru ndu ohamoha a-noduje anma phulaphula. 30O buru teke ono be ephe a-maru le mbedua, bu Chipfu bya aburu Chileke phe be no swiru phe nu. Ephe amakarupho l'ephebe ndu Izurelu be bu ndibe mu. Nokwa iphe, Nnajiuphu, bu Chipfu epfu.*

31“*'Unube aturu mu; mbu aturu, mu azu azuzu; bu unube nemadzu; mbedua buru Chileke unu. Nokwa iphe, Nnajiuphu, bu Chipfu epfu.'*”

Iphe, ee-me ndu Edomu

35 ¹Nokwa iya; Chipfu bya epfuru opfu yeru mu su; ²Nwa ndiphe; ghachiru ubvu Siye iphu le ke njo; pfuaru mu iya iphe, a-nwuru iya nu; ³su iya: Wakwa iphe, Nnajiuphu,

bụ Chipfu pfuru baa:
 Mu nọakwaru ngu lẹ njo;
 gùbe úbvú Siye!
 Mbụ lẹ mu a-machi ẹka
 mu daa ngu kẹ njo l'ẹhu;
 bya emee ngu g'ị
 dabyiru bụru ochobu.

⁴ Iphe, bụ mkpukpu ngu
 bẹ mu e-mekọta umerekete;
 İi-buru ochobu dabyiru;
 Oo ya bụ g'ịimakwanuru
 l'ọo mbeđua bụ Chipfu.

⁵Eshi ophu ndu Ízurelu shi l'edenwede duta ngu ashị; i gude ogu-echi gbushia phe lẹ teke ephe eje oke iphe-ehuka; mbụ teke a nuru phe chipfu; ⁶bẹ mube Nnajiuphu, bụ Chipfu sụru-a: Oo gẹ mu nọ ndzu gẹ mu nọ iya-a; bụ g'ọ bụ ire-lanụ; lẹ mu e-woru ngu haaru mgbugbumadzu. Eshinu egbu ochi ta adudu ngu eji bẹ bụ ochi ono a-nodu etso ngu purupuru. ⁷Mu e-me úbvú Siye g'ọ dabyiru bụru ochobu; bya egbufukọta ndu anoduje eje iya nggede eje nggede alwa. ⁸Mu e-me gẹ ndu e gbushiru egbushi ji úbvú ngu ejiji. Ndu e gude ogu-echi gbushia bẹ a-daka l'iphe, bụ úbvú úbvú nshii ngu; mẹ lẹ nsuda nsuda; mękpoo lẹ nggele ngu. ⁹Mu e-me ngu g'ị bụru ochobu jasuru asuru; ophu o to dudu onye bya eburu lẹ mkpukpu ngu ozo. Oo teke ono bẹ İi-maru l'ọo mbeđua bụ Chipfu.

¹⁰“Oo kele i gude onu ngu sụ l'oha labo owa-a; mę mkpukpu labo ophuu bẹ a-buru nkengu; mbụ l'unu a-natakọta phe nworu; l'eka mube Chipfu gbẹ nodu l'eka ono. ¹¹Oo ya meru iphe Nnajiuphu, bụ Chipfu gude sụ: Oo gẹ mu nọ ndzu gẹ mu nọ iya bụ g'ọ bụ ire-lanụ lẹ mu a-nụ ngu aphụ rwuberu ngu nụ lẹ k'ashị ono i kporu ndibe mu; mę lẹ k'ehu-eghu; mę k'anya-pfurupfuru, ephe du ngu, bụ iphe goshiru l'ephe dukpoo ngu ashị okpobe adudu. Mu e-me g'unu maru onye mu bụ; teke ono mu a-wata unu anụ aphụ ono. ¹²Oo teke ono bẹ İi-maru lẹ mube Chipfu numakotaru ejo-epfupfu ono, i pfukotaru kpua úbvú úbvú Ízurelu ono. İ sụru: “E mewaru; ephe dabyiru bụru ochobu; e wowaru phe nụ anyi g'anyi vukaa avuka.” ¹³İ gbawaru mu opfu; bya epfugbuwa g'onu haa ngu l'opfu ehu mu; mu tuko iya g'ọ ha numakota.

¹⁴“Wakwa iphe, Nnajiuphu, bụ Chipfu epfu baa: Mu e-me ngu g'ị bụru ochobu g'iphe, bụ mgboko l'opfu tee eswa iya; ¹⁵kele i teru eswa teke e meru alı ndu Ízurelu o bụru ochobu pho; bẹ mu e-me ngu g'ị du egube ono. Gube úbvú Siye; gubedua mę alı ndu Edomu l'opfu bẹ a-buru ochobu. Oo teke ono bẹ ephe a-maru l'ọo mbeđua bụ Chipfu.’”

Opfu epfu anụ úbvú, nọgbaa lẹ Ízurelu

36 ¹“Gube nwa ndiphe; pfuru nụ úbvú úbvú Ízurelu; sụ phe: ‘Unu bẹ úbvú úbvú Ízurelu; unu ngabekwa nchị numa Opfu Chipfu!

²Wakwa iphe, Nnajiuphu, bu Chipfu epfu baa: Oo kele ndu ohogu ngu suru Hee! Nta-a be iphe, bu ubvu ubvu ono, shi le ndiche ono bukotoa-kwa nkanyi.'

³"Eshi ophu o du nno; pfuru nuru mu phe su: 'Wakwa iphe, Nnajiuphu, bu Chipfu epfu baa: Eshinu ephe mewaru; unu dabyiru buru ochobu; mbu mewaa unu umerekete; k'ophu unu buwaa iphe, ohamoha ozo nwe enwewe; bya emee; ndiphe vua unu swii; epfuru unu ejo-opfu; ⁴bu g'unube ubvu ubvu Izurelu; numa opfu Nnajiuphu, bu Chipfu. Wakwa iphe, Nnajiuphu, bu Chipfu epfuru eze ubvu, nogbaa nu; me ubvu nshii, nogbaa nu; me nggele nggele; me nsuda nsuda; me iphe, bu ochobu ono, dabyikotaru egube ono; me iphe, bu mkpukpu ono, a kwafukotaru akwafu ono; mbu onoya, ohamoha, no-pheru iya mgburugburu lwuru alwulwu; bya emee ya iphe ochi ono bu owa.

⁵"Wakwa iphe, Nnajiuphu, bu Chipfu epfu baa: Mu gudeakwa ehueghu enwu mu phuruphuru l'ehu g'oku pfuru maberu iphe, bu ohamoha ndu ophu phoduru nu pho; me iphe, bu ndu Edomu l'ophu; kele ephe gudewaa ehue-utso; me iwashi, no phe l'obu mee ali mu; o buru nkephe; k'ophu ephe a-lwu aka eku akpaje nri, no l'ali ono alwulwu.'

⁶"Oo ya bu; pfuaru mu phe ge k'ali Izurelu a-du; pfuaru eze ubvu, nogbaa nu; me ubvu nshii, nogbaa nu; me nggele nggele; me nsuda nsuda, nogbaa nu; su phe: Wakwa iphe, Nnajiuphu, bu Chipfu epfu baa: Mu gudewaa oke-ehue-eghu enwu mu phuruphuru l'ehu g'oku; pfua opfu; kele ohamoha be mekotawaru ngu iphe-iphere. ⁷Oo ya bu le-a; wakwa iphe, Nnajiuphu, bu Chipfu epfu baa: Mu ribuakwaru angu l'iphe, bu ohamoha ono, no-phekotaru unu mgburugburu ono be ee-me iphe-iphere. ⁸Ole unubedua, bu ubvu ubvu Izurelu be a-pfukashi ekali; miaru ndibe mu Izurelu mebyi; kele ephe abyawaa alwa unuphu. ⁹Mu arikwaru unu oriri k'oma. Mu e-gude k'oma ghaaru unu iphu. Ee-mechaa ko unu akoko; kua unu ge mebyi iphe. ¹⁰Mu e-mekwapho ge ndu bu l'ime ngu kabaa igwerigwe; mbu ndu Izurelu l'ophu. Iphe, bu mkpukpu ono be ee-buchishikota ebuchishi; l'a kpukwakota iphe, bu aka o dakposihukotaru adakposihui. ¹¹Mu e-mekwapho ge nemadzū; me eku kabaaru unu igwerigwe; ephe azua azuzu ka l'otu. Mu e-me g'e buchishia unu egube ono, e shi buru l'ime unu ono. Mu abya emee g'iphe duru unu le ree; eme le g'o shi duru unu teke ono. Oo ya bu g'unu amakwanuru l'oo mu bu Chipfu. ¹²Mu e-me ge nemadzū; mbu ndibe mu, bu ndu Izurelu zo okpa l'eli unu. Ephe enweru unu; unu aburu okiphe phe. Ophu unu ta abyadu emebaa phe ume nwa ozo.

¹³"Wakwa iphe, Nnajiuphu, bu Chipfu epfu baa: "Eshinu ndiphe epfu l'unu egbuje nemadzū; teme unu nodu eme ali unu ume nwa;" ¹⁴be unu ta abyakwa egbushibaa nemadzū ozo; ophu unu abyadu emebaa ali unu ume nwa ozo. Nokwa iphe, Nnajiuphu, bu Chipfu epfu. ¹⁵Mu ta abyadu

ekwe g'unu n̄mabaa ejo-opfu ohamoha epfu ekpu unu ozo; mbu le mu te ekweedu g'ephe mee unu iphe-iphere ozobaa; ophu mu ekweekwapho g'unu vukotaba iphe daa. Nokwa iphe, Nnajiuphu, bu Chipfu epfu.' ”

16 No iya; Opfu Chipfu byakwa akparwuta mu lehu bya asu mu: 17 “Nwa ndiphe; teke ndu Izurelu shi buru l'ali nkephe be ephe gudekwa umere phe; waa iphe, ephe meru pharwushia ya. Umere phe be shikwa du mu ideyideyi ge teke nwanyi ano nso-nwanyi. 18 Oo ya bu; mu tuko-shinu phe oke ehu-eghu mu; kele ephe gbushiru nemadzu l'ali ono; bya egude agwa, ephe agwaphe merwushia ya. 19 Mu chikashia phe ephe dzuru ohamoha; ephe gbakashihu tuko iphe, bu mkpukpu le mkpukpu tsoru. Mu kperu phe ikpe g'umere phe; waa iphe, ephe meru gbaru. 20 Iphe, bu eka ephe jeru l'ohamoha ono be ephe emeje eepfubyishi epha mu, du nso ono; kele aasuje phe: ‘O kwa ndibe Chipfu du egube-a; teme ephe gbete lufuta l'ali iya.’ 21 O bya erwua mu lehu; mbu k'epha mu, du nso ono, ndu Izurelu meru anodu epfubyishi l'echilabo ohamoha ono, ephe laru ono.

22 “Oo ya bu; su ndu Izurelu: wakwa iphe, Nnajiuphu, bu Chipfu epfu baa: ‘O to bukwa k'opfu ehu unube ndu Izurelu be mu gude abya eme iphe-a; oo k'epha mu, du nso ono, unu rwutoshiru arwutoshi l'echilabo ohamoha ono, unu lakotaru ono. 23 Mu e-me goshi leze epha mu ono paru eka apaa ono du nso; mbu onoya, e mebyishiru l'echilabo ohamoha ono; mbu epha mu ono, unu mebyishiru l'iphu phe ono. Oo ya bu g'ohamoha ono amakwanuru loo mu bu Chipfu; mbu teke ono, mu e-gude unu goshi phe le mu du nso ono. Nokwa iphe, Nnajiuphu, bu Chipfu epfu. 24 Noo kele mu a-nafuta unu leka ohamoha ono. Mu e-rwukobekota unu e shi l'ali, nonu; dulata unu l'ali nkunu gedegede. 25 Mu abya ephee unu mini, doru riasa; unu abya adu ree; mu a-safukota unu ejo-iphe unu, meshiru; mekpoo agwa, unu gwaru go ha. 26 Mu a-nu unu obu ophutu; bya eye unu unme ophutu l'ime; mu e-wofu unu obu ono, nmaru kpigbi ge mkpuma ono; nu unu obu belebele. 27 Mu e-woru Unme mu ye unu lehu; mee unu g'unu meahaa iphe, mu suru ge meje; unu abya eleta enya meahaa ekemu mu. 28 Unu e-buru l'ali ono, mu nuru nna unu oche phe ono; unu a-buru ndibe mu; mu a-buru Chileke unu. 29 Mu a-dzota unu g'unu te emehete ejo-ememe ono, unu eme ono. Mu e-ku nri oku; mee ya go kuru akuru; ophu mu ta abyadu eme gejo okpa-nri dapfuta unu. 30 Mu e-me goshi-omi ka ami mebyi; bya emee g'iphe, e meberu l'ali mehu emehu; k'opfu ohamoha e-mebuhu unu iphe-iphere l'opfu egu. 31 Oo teke ono be unu a-nyata ejo uzo ono, unu tsoru ono; me iphe, adudu ree ono, unu eme ono; unu abya adu onwunu ashi le k'ejo-iphe ono, unu eme ono; me ebyi ono, unu eme ono. 32 Wakwa iphe, Nnajiuphu, bu Chipfu epfu baa: Iphe, mu eme g'unu maru bu lo to budu iswi ehu unu be mu gude eme iya. Ophu g'iphere du unu; mbu g'iphere ji unu iphu, lejo-ememe unube ndu Izurelu eme!

33 “Wakwa iphe, Nnajiuphu, bu Chipfu epfu baa: Mboku ono, mu asafu unu ejo-iphe, unu mekotaru ono be mu e-me g'e buru le mkpukpu

unu ono ọzo; a bya akpukwa ẹka dakposhihu adakposhihu. ³⁴Egu ono, shi buru ẹka dabyiru ke mmanu ono be aa-kohaa iphe; ọobu-buhuru ẹka dabyiru ke mmanu; l'anya ndu aghata aghata. ³⁵Teke ono be ephe a-sua-ha: "Alì-a, shi buru ẹka dabyiru ke mmanu-a be gbẹ dūwanu ge mgbabu Ẹdenu. Mkpukpu, shi dakposhihu adakposhihu; buru ochobu; e mebyishia ya emebyishia be a gbẹ kpūwa; o shihu ike; teme e buchishikotawa iya nu ebuchishi." ³⁶Noo teke iphe, bu ohamoha, phoduru nu, bupheru unu mgburugburu a-maru l'oo mube Chipfu be kpukwaru iphe ono, e shi nwukposhia enwukposhi ono; bya adzaphukota iphe azu l'eka ono, shi buru ochobu ono. Mbedua, bu Chipfu be pfuakwaru nu; mu je e-me iya.'

³⁷"Wakwa iphe, Nnajiuphu, bu Chipfu epfu baa: Mu e-kweta ọzobakwa meeru ndu Ẫzurelu iphe, ephe arwo. Mu e-me g'ephe zu azuzu ha igwerigwe g'igwe aturu; ³⁸mbu g'ephe ha igwerigwe g'ikpoto aturu, e gude abya egwe ngweja le Jierusalemu l'obo-iphe, a turu onu iya. Oo egube ono be ikpoto nemadzu e-ji mkpukpu ono, shi dakposhihu adakposhihu ono. Oo ya bu g'ephe a-makwanuru l'oo mu bu Chipfu."

Nsuda, ojogorogo okpu jiru ejiji

37 ¹Ike Chipfu bya akparwuta mu l'ehu. Unme Chipfu bya ekuta mu je apfube l'echilabo nsuda lanu. Nsuda ono buerupho okpu nemadzu jiru iya ejiji. ²O duta mu; jephekota okpu ono mgburugburu. Mu huma okpu, du igwerigwe l'ime nsuda ono. Okpu ono kpohekotachaa iyoro g'ephe ha. ³O bya aja mu su mu: "Nwa ndiphe; ?okpu-a; o nweru g'o shi du ike teta noduba ndzu ozo to?"

Mu su iya: "Oo gube Nnajiuphu, bu Chipfu be maru nu kpoloko."

⁴No iya; o su mu: "Pfurumaberu mu okpu ono; su phe: Unube ojogorogo okpu; unu ngabe nchi numa Opfu Chipfu! ⁵Wakwa iphe, Nnajiuphu, bu Chipfu epfuru unube okpu-a baa: Mu e-me g'unme bahu unu l'ehu; k'ophu unu a-bya adzuru ndzu. ⁶Mu e-ye unu akwara l'ehu; mu abya emee g'unu nweru anu-ehu; mu abya ekwee unu akpo l'ehu; woru unme ye unu l'ehu; unu abya anodu ndzu. Oo ya bu g'unu a-makwanuru l'oo mu bu Chipfu."

⁷Tobudu iya bu; mu bya epfua g'o suru ge mu pfua ono. Mu kpukwaduru-a opfu ono l'onu epfu; g'e jia epfu-a; a nuahaa ukporo iphe, azu jogoro-jogoro; okpu ono bya edepfubekota; ophu nonu dzepfuru l'ibe iya.

⁸Mu bya ele enya; akwara me anu nodukotawa iya; akpo bya ekwekotawa iya nu; ole ephe ta atukwanu unme.

⁹O bya asu mu: "Pfurumaberu mu unme; pfuru nu iya; nwa ndiphe; su iya; Wakwa iphe, Nnajiuphu, bu Chipfu epfu baa: Ge gube unme shikwa l'ishi uzo eno, pherephere eshije ezi; bya ezia le ndu-a, e gbushiru egbushi-a g'ephe nodu ndzu ozo."

¹⁰Tobudu iya bu; mu pfua g'a suru ge mu pfua ono; unme bya abahu phe l'ehu; ephe bya anodu ndzu; bya agbeshi pfuru apfuru; buru ikpoto

ndu ojogu, parụ ẹka apaa. ¹¹Oo ya bụ; ọ sụ mu: “Nwa ndiphe; ọkpụ-a bụ ndu ọnu-ulo Ízurelu l'ophu. Ẹphe epfu sụ: ‘Ọkpụ anyi kpohukotawaru iyo-roro; ọphu o to nweedu iphe, anyi ele ọnya iya; nkanyi bẹ bvụakwaru nù.’ ¹²Oo ya bụ; pfuru maberu mu phe; sụ phe-a: Nnajiuphu, bụ Chipfu sụru: ‘Unubẹ ndibe mu; mu e-kpuhakota ilu unu; mee g'unu shi l'ime iya lufuta; mu eduta unu duba l'alị Ízurelu.

¹³“ ‘Oo ya bụ; g'unubẹ ndibe mu amaru l'oo mu bụ Chipfu lẹ teke ono mu kpuhaerupho ilu unu dufutagbaa unu l'ime iya ono. ¹⁴Mu e-woru Unme mu ye unu l'ehu; unu abya anodu ndzụ. Teke ono bẹ mu e-duta unu dobe l'alị unu gẹdegede. Noo teke unu a-maru lẹ mube Chipfu bẹ pfuru iya; bya emee ya ememe. Oo egube ono bẹ Chipfu pfuru iya.’ ”

Ízurelu a-buru ndu lanụ, nweru onye eze lanụ

¹⁵Opfu Chipfu bya akparwuta mu l'ehu sụ mu: ¹⁶“Nwa ndiphe: Wota oshi lanụ dee ya iphe-a: ‘Owaa bụ kẹ ndu Jiuda yee ndu Ízurelu, bụ ndu yee ya tughbaru buru nanụ.’ Lị bya ewota oshi ozo bya edekwaa ya pho iphe egube-a: ‘Owaa bụ oshi kẹ Ifuremu, mbụ oshi Jiósefu; mẹ kẹ ndu Ízurelu l'ophu, bụ ndu yee ya tughbaru buru nanụ.’ ¹⁷Woru phe chigbabe g'ephe buru oshi lanụ. Mee phe g'ephe buru oshi lanụ l'obochi ẹka ngu. ¹⁸Teke ndibe unu jiru ngu sụ ngu: ‘?Tji kaduru anyi iphe, iphe ono, iime ono bukpo?’ ¹⁹Sụ phe lẹ Nnajiuphu, bu Chipfu sụru-a: Mu abya ewota oshi kẹ Jiósefu, bụ ọphu Ifuremu gude l'eka ono; mekpoo k'iphe, bụ ipfu Ízurelu, bụ ndu ephe l'iya swi; woru iya tughbabe l'oshi kẹ Jiuda; mee phe g'ephe buru oshi lanụ nodu mu l'eka.

²⁰“Oshi ono, i decharu iphe ono bẹ ii-gude l'eka g'ephe hụma iya. ²¹Lị bya asụ phe; Wakwa iphe, Nnajiuphu, bụ Chipfu epfu baa: Mu e-dufuta-kota ndu Ízurelu l'iphe, bụ ohamoha, ephe lakotaru. Mu e-shi l'ekameka rwukobe phe; duta phe duba l'alị nkephe. ²²Mu e-me phe g'ephe buru ndu lanụ l'alị ono, no l'ubvú ubvú Ízurelu ono. O buru onye eze lanụ a-nodu achikota phe. Ẹphe ta abyadu abubaaru ndu labo ozo; ọphu ephe ta abyadu ekekahabaa buru alị-eze labo ozo. ²³Ẹphe ta abyadu egudebaa agwa phe; mẹ iphe, aaso nso, ephe agwaphe; merwushia onwophe ozo; ọphu ephe egudehedu ejo-ememe merwushia onwophe; kele mu a-dzota phe l'ejo-iphe ono, ephe gude laphu azu ono; mu abya asa phe; ephe aburu ndibe mu; mu aburu Chileke phe. ²⁴O buru nwozi mu, bụ Dévidi bẹ a-buru eze, achị phe. Ephe e-nweru onye lanụ, a-nodu eche phe g'onye eche aturu. Ephe a-nodu eme ekemu mu; bya eleta ọnya eme iphe, mu sụru g'e meje. ²⁵Ẹphe e-buru l'alị ono, mu nuru onye-ozu mu, bụ Jiékpọu ono; mbụ alị ono, nna unu phe shi buru ono. Ẹphebedua; mẹ unwu phe; mẹ unwu nwanwanwanranwa phe bẹ e-buru l'eka ono jasuru asuru. O buru Dévidi, bụ nwozi mu bẹ a-buru onye-ishi phe jeye l'ojejoje. ²⁶Mu l'ephe a-gba ndzụ ehu-guu. Oo-buru ogbandzu, a-duru phe jaswaruroya. Mu e-me

g'ephe buru; mee phe g'ephe zu azuzu. Mu abya eworu ulo-nsò mu dobe l'echilabò phe jasuru asuru. ²⁷Mu l'ephe a-tùko buru. Mu a-buru Chileke phe; ephebedua abukwanuru ndibe mu. ²⁸Oo teke ono be ohamoha a-maru l'oo mbedua, bu Chipfu be meru ndu Izurelu g'ephe du nsò; mbu teke ono ulo-nsò mu a-nòdu l'echilabò phe jasuru l'ojejeje ono.”

Iphe, e-me Gogu

38 ¹Tòbodu iya bu; Chipfu bya epfuru opfu yeru mu su: ²“Nwa ndiphe; ghachiru Gogu iphu le ke njo; mbu onye ono bu onye-ishi ndu Mesheku waa ndu Tubalu; ³su iya: ‘Wakwa iphe, Nnajiuphu, bu Chipfu epfu baa: Mu noakwaru ngu le njo; gube Gogu, bu onye-ishi ndu Mesheku waa ndu Tubalu. ⁴Mu a-lo-phe ngu mgburugburu; gude ikekee dzugbabe ngu agba; lofuta ngu; mekpoo ndu ojogu ngu l'ophu; me inya ngu; me ndu agba l'inya, bu ndu kwakotaru onwophe ngwogu rengurengu; mbu ikpoto nemadzu, bu ndu ophu pagbaa iphe, eegudeje egbobuta onwonye, ophu hagbaa shii; me ndu ophu hagbaa nwanshii. Ephe tuko g'ephe ha ephegbaa ugu-echi phe ke pheremu pheremu.

⁵“Ndu Peshiya; me ndu Kushi; me ndu Putu be tsokota phe nu; ephe pakota iphe, eegudeje egbobuta onwonye; bya ekpuchaaru okpu-igwe. ⁶Egube ono be ndu Goma e-rwuta ndu ojogu phe tsokwaru ngu pho. Ndu Betu-Togarama, shi l'ime ime uzo isheli be e-rwukokwapho ndu ojogu phe tsoru ngu; mbu ohamoha, du igwerigwe a-turu ikè yeru ngu. ⁷Rukotakwa onwongu; kwagebekwa akwagebe; unu l'ikpoto ndu ono, no-pheru ngu mgburugburu ono; buru phe onye-ishi-ogu. ⁸A -nochaepho odu be ee-ku ngu k'ogu. Lapha, du l'iphu be ii-je ugu l'alì ono, shi l'ogu eteta eteta ono, bu iya bu alì ono, e shi l'oha, du igwerigwe rwukobe ndu bu iya nu ono; mbu ndu ono a chikoberu l'ubvú ubvú Izurelu, bu eka shihawaa dabyitaru buru ochobu ono. Ndu ono be e shi l'ohamoha ozo dufuta phe; ephe tuko buru l'ehu-guu. ⁹Gubedua waa ndu ojogu ngu l'ophu; me iphe, bu oha, du igwerigwe ono, etsokota ngu nu ono be e-zelihu g'oke pherephe-re; unu abya eswetakota alì ono g'urwukpu.

¹⁰“Wakwa iphe, Nnajiuphu, bu Chipfu epfu baa: Le mboku ono be onweru oriri, a-gbabata ngu l'obu; li wata agba idzu ejo-iphe. ¹¹Ii-su: Mu e-je alwu alì, e te gudedu igbulò kpu-butu mkpukpu, no iya nu ono. Mu e-tso ndu ono, no l'ehu-guu ono ugu; mbu ndu ono, bu tusaru ehù ono. Ephe bukota le mkpukpu, e te gudedu igbulò kpu-butu; ophu o to dudu oguzo, e gude agu-chi iya agu-chi; teme ophu o nwedu mgborigwe, e gude agbachi iya. ¹²Mu a-lwu phe alwulwu; gwee iphe phe; mbu ghazia eka dabè l'eka ono, bu ochobu, a lwaru azu bya eburu ono; waa ndu ono, e shi l'ohamoha rwukobe ono; mbu ndu ono, nweru eku; me iphe-enweru ozo, bu ndu bu l'echilabò alì ono. ¹³Ndu Sheba; me ndu Dedanu; yee ndu agba oke-ngho, shi Tashishi; mekpoo mkpukpu phe l'ophu be a-ji ngu su:

“?I byawaru g'i gwee tutua? ?I ch'wa ikpoto oha ngu g'i bya akwaa okwata; mbu g'i bya evua mkpola-ochaa me mkpola-ododo; g'unu kpkoo eku; kwatakpo kwaa iphe l'okwata to?”

14 “‘Oo ya bu; nwa ndiphe; pfuru nuru mu Gogu; su iya: Wakwa iphe, Nnajiuphu, bu Chipfu epfu baa: Teke ndibe mu e-buru l'ehu-guu ono be ii-zilihu; 15 shi l'eka i shi, du enya l'uzo isheli bya; mbu gubedua; waa oha, du igwerigwe, unu l'ephe swi. Ephe bu ndu agbakota inya; mbu ikpoto nemadzu, bu igwerigwe ndu ojogu. 16 Unu a-bya eji ali ono; so-kpote ndibe mu, bu Izurelu g'onye urwukpu sopyaberu. Latatiphu be mu e-duta gube Gogu; li bya etso ndu ali mu ogu. Oo ya bu g'ohamoha amaru mu; teke ono mu e-shi l'ehu ngu goshi phe le mu du nsu ono.

17 “‘Wakwa iphe, Nnajiuphu, bu Chipfu epfu baa: ?To buna gubedua be mu shi l'onu ndu-ozu mu, bu ndu mpfuchiru Chileke Izurelu pfua opfu ngu le teke ndiche-a? Teke ono be ephe pfukwaru iya apha, du igwerigwe su le mu e-mechaa gude ngu dapfuta phe.

18 “‘Waa iphe, e-me nu le mboku ono baa: “Teke Gogu byaerupho alwushi ali Izurelu ogu be ehu-eghu mu a-taliu; mbu kpohu oku. Nokwa iphe, Nnajiuphu, bu Chipfu epfu. 19 Mu gudewaa g'ophu-beru mu l'ehu; waa oke ehu-eghu mu raa ya arara l'oke ali-onma-jijijiji be a-du l'ali Izurelu le teke ono. 20 Teke ono be iphe, bu ema, no le mini; me enu, ephe l'eli; me anu-egbudu; mekpoo iphe, bu anu, awu awuwu l'ali; mekpoo iphe, bu ndu no le mgboko-a e-tehukota kparikpari l'iphu mu. Iphe, bukota ubvu be a-ghakota igharaphu; iphe, bu agbara mkpuma a-vok-poshihukota; iphe, bu igbulu a-dashikota gburugudu l'ali. 21 Teke ono be mu e-me g'e shigbaa l'ubvu mu gude ogu-echi bapfuta Gogu. Nokwa iphe, Nnajiuphu, bu Chipfu epfu. Nwoke nonu e-gude ogu-echi nkiya tsopyabe nwune iya nwoke. 22 Mu e-gude ejo iphe-ememe; waa egbu-ochi nu ya aphu. Mu abya edzee oke mini nmaa yee igwerigwe ndu ojogu iya; me iphe, bu ohamoha, ephe l'iya swi; bya atua phe akamini-mkpuma; bya ekpukposhi phe oku-nshiegbe, enwu phuruphuru. 23 O buru egube ono be mu e-gude goshi ge mu habe shii; waa ge mu du-be nsu. Mu e-me g'ohamoha maru onye mu bu. Oo teke ono be ephe a-makwanuru l'oo mbedua bu Chipfu.”

39 1 “Nwa ndiphe; pfuaru mu Gogu g'oo-duru iya; su: ‘Wakwa iphe, Nnajiuphu, bu Chipfu epfu baa: mu noakwaru ngu le njo; gube Gogu, bu onye bu ishi ndu Mesheku; me ke ndu Tubalu. 2 Mu a-lo-phe ngu mgburugburu; kpata ngu ke karakara tugbua. Mu eje avofuta ngu l'uzo isheli bu eka du enya ono; duru ngu g'i je etso ndu bu l'ubvu ubvu Izurelu ogu. 3 Mu e-chifu ngu uta, i gude lekicha; bya eme g'apfu, i gude lekutara nafu ngu daa. 4 Oo l'ubvu ubvu Izurelu be ii-da; unu le ndu ojogu ngu; mekpoo ohamoha ono, tso ngu nu ono. Mu e-woru unu nu unwenu, du iche iche g'ephe ria; bya ewokwarupho unu tularu anu-egbudu. 5 Unu a-da

l'eba l'egbudu. O kwa mbedua pfuru iya. Nokwa iphe, Nnajiuphu, bu Chipfu epfu. ⁶Mu e-ye oku le Magogu; me ndu ophu bukota l'ehu-guu l'aguga eze-enyimu ono. Oo ya bu g'ephe amakwanuru l'oo mu bu Chipfu obu. ⁷Mu e-me ge ndibe mu, bu ndu Izurelu maru epha mu, du nsọ ono. Ophu mu ta abyadu ekwebaa g'e mebyishia epha mu ono, du nsọ ono ozo; teme iphe, bu ohamoha a-maru l'oo mbedua, bu Chipfu, bu onye ono, du nsọ ono, no le Izurelu.

⁸“Oobyakwa-a! O mefutajekwa. Nokwa iphe, Nnajiuphu, bu Chipfu epfu. O kwa iya bu mboku obu mu pfuru iya opfu iya obu. ⁹Oo teke ono be ndu bu le Izurelu a-wu-lihu je evukoo ngwogu phe gude mee nkụ, eeye l'oku; woru iya kpokota oku. Ephe a-chita iphe, ndu ono, egudeje egbobuta onwophe ophu ha shii; me ndu ophu ha nwanshii; me uta; yee apfu; me mgboro-ogu; mekpoo arwa phe. Ephe e-gude ngwogu ono shikota iphe apha esaa mgburugburu. ¹⁰Ephe ta abyadu ejebaa akpata nkụ l'egbudu; ozo je awata nkụ l'oswa; kele ngwogu ono a-buru nkụ, ephe egudeje eshi iphe. Ndu ono, gwejeru iphe phe tutua ono be ephe e-gwekwapho nkephe tutua; ndu ono kwajeru iphe l'okwata ono be ephe a-kwalatakwaphe nkephe l'okwata. Nokwa iphe, Nnajiuphu, bu Chipfu epfu.

¹¹“O buru le mboku ono be mu a-nu Gogu eka ee-li iya le Izurelu; le nsuda ndu ije; mbu le nsuda, no l'uzo enyanwu-awawa eze-enyimu ono. Kele oo l'eka ono be ee-li Gogu yee ikpoto oha iya; ee-gude phe lichia uzo, ndu-ije. Oo ya bu ee-kuahaa eka ono “Nsuda Ikpoto Ndu Gogu”. ¹²Ndu Izurelu e-li odzu phe onwa esaa; shi nno mee g'a ta sohe ali ono nsọ. ¹³Ndu bukota l'ali ono g'ephe ha be a-tuko phube iphu wata phe elili. Mboku ono, mu e-goshi le mu du biribiri ono be aa-kwabẹ phe ubvu. Nokwa iphe, Nnajiuphu, bu Chipfu epfu. ¹⁴Onwa esaa -lachaephe be ee-ye ndu iphe a-buru ozi phe bu g'ephe tsojeru ndu-ije gbapheje ali ono; ephe -huma odzu, a gbadoru l'eli ali; ndu-ozu ono eworu iya lia. Ephe eshi nno mee g'a ta sohe ali ono nsọ. ¹⁵Teke ephe a-nodu agbaphe ali ono be onye humaru okpu nemadzu e-meje iphe-ohubama l'aguga eka okpu obu no; jasụ teke ndu elije odzu e-wota iya je elia le Nsuda Ikpoto Ndu Gogu. ¹⁶Mkpukpu, eeku Hamona be a-nodukwaphe l'eka ono. O buru g'ephe eshi bu ono ephe eme ali ono g'a so-buhu iya nsọ.’

¹⁷“Nwa ndiphe; wakwa iphe, Nnajiuphu, bu Chipfu epfu baa: Kua unwenu, du iche iche oku; me anu-egbudu; su phe: ‘unu tukocha shi l'eka unu no bya edzokobe; bya eria eja, mu abya egwegwe; mbu eze eja ono, ee-gwe l'ubvu ubvu Izurelu ono. Eka ono be unu a-ta anu; ngua mee. ¹⁸Unu a-ta anu ndu okpehu du; ngua mee ndu-ishi mgboko-a; mbu g'ephe bu ebili; ozo aturu; ozo eghe; ozo oke-eswi, tsucharu eba, shi l'ali Beshanu. ¹⁹Eja ono, mu abya egweru nu unu ono be unu a-ta eba-iphe jasụ o-tushihu unu ayi; unu angua mee jasụ ootsua unu ge mee. ²⁰Unu a-nodu le teburu mu taa anu inya l'ooji unu epho; me anu ndu agba iya nu;

mẹ anụ ndu ọkpehu dị; ọmẹ ndu ọjọgu, ọmẹ iche iche.’ Nokwa iphe, Nnajiuphu, ọmẹ Chipfu epfu.

²¹ “Mu e-goshi ọhamoha ọdu-biribiri mu; ọmẹ ọhamoha a-hụma aphụ, mu nuru pẹ; waa gẹ mu gude daberu pẹ ẹka l’ẹhu kẹ njo. ²²E -shi mbọku ono kwaseru ọmẹ ndu Ízurelu a-maru l’ọo mu ọmẹ Chipfu, ọmẹ Chileke pẹ. ²³Iphe, ọmẹ ọhamoha ọmẹ a-maru lẹ ndu Ízurelu ọmẹ a kpuru lẹ ndzụ laa alí ọzo; kẹle ẹphe meru iphe-ẹji; ọpflu mu egudeedu ire pẹ ẹka. Ọ bụru iya meru iphe, mu wofuru iphu l’ẹka ẹphe nọ; nwuru pẹ nọ ndu ọhogu pẹ; ẹphe gude ogu-echi gbushikọta pẹ. ²⁴Mu wohaarụ pẹ iphu mu; shi nno gwaa pẹ ụgwọ emewushi, ẹphe merwushiru onwopẹ ono; waa ẹjo-ememe, ẹphe mekotaru ono.

²⁵ “Ọo ya bụ; wakwa iphe, Nnajiuphu, ọmẹ Chipfu epfu baa: Mu e-je eshi l’ẹka a kpuru Jiékpọ lẹ ndzụ laa; je eduphuta iya azụ. Mu a-bya aphuaru ndu Ízurelu l’ophu obu-imemini. Mu abya anwuberu ẹpha mu ono ọmẹ nsọ ono ẹnya. ²⁶Ẹphe a-zọhakota iphe-iphere ono, e meru pẹ ono; ọmẹ ghele-gheleghere ono, ẹphe ọmẹ teke ono ẹphe bu túsaru ẹhu l’alí pẹ ono; ọpflu ọmẹ ọmẹ ọmẹ byaru eyee pẹ ebvu ono. ²⁷Teke mu shiepho l’ọhamoha ono dulata pẹ; bya eshigbaa l’alí ndu ọhogu pẹ dufuta pẹ; ọmẹ mu e-shi l’ẹhu pẹ goshi ọmẹ, ọmẹ igwerigwe lẹ mu ọmẹ nsọ. ²⁸Ọo ya bụ; ẹphe a-makwanuru l’ọo mbẹdua ọmẹ Chipfu, ọmẹ Chileke pẹ; kẹle ọmẹ bụchakpo eviya l’ọo mu meru g’a kpua pẹ lẹ ndzụ lashigbaa ọhamoha; obenu lẹ mu e-duphuta pẹ azụ l’alí pẹ; ọpflu ọmẹ tọ ọmẹ m’onye lanu, mu a-ha l’ẹka ono. ²⁹Mu ta abyadu ewohabaaru pẹ iphu mu ọzo; noo kẹle mu a-wuu ndu Ízurelu Unme mu.” Nokwa iphe, Nnajiuphu, ọmẹ Chipfu epfu.

G'eze-ulo ọphúú Chileke ono ọmẹ

40 ¹Ọ be l’apha, kwe anyi ụkporo apha l’apha ise; eshi teke a kpuru anyi lẹ ndzụ; mbụ g’apha ono awata awata; l’abalí k’iri l’ime ọmẹ ono; mbụ l’apha, kwe apha iri l’eno g’a lwutacharu mkpukpu ono. Ọ bụru lẹ mbọku ono gẹdegede ọmẹ ike Chipfu byaru mu l’ẹhu; bya eduta mu je edobe l’ẹka ono. ²Ọ bụru gẹ mu aphụ ọpfulenya, Chileke meru; gẹ mu wata aphuphu ono; ọmẹ ọmẹ dutaru mu jeshia l’alí Ízurelu; je edobe mu l’eli úbvú, ha l’eli shii. Úbvú ono ọmẹ ọmẹ ọmẹ ọmẹ l’uzo ndohali iya; ọmẹ ọmẹ mkpukpu. ³Ọo ya bụ; ọmẹ ọmẹ ọmẹ mu jerwua l’ẹka ono; mu hụma onye ụgbugba iya ọmẹ g’onyirubvu; onye ono ọmẹ ọmẹ ọmẹ ọmẹ ọmẹ; ọmẹ ọmẹ eri oghu ọmẹ l’ẹka; bya egudekwapho mgboro, eegudeje atụ ogologo iphe. ⁴Onye ono sụ mu: “Nwa ndiphe; bya egude ẹnya ngu hụma; l’iibya egude nchị ngu numa. Lerweta ẹnya ọkpobe elerweta l’iphe-miphe-a, mu abya ngu egoshi-a; kẹle ọo ya kparụ iphe, e gude ọmẹ ọmẹ g’i bya l’ẹka. Kọkotaru ndu Ízurelu iphemiphe, i hụmaru.”

Ọnu-abata ọmẹ ẹnyanwu-awawa

⁵Mu bya ahuma igbulọ, e gude kpụ-pheta eze-ulo Chileke ono mgburugburu. Ogologo mgboro ono, eegudeje atụ iphe, nwoke ono gude l’ẹka

ono be du nkwo-oshi-eka; le nkwo-obochoi-eka; mgbo ishii. O bya atua g'igbidigbi igbulo ono habe; o buru ogologo mgboro ono be o du l'igbi; o bukwarupho mgboro ono ugbo lanu be o du l'eli iya.

⁶O bya eje l'onu-abata ophu gharu iphu l'uzo enyanwu-awawa. O bya enyikota eka eeshije abahu iya; bya atua iphe l'onu onu-oguzo ono; ogologo iya buru mgboro ono ugbo lanu. ⁷Nkulahu eka ndu nche anoduje be ogologo iya bukota mgboro ono ugbo lanu; osa iya bukwarupho mgboro ono ugbo lanu. Uzo, nogbaa le mgbaka nkulahu ono be du nkwo-eka ise. Onu eka eeshije abahu le mkpuru onu-oguzo ophu gharu iphu l'uzo ezeulo ono be ogologo iya bu mgboro ono nanu.

⁸O tuta iphe le mkpuru onu-oguzo ono; ⁹o du nkwo-eka esato. O bya atua iphe l'igbidigbi oshi mgbo, e yeru iya; o du nkwo-eka labo. Mkpuru onu-oguzo ono be no gha iphu l'ime ulo.

¹⁰Onu-abata ophu gharu iphu l'uzo enyanwu-awawa be nweru nkulahu eto eto, nochaa ya ibekeboebo. Ephe no eto ono hakota enya nhamunha; igbulo, nokahagbaaru iya nu libekeboebo ono be hakota enya nhamunha. ¹¹O bya atuta iphe logologo onu-oguzo, no iya nu; o du nkwo-eka iri leto; osa iya du nkwo-eka iri. ¹²Lonu nkulahu ono gephe hakota be a kputagbaaru igbulo, du nkwo-eka lanu dobe l'onu-abata. Nkulahu ono gephe ha be iphe, ephe dukota bu nkwo-eka ishii; ishishi iya uzo eno hakotaru enya nhamunha egube ono. ¹³O bya eshi l'igbulo nkulahu, no l'eka lanu tua iphe jeye l'igbulo nkulahu, no l'eka iya ophuu; o du ukporo nkwo-eka le nkwo-eka ise; mbu shita l'ishi igbulo ophuu jasu l'ishi igbulo ophuu. ¹⁴O bya atua iphe le mkpuru onu-oguzo ono; o du nkwo-eka ukporo. Onu-oguzo ono be no gbahee itso oma-unuphu ono. ¹⁵Shita l'iphu onu-oguzo jeye l'ishi mkpuru onu-oguzo ono be du ukporo nkwo-eka labo le nkwo-eka iri. ¹⁶Nkulahu ono; me igbulo, nokahagbaaru iya nu be nwekotaru windo, uzo dugbaa ke werere werere; o buru egube ono be o nokota le mkpuru ulo ono mgburugburu. Windo ono go hakota be ghakotaru iphu l'ime. Iphu igbulo ono, kebushigbaaru nkulahu ono go hakota; be e seshigbaaru mpfu l'eli iya.

Oma-unuphu k'etezi

¹⁷O bya edubata mu letezi oma-unuphu ono; mu humagbaa mkpuru; me eka a wukotaru mkpuma gbaa mgburugburu letezi oma-unuphu ono. Eka ono, a wukotaru mkpuma ono be a kporo mkpuru ukporo l'iri giriri. ¹⁸Mgbureku onu-oguzo ono be a wukotaru mkpuma ono. Mgbureku onu-oguzo ono be ogologo iya yee uswekete iya haepho. Eka ono be phoru olu. ¹⁹O bya atua iphe shita laabata-aghachi onu-oguzo ono jasu l'atatiptu oma-unuphu ono; o du ukporo nkwo-eka ise l'eka iya k'uzo enyanwu-awawa; me eka iya k'uzo isheli.

Onu-oguzo uzo isheli

²⁰O bya atuta iphe l'onu-abata ophu gharu iphu l'uzo isheli, bu iya bu ophu shiru lufu letezi oma-unuphu ono; go maru g'ogologo iya; yee

uswekete iya habe. ²¹Nkulahuɗu du iya eto l'eka iya owa-a; bya adu eto l'eka iya ophuu. Igbulo kebushiru nkulahu ono; me mkpuru iya be hakota ge ndu ophuu no l'onu-abata ke mbu pho. Ogologo iya du nkwo-eka ukporo labo l'iri; osa iya du nkwo-eka ukporo l'ise. ²²Windo, nokota iya nu; me mkpuru iya; mekpoo mpfu, e gude memakota iya emema be hakota ge k'onu-abata ophu gharu iphu l'uzo enyanwu-awawa pho. Eka aazobeje okpa abahu iya du mkpopfu esaa; mkpuru iya nodu ghakotaru iya iphu. ²³O nweru onu-abata, eeshije abahu l'ime oma-unuphu ono. Onu-abata ono be gharu iphu l'onu-abata k'uzo isheli; mbu egube ono, o dukwapho l'uzo enyanwu-awawa ono. O shi l'onu-abata tuta iya iphe jasu l'onu-abata, ophu no gharu iya iphu; o buru iphe, oduje bu nkwo-eka ukporo ise.

Onu-abata uzo ndohali

²⁴No iya; o bya eduru mu shia uzo ndohali; mu huma onu-abata ophu gharu iphu l'uzo ndohali. O bya atuta iphe l'igbulo, kebushiru nkulahu, no iya nu; me mkpuru iya; ephe hakota ge ndu ophuu. ²⁵Onu-abata ono; waa mkpuru iya be windo nokota mgburugburu. Windo ono dukota egube windo ndu ophuu du. Ogologo onu-abata ono du nkwo-eka ukporo labo l'iri; osa iya du nkwo-eka ukporo l'ise. ²⁶Eka aazobeje okpa abahu iya du esaa; mkpuru iya nodugbaa l'atatiptu iya. O nwekwarupho mpfu, e gude memashia igbulo, kebushiru nkulahu iya ono, nochaa ya ibekeboebo ono. ²⁷Oma-unuphu k'ime ime be nwekwarupho onu-abata, no gha iphu l'uzo ndohali. O bya eshi l'onu-abata ime oma-unuphu ono tuta iya iphe jasu l'onu-abata uzo ndohali; o du nkwo-eka ukporo ise.

Oguzo, eeshije abahu ime oma-unuphu

²⁸Toɓudu iya bu; o bya eshi l'onu-abata uzo ndohali ono duru mu bahu l'ime oma-unuphu ono. O bya atuta iphe l'onu-abata uzo ndohali ono; o hakwapho ge ndu ophuu. ²⁹Nkulahu, no iya nu; me igbulo kebushiru nkulahu iya ono; me mkpuru iya be hakota ge ndu ophuu. Onu-abata ono; waa mkpuru iya be windo nokota gbaa mgburugburu. Ogologo onu-abata ono du nkwo-eka ukporo labo l'iri; osa iya du nkwo-eka ukporo l'ise. ³⁰Mkpuru, no-pheru ime oma-unuphu ono mgburugburu be ogologo iya du nkwo-eka ukporo l'ise; osa iya du nkwo-eka ise. ³¹Mkpuru k'uzo ndohali ghagbaaru iphu l'etezi oma-unuphu. E seshiru mpfu l'igbulo, e gude kebushigba mkpuru ono. Eka aazobeje okpa abahu iya du mkpopfu esato.

³²Toɓudu iya bu; o bya edubata mu l'ime oma-unuphu ono l'uzo enyanwu-awawa. O bya atuta iphe l'onu-abata ono; o hakwapho ge ndu ophuu ha. ³³Nkulahu, nogbaa ya nu; me igbulo, kebushiru nkulahu iya ono; me mkpuru iya be hakota ge ndu ophuu. Onu-abata ono; waa mkpuru iya be windo nokota gbaa mgburugburu. Ogologo iya du nkwo-eka ukporo labo l'iri; osa iya du nkwo-eka ukporo l'ise. ³⁴Mkpuru iya be ghagbaaru

iphu l'oma-unuphu etezi. Igbulo, e gude kpụ-bushia mkpuru iya ono bẹ e seshiru mpfụ l'ibekẹboebo. Ẹka aazọbeje ọkpa abahụ iya dūchaa mkpopfụ ẹsato ẹsato.

³⁵Tọbudu iya bụ; ọ bya eduta mu rwua l'onu-abata ophu nọ l'uzo isheli. Ọ bya atuta iya iphe; ọ ha gẹ ndu ophuu ha. ³⁶Nkulahu, nọkota iya nū; mē igbulọ kebushiru nkulahu iya ono; mē mkpuru iya bẹ hakota gẹ ndu ophuu. Windo nọkota iya gbaa mgburugburu. Ogologo iya dū nkwo-ẹka ụkporo labọ l'iri; ọsa iya dū nkwo-ẹka ụkporo l'ise. ³⁷Mkpuru iya gharu iphu l'etezi oma-unuphu. E seshigbaaru mpfụ, l'igbulọ e gude kebushia mkpuru ono ibekẹboebo. Ẹka aazọbeje ọkpa abahụ iya dū mkpopfụ ẹsato ẹsato.

Ụlo, aanọduje akwakọbe ngweja

³⁸O nweru nwa mkpuru, a kpuru ye iya mgbo, nọ l'onu-abata, nọ l'ime onu-abata oma-unuphu ono. Ẹka ono bẹ aasajẹ ngweja-akpo-ọku. ³⁹O nwekwarupho teburu labọ, e doberu lẹ mkpuru ono ẹka labọ, bụ ẹka eegbuje anụ, e gude egwe ngweja-akpo-ọku; mē kẹ ngweja-iphe-ẹji; mē kẹ ngweja-apfụ-ugwo. ⁴⁰Letezi mē a -nọdu eje ala l'onu-abata, nọ l'uzo isheli bẹ teburu labọ nọkwapho lẹ mkpuru iya; lẹ mkpuru ophu nọ l'onu-abata ibe iya ophuu bẹ teburu labọ nọkwapho. ⁴¹Ọ dū teburu ẹno nọdu l'ibe lanụ; teburu ẹno nọdu l'ẹka onu-abata ono ibe iya ophuu. Ọ tuko dū teburu ẹsato, bụ ẹka eegbuje anụ, e gude egwe ngweja. ⁴²O nwekwarupho teburu ẹno, e gude mkpuma mee, bụ eli ẹka eegbuje anụ, e gude egwe ngweja, aakpo ọku. Ogologo iya dūchaa nkwo-ẹka lanụ lẹ mkpirikpu iya; ọsa iya dūchaa nkwo-ẹka lanụ lẹ mkpirikpu iya; ọ dū nkwo-ẹka lanụ l'eli. Ọ bụru ẹka ono bẹ eedobeje iphemiphe, eegudeje egbu anụ, e gude egwe ngweja-akpo-ọku; mē ngweja ozo, eegwekpọ egwegwe. ⁴³Igbulo ono mgburugburu bẹ a kpobekotaru nggu, ogologo iya hakota g'ọbochieka. Teburu ono gẹphe ha bukota ẹka eedoje anụ, e gude egwe ngweja.

Mkpuru ndu-uke Chileke

⁴⁴Lazụ ime onu-abata ono l'ime oma-unuphu ono bẹ o nweru mkpuru labọ, nọ iya nū. Nanụ nọ l'ẹka iya k'onu-abata ụzo isheli; nọdu gha iphu l'uzo ndohali; ozo nọdu l'ẹka iya k'onu-abata ụzo ndohali; nọdu gha iphu l'uzo isheli. ⁴⁵Onye ono sụ mu: “Mkpuru ophu nọ gha iphu l'uzo ndohali ono bụ kẹ ndu-uke Chileke, bụ iya bụ ndu ophu anọduje eleta eze-ulo Chileke ẹnya. ⁴⁶Mkpuru ophu gharu iphu l'uzo isheli bụ kẹ ndu-uke Chileke, bụ ndu ophu eletajẹ ẹnya l'oru-ngweja. Ndu obu bụ unwu Zadoku, bụ phe kpoloko bụ ndu Lívayi, a-byakubeje Chipfu ntse; bya ejeeru iya ozi.”

⁴⁷Tọbudu iya bụ; ọ bya atuta iphe l'oma-unuphu ono. Ọ harụ ẹnya nhamunha ibekeno ẹno; ọ dū nkwo-ẹka ụkporo ise l'ogologo; dū nkwo-ẹka ụkporo ise l'osa iya. Ọru-ngweja ono bụru l'iphu eze-ulo Chileke ono bẹ ọ nọ.

Eze-ulo Chileke ono

⁴⁸No iya; o bya eduta mu je le mkpuru, eka eeshije abahu leze-ulo ono; bya atuta iphe l'itso-mgbo, nogbaa l'aguga mkpuru ono; ephe duchaa nkwo-eka ise ise ibekeboebo. Osa onu-mgbo iya duchaa nkwo-eka iri l'eno; igbulu, nochaa su-be l'onu-abata ono ibekeboebo, be osa iya duchaa nkwo-eka eto eto. ⁴⁹Mkpuru ono be ogologo iya du nkwo-eka ukporo; osa iya du nkwo-eka iri l'ebo. Eka aazobeje okpa bahu iya be duchaa mkpopfu iri iri. E bvubechaa itso l'onu-abata mgbo ono eka labo.

41 ¹Tobudu iya bu; nwoke ono bya eduta mu je leze-ulo Chileke ono; bya egude iphe tuta okpa-mgbo iya; okpa-mgbo ono ibekeboebo be duchaa nkwo-eka ishii l'osa. ²Onu-abata iya be osa iya du nkwo-eka iri; igbulu, nochaa ya le mgbureku ibekeboebo; be osa iya duchaa nkwo-eka ise ise. O bya atutakwapho iphe l'ogologo iya; o du nkwo-eka ukporo labo; osa iya du nkwo-eka ukporo. ³O bya abahu l'ime eze-ulo ono bya egude iphe tuta okpa-mgbo iya; osa iya duchaa nkwo-eka labo nkwo-eka labo. Onu-abata ono be osa iya du nkwo-eka ishii. Igbulo, nogbaa le mgbureku onu-mgbo ono ibekebo be osa iya du nkwo-eka esaa. ⁴O bya atuta iphe l'ogologo ime eze-ulo ono; o du nkwo-eka ukporo; osa iya du nkwo-eka ukporo l'uzo ataphu eze-ulo Chileke ono. O su mu: "Owaa bu eka kakota adu nso." ⁵No iya; o bya atuta iphe l'igbulu eze-ulo Chileke ono; igbidigbi iya du nkwo-eka ishii; mkpuru nogbaa l'aguga ulo ono go ha be osa iya dukota nkwo-eka eno eno. ⁶Ulo ono be bu ulo-eli mkpopfu eto. Mkpofu ophu nonu nwekotaru mkpuru ukporo l'iri iri; a kpukota itso dupfubegbaa l'igbulu eze-ulo Chileke ono gbaa mgburugburu go gudeshia mkpuru, nogbaa ya nu. Iphe ono, a kpuru dupfube iya ono ta abukwa l'ime igbulu eze-ulo Chileke ono be a kpu-yaberu iya. ⁷Mkpuru, e yeshiru le mgbureku ulo ono be ka osa eje le mkpopfu iya ono. Ulo ophu e gude kpu-pheta eze-ulo ono be a kpuru o nodu le mkpongo le mkpongo; k'ophu bu l'a -nodu enyikota iya; mkpuru ono, a kpushiru iya ono aka osa eje. Eka eeshije enyikota iya be shi le k'omali noo je eshijaa k'echilabo iya; bahu le k'imeli iya.

⁸Mu bya ahuma leze-ulo Chileke ono nweru oma eka a kpu-liru eli, no gbaphee ya mgburugburu; o buru iya bu eka a turu okpa mkpuru ono, a kpushiru gbaphee ya mgburugburu ono. O buru go habe ogologo bu ge mgboro pho; mbu l'oo nkwo-eka ishii be o du l'ogologo. ⁹Azu igbulu ke mkpuru aguga aguga iya ono be igbidigbi iya du nkwo-eka ise. Eka dabyikporu nu, no le mgbaka mkpuru ono, nogbaa l'ime eze-ulo Chileke ono; be osa iya du nkwo-eka ise. Mgbaka eka dabyiru nu; ¹⁰waa mkpuru ophu a kpu-pheru ime oma-unuphu ono mgburugburu be osa iya du nkwo-eka ukporo. ¹¹Mkpuru ono, e yegbaaru l'aguga eze-ulo Chileke ono be e eyecharu onu iya; o nodu laaru eka ono, dabyiru iphoro ono; onu iya

lanu gharu iphu l'uzo isheli; ophuu gha iphu l'uzo ndohali. Eka ono, a ta akpuduru mkpuru ono be osa iya du nkwo-eka ise.

¹²Ulo ophu a kpuru; o gha iphu l'oma-unuphu eze-ulo Chileke l'uzo enyanwu-ariba iya be osa iya du nkwo-eka ukporo eto l'iri. Igbulo ulo ono be igbidigbi iya gbaa mgburugburu du nkwo-eka ise; ogologo iya du nkwo-eka ukporo eno l'iri.

¹³No iya; o bya atuta iphe leze-ulo Chileke ono; ogologo iya du nkwo-eka ukporo ise; oma-unuphu eze-ulo Chileke ono; me ulo, a kpuru iya; me igbulu iya g'ephe hakota be ogologo iya dukwapho nkwo-eka ukporo ise.

¹⁴Oma-unuphu eze-ulo Chileke ono eka iya ophu gharu iphu l'uzo enyanwu-awawa; mekpoo ataphu eze-ulo Chileke ono be osa iya tukoru du nkwo-eka ukporo ise.

¹⁵O bya atutakwapho iphe l'ulo ophu no gha iphu l'oma-unuphu eze-ulo Chileke ono l'uzo azu iya; mekpoo igbulu iya ibekeboebo; o buru nkwo-eka ukporo ise be o du.

Eka du nsu ono ophu nofutaru anofuta; me k'ime ime; ye mkpuru iya ophu gharu iphu l'oma-unuphu; ¹⁶mekpoo onu-ulo iya; me windo, dugbaa werere ono; me eka eeshije eshishi, nokota l'ephe n'eto ono be a gbakotaru oshi; shita l'oma-ulo iya; me igbulu iya jeye l'eka e yeshiru iya windo; mbu le windo iya be e kweshishikotaru iphe g'o ha; ¹⁷je akpakpo l'eli onu-abata ono; me ime ime ulo ono; me azu iya; mekpoo l'eli igbulu ono ime iya me azu iya gbaa mgburugburu; be a pyishiru iphe, dugbaa ¹⁸ge chierobu; me mpfu. Mpfu ono be e seshigbaaru le mgbaka mgbaka chierobu. Chierobu ono be nwechaaru iphu labo. ¹⁹Iphu ophu du g'iphu nemadzu be o gharu mpfu ophu no l'eka iya lanu; iphu ophu du g'iphu oduma be o gharu le mpfu ophu no l'eka iya ophuu. O buru egube ono be a pyishikotaru iya dophee eze-ulo Chileke ono mgburugburu. ²⁰Shita l'omali iya jeye l'eli mgbo be a pyishikotaru chierobu me mpfu l'igbulu eze-ulo ono.

²¹Okpa-mgbo eze-ulo Chileke ono be hakota enya nhamunha ibekeno eno. O buru g'okpa-mgbo ophuu du bu g'ophuu du l'iphu eka du nsu ono. ²²Oru-ngweja Chipfu ono be e gude oshi mee; eli iya du nkwo-eka eto; ogologo iya du nkwo-eka labo; osa iya du nkwo-eka labo. Nkuku iya; me okpali iya; me mgbureku iya be bu oshi be e gudekota mee ya. Onye ono su mu: "Owaa bu teburu ono, no l'iphu Chipfu ono." ²³Oma eze-ulo Chileke ono; me eka ono, du nsu ono be e yekotaru mgbo ebo ebo. ²⁴Mgbo ono be nwekotaru iphe labo, aso asoso; eegudeje pyajia ya apyaji. Ophuu nweru ebo; ophuu nweru ebo. ²⁵Mgbo oma-ulo eze-ulo Chileke ono be a pyishiru chierobu; me mpfu egube ono, a pyishiru l'eli igbulu pho. Latatiphu mkpuru ono be e gude oshi tua mkpu. ²⁶O nwekwarupho windo, dugbaa ke

wèrere, a pyìshiru mpfù nõgbaa lẹ mgburẹku mkpuru ono ẹka labọ. Mkpuru mgburẹku eze-ulo Chileke ono bẹ nwecharu mkpu, a tũru iya.

Ulo ndu-uke Chileke

42 ¹Tọbudu iya bụ; nwoke ono bya edufuta mu duru mu bahu l'oma-unuphu ono; mbụ l'uzo ibiya k'isheli. O bya edubata mu l'ulo, nõ lẹ mgbaka oma-unuphu eze-ulo Chileke; yee ulo, nõ l'uzo isheli ono. ²Ulo ono, nõ l'uzo isheli ono bẹ ogologo iya dũ nkwo-ẹka ukporo ise; ọsa iya dũ nkwo-ẹka ukporo labọ l'iri. ³Eka iya lanu bẹ gharu iphu l'eka ọsa iya dũ nkwo-ẹka ukporo, bụ ẹka nõ l'ime oma-unuphu. Eka iya ophu bẹ gharu iphu l'eka a wuru mkpuma, nõ l'ataphu oma-unuphu ono. A kpuru iya mkpopfu eto; o nõduchaa lẹ mkpongo lẹ mkpongo. ⁴O nwekwarupho uzo, nõ l'ime, eeshije eshishi, nõ l'iphu ulo ono; onoya bẹ ọsa iya dũ nkwo-ẹka iri; ogologo iya dũ nkwo-ẹka ukporo ise. Onu-mgbo iya bẹ nõkota l'uzo isheli ulo ono. ⁵Mkpuru ophu nõgbaa l'eli bẹ kagbaa kparagu; kele onu-uzo nõgbaa ya nu ka eketa ẹka ha shii; eme lẹ g'omu-uzo ke mkpuru k'echilabọ; me lẹ k'uzo alị ketagbaaru. ⁶Mkpuru, nõgbaa lẹ mkpopfu k'eto l'ulo-eli ono bẹ te nweđu itso, nõ iya nu egube ulo ndu ophu a kpushiru l'oma-unuphu pho nweru. Oo ya bụ l'oma ulo k'imeli ono ka ndu ophu nõ l'ali; me k'echilabọ iya nwanshii. ⁷O nwekwarupho igbulọ, tsefutaru etsefuta, nõ lẹ nhamunha mkpuru ulo ono waa oma-unuphu ono; igbulọ ono bẹ ogologo iya dũ nkwo-ẹka ukporo labọ l'iri l'ataphu eze-ulo Chileke ono. ⁸Mkpuru ophu nõ giriri chebe iphu l'oma-unuphu ono bẹ ogologo iya dũ nkwo-ẹka ukporo l'iri. Ndu ophu a kpuru o chebe iphu l'eka iya k'eze-ulo Chileke bẹ ogologo iya dũ nkwo-ẹka ukporo ise. ⁹Mkpuru k'uzo alị bẹ ẹka eeshije abahu iya nõ l'uzo ẹnyanwu-awawa me a -gbẹ l'oma-unuphu ono abahu iya.

¹⁰Lime oma-unuphu l'eka iya k'uzo ndohali bẹ o nwekwarupho mkpuru, a kpugbaaru lẹ mgbaka igbulọ ataphu etezi oma-unuphu ono yee oma-unuphu eze-ulo Chileke. ¹¹O nweru uzo, eeshije eshishi, nõ l'iphu mkpuru mkpuru ono. Mkpuru ono dugbaa ge ndu ophu nõ l'uzo isheli. Ogologo phe waa ọsa phe bẹ tukọ haru ẹnya nhamunha. Eka eeshije phe alufu bẹ gbakota nanu. G'e gude kpua phe gbakwarupho nanu. Mgbo, nochaa phe nu tukọ gbakota ugbugba lanu. ¹²Ulo k'uzo alị ophu nõ l'uzo ndohali bẹ gharu onu l'uzo ẹnyanwu-awawa, bụ ẹka eeshije abahu iya. O nwekwarupho igbulọ, tsefutaru etsefuta, a kpuru nyakube ulo ono.

¹³Tọbudu iya bụ; o su mu: "Ulo k'isheli me ke ndohali ono, ghakotaru iphu l'oma-unuphu eze-ulo Chileke ono bẹ bụ ke ndu-uke Chileke. O buru l'eka ono bẹ ndu-uke Chileke, bụ ndu abyakubeje Chipfu ntse a-noduje eri iphe, kakota adu nsọ, a nuru Chileke. Oo ẹka ono bẹ ephe e-dobeje iphe, kakota adu nsọ, a nuru Chileke; mbụ ngweja-nri; me ngweja-iphe-eji; me

ngweja-apfu-ugwo; kele ẹka ono be du nsọ. ¹⁴Teke ndu-uke Chileke bahuwaru l'ẹka ono, du nsọ ono; g'ẹphe ta alufukwa etezi gbahaa l'ẹphe yefuru uwe, ẹphe eyeje gude eje ozi; kele uwe ono dukota nsọ. Ẹphe e-ye uwe ozo teme ẹphe eje l'ẹka ndu ozo no."

¹⁵Noo ya; teke o tu-ghechaaru iphe l'iphe, no l'ime eze-ulo Chileke ono; o bya eduta mu shia uzo onu-abata uzo enyanwu-awawa; bya atukotá iphe l'ẹka ono g'o ha mgburugburu. ¹⁶O bya egude mgboro, e gudeje atuta iphe ono tuta iphe l'ẹka iya k'uzo enyanwu-awawa; o buru iphe, o du bu unu nkwo-ẹka le nkwo-ẹka ukporo ise. ¹⁷O bya egude mgboro, e gudeje atuta iphe ono tuta iphe l'ẹka iya k'uzo isheli; o dukwapho unu nkwo-ẹka le nkwo-ẹka ukporo ise. ¹⁸O bya egude mgboro, e gudeje atuta iphe ono; tuta ẹka iya k'uzo ndohali; o du unu nkwo-ẹka le nkwo-ẹka ukporo ise. ¹⁹O bya aghachi iphu l'uzo enyanwu-ariba; bya egude mgboro, e gudeje atu iphe ono tuta ẹka iya ono; o du unu nkwo-ẹka le nkwo-ẹka ukporo ise. ²⁰Oo ya bu; o tukota iphe l'ẹka ono ibekeno eno. E gude igbulọ kpuphekota iya mgburugburu; ogologo iya du unu nkwo-ẹka le nkwo-ẹka ukporo ise; oša iya du unu nkwo-ẹka le nkwo-ẹka ukporo ise; shi nno kebuha ẹka du nsọ ono waa ẹka nemadzu mmanu anoduje.

Odu-biribiri Chileke l'eze-ulo iya

43 ¹No iya; nwoke ono bya eduta mu bya l'onu-oguzo ophu gharu iphu l'uzo enyanwu-awawa. ²Mu huma odu-biribiri Chileke ke Izurelu g'o shi l'uzo enyanwu-awawa abya. Olu iya nodu ada g'eka eze enyimu aphu ke gbudugbudu. Odu-biribiri Chileke ono mee iphoro ngakota ekameka. ³Ophulenyá ono, mu phuru ono duẹpho g'ophu, mu phujeru teke o byaru emebyishi mkpukpu ono; bya adu g'ophulenyá ono, mu phujeru laguga enyimu Keba pho. Oo ya bu; mu daa kpurumu; kpube iphu l'alj. ⁴Odu-biribiri Chipfu shiepho l'onu-abata ophu gharu iphu l'uzo enyanwu-awawa bahu l'eze-ulo Chileke ono.

⁵Unme Chileke palia mu je edobe l'ime oma-unuphu; odu-biribiri Chipfu bya eji eze-ulo Chileke ono ejiji. ⁶Ge nwoke ono pfu-kube mu ono be mu numaru olu-opfu onye no l'ime eze-ulo Chileke g'oopfu anu mu; ⁷su: "Nwa ndiphe; ẹka-a bu ẹka aba-eze mu no; bukwarupho ẹka mu azobeje okpa. Oo l'eka-a be mu e-buru l'echilabo ndu Izurelu jeye l'ojejoje. Ndu Izurelu ta abyadu emerwushiba epha mu ono, du nsọ ono ozobaa. Ẹphe le ndu-eze phe ta abyadu egude ogori, ẹphe eri l'eka ẹphe agwaje iphe merwushia epha mu ozobaa; ophu ẹphe akpubaedu odzu ndu eze phe nwuhuru anwuhu apfube. ⁸Teke ono, ẹphe woru onu-ulo phe dokube onu-ulo nkemu; bya eworu onu-mgbo phe ye laguga onu-mgbo nkemu; o buru igbulọ kpoloko bu iphe, no-buharu mu l'ẹphe; be ẹphe gude urwuali, ẹphe arwu emerwushi epha mu ono, du nsọ ono. Oo ya meru iphe, mu gude ehughe mebyishia phe. ⁹Nta-a bu g'ẹphe haa eri ogori; ẹphe

apashicha odzu ndu-eze phe ono l'eka mu no; ge mu ebukwanuru l'echila-bọ phe jasụ l'ojeje.

¹⁰“Nwa ndiphe; t̄aru ndu Ízurelu onu g'eze-ulo Chileke ono d̄u. G'ephe r̄ia oriri l'ugbugba ulo ono; k'op̄hu iphere iphe-eji, ep̄he meshiru a-d̄u phe. ¹¹Teke o b̄u l'iphere iphe ono, ep̄he meru ono d̄u phe; l'ì karu phe g'ee-gude kp̄ua eze-ulo Chileke ono; m̄e g'oo-gude gbaa ugbugba; m̄e g'onu iya a-d̄u; m̄e onu-abata iya; m̄e g'aa-kp̄ukotakpoo ya l'op̄hu; m̄ekpoo nso, d̄ulaje iya n̄u; waa ekemu, d̄ugbaa ya n̄u. Dekota iphemiphe ono l'ekwo k'op̄hu ep̄he e-mekota iya g'o d̄u; mekota nso, d̄ulaje iya n̄u g'o ha. ¹²Waa ekemu, d̄u l̄e k'eze-ulo Chileke ono baa: Ip̄he, b̄u mkpakponu úbvú ono gbaa mgburugburu b̄e a-buru eka kakota ad̄u nso. Oo ya b̄u ekemu eze ulo Chileke ono.

Enya eka eegweje ngweja

¹³“Waa g'oru-ngweja ono habe l̄e nkwo-eka l̄e nkwo-eka b̄u owa: nkwo-eka ono b̄u ip̄he, o d̄u b̄u nkwo-eka lan̄u; waa nkwo mkp̄ushi-eka eto. Omilomi oswa, no iya mgburugburu b̄e a-d̄u nkwo-eka lan̄u; ōsa iya a-d̄u nkwo-eka lan̄u. Igbur̄onu oswa ono mgburugburu a-d̄u nkwo mkp̄ushi-eka ugbo tete. Waa g'enya eka ono, ee-gweje ngweja ono a-habe l'eli baa: ¹⁴Shita l'oswa, a waru l'omali ono jeye l'uko-alì b̄e eli iya a-d̄u nkwo-eka labo; ōsa iya ad̄u nkwo-eka lan̄u. A -gb̄e l'uko-alì rwua l'ap̄okwa b̄e eli iya a-d̄u nkwo-eka eno; ōsa ap̄okwa ono ad̄u nkwo-eka lan̄u. ¹⁵E-shi l'ap̄okwa iya rwua l'enya eka eegweje ngweja gedegede b̄e eli iya a-d̄u nkwo-eka eno; enya eka ono, eegweje ngweja ono b̄e mpu eno, mab̄echaru l'uzo imeli a-nōdu. ¹⁶Enya eka ono, eegweje ngweja ono b̄e a-haru enya nhamunha ibekeno eno. Ogologo iya a-d̄u nkwo-eka iri l'ebo; ōsa iya ad̄ukwapho nkwo-eka iri l'ebo. ¹⁷Ap̄okwa iya b̄e a-hakwarupho enya nhamunha ibekeno eno; ogologo iya a-d̄u nkwo-eka iri l'eno; ōsa iya ad̄u nkwo-eka iri l'eno; igbur̄onu ap̄okwa ono b̄e eli iya a-d̄u mkpiri-kpu nkwo-eka. Ishi ap̄okwa ono a-d̄u nkwo-eka lan̄u gbaa mgburugburu. Eka eeshije enyihu enya eka eegweje ngweja ono b̄e a-gha ip̄hu l'uzo enyanwu-awawa.”

Edobe oru-ngweja ono nso

¹⁸No iya; o s̄u mu: Nwa ndiphe; wakwa ip̄he, Nnajiuphu, b̄u Chipfu ep̄fu baa: Waa g'ee-gudeje egwe ngweja-akpo-ok̄u l'eli oru-ngweja ono; m̄e g'ee-gudeje ep̄he mee-ip̄he l'eli eka ono m̄e a -kp̄u-ghe e ya pho baa. ¹⁹Ndu-uke Chileke, b̄u iya b̄u ndu Lívayi; mb̄u ndu ono, shi l'eri Zadoku, b̄u ndu ejeje ozi l'ip̄hu mu ono b̄e ìi-kp̄e nwokeswi g'ep̄he gude gwee ngweja-ip̄he-eji. Nokwa ip̄he, Nnajiuphu, b̄u Chipfu ep̄fu. ²⁰Haru mee ya nata tee l̄e mpu eno ono, no l'enya eka eegweje ngweja ono; yele ishishi ap̄okwa ono ep̄hen'eno. Lì tephekwa ya pho l'igbur̄onu iya mgburugburu

g'ò bürü iphe, i gude mee ɛnya ɛka ono, eegweje eja ono g'ò dü nsò; gudekwa iya phò safù iphe-eji, nò iya nü. ²¹Okeswi ono, e gude egwe ngweja k'iphe-eji ono bɛ ìi-kpùta je akpò òku l'ɛka e meru g'a kpoje ngweja òku l'eze-ùlo Chileke ono l'azù ɛka dü nsò ono.

²²“Lɛ mbòku k'èbo bɛ ii-gude mkpi, te enwedu ɛka iphe mebyiru iya gwee ngweja-iphe-eji. Òru-ngweja ono bɛ ee-me g'ò dü nsò ɛgube ono, e gude oke-eswi mee ya phò. ²³Teke i meɛbecharu iya; ò dü nsò ono; l'ì kpùta nwa oke-eswi waa ebili, te enwedu ɛka iphe mebyiru phɛ gwee ngweja; mbù òphu shi l'ɛka iphe-edobe nò. ²⁴Ii-gwekòta phɛ l'iphu Chipfu. Ndu-uke Chileke ewota únú phekòta phɛ; woru phɛ mee ngweja-akpò-òku nü Chipfu.

²⁵“Ujiku ɛsaa; mbòku-mbòku bɛ ìi-kpòkube kpùfutaje mkpi g'e gude gweje ngweja-iphe-eji. ɛgube ono bɛ ìi-kpùfutakwapho nwokeswi waa ebili, te enwedu ɛka iphe mebyiru phɛ, bù òphu shi l'iphe-edobe. ²⁶Abalì ɛsaa bɛ ndu achijeru Chileke eja e-gude safù ejo-iphe l'òru-ngweja ono; bya emee ya g'ò dü nsò; shi ɛgube ono woru iya ye l'ɛka Chileke. ²⁷Abalì ɛsaa ono g'ò ha -dzuepho; gbɛ lɛ mbòku k'ɛsato kwasɛru; bɛ ndu-uke Chileke e-gwerù unu ngweja-akpò-òku; mɛ ngweja-ɛhu-guu l'eli òru-ngweja ono. Òo bürü teke ono bɛ mu a-nata unu. Nokwa iphe, Nnajiuphu, bù Chipfu epfu.”

Onye-ishi mɛ ndu Lívayi; waa ndu-uke Chileke

44 ¹Tòbudu iya bù; nwoke ono bya eduphuta mu azù l'ònu-abata òphu nò l'ùzo azù ɛka ono, dü nsò ono; mbù òphu gharu iphu l'ùzo ɛnyanwu-awawa phò. A gu-chia ya agù-chi. ²No iya; Chipfu sù mu: “Ònu-abata-a bɛ aa-gù-chi ɛgube-a jeyewarùro ya. A ta abyadù agùha iya agùha. Mbù l'ò tò dùdu onye byaru eshije iya bahù l'ime iya. Ò bürü ɛgube ono bɛ òogu-chi jeyewarùro ya; kɛle òo ɛka ono bɛ Chipfu, bù Chileke Ízurelù shiru bahù l'eze-ùlo ono. ³Òo onye-ishi unu kpoloko bɛ nweru g'òodu l'a haa ya g'ò nõdu l'ime ònu-abata ono ria nri l'iphu Chipfu. Oo-shi l'ùzo, eeshije abata lɛ mkpu ònu-abata ono bahù; shikwa iya phò lufu.

⁴“No iya; nwoke ono duta mu shia ùzo òphu nò l'ònu-abata isheli l'ùzo iphu eze-ùlo Chileke ono. Mu bya apalia ɛnya hùma òdu-biribiri Chipfu g'ò jiru eze-ùlo Chipfu ono ejiji; mu daa kpurumu; kpube iphu l'alì. ⁵Chipfu sù mu; Nwa ndiphe; tònwube ɛnya ree; ngabɛ nchì rengurengu; kwabɛ ɛnya l'iphemiphe, mu epfuru ngu lɛ kɛ g'aa-nòduje eme eze-ùlo Chipfu ono; mɛ ekemu, dü iya nü. Lerwetakwa ɛnya l'iphe, bù ùzo, e shi abahù l'eze-ùlo Chileke ono; mɛ ɛka eeshije alufu l'ɛka dü nsò ono.

⁶“Sù ndu Ízurelù ono bù ekwegekwe ono lɛ-a: Nnajiuphu, bù Chipfu sùru unubɛ ndu Ízurelù l'ò duwa ree mbù ùrwuali ono, unu arwù ono. ⁷Iphe òzo, unu meru yekòberu ùrwuali unu ono bù l'unu dubataru ndu òhozo l'ùlo nsò mu; mbù ndu te ebuduru úbvù k'ime òkpoma; mɛ

k'ogwehu. Unu gude phe merwushia eze-ulo mu l'eka unu gude nri; me eba-anu; me mee ya egwe ngweja anu mu; shi egube ono mebyia ogbandzu mu ono. ⁸Ophu unu eletaduru iphe mu du nsọ enya; unu gbetchia zia ndu ozo g'ephe letaje ulo nsọ mu ono enya.

⁹“Wakwa iphe, Nnajiuphu, bu Chipfu epfu baa: G'o to dukwa onye ohozo; mbu, ndu te ebuduru ubvu k'ime okpoma; yee k'ogwehu, a-bata l'ulo nsọ mu; je akpachakpo le ndu bu nlwamulwa, buwa ebubu l'echilabo ndu Izurelu. ¹⁰Ndu Livayi ophu gwoberu mu nu le teke ono, ndu Izurelu kpaphushihuru l'eka mu no; mbu ndu ophu lufuru mu l'ehu je etsoaha agwa phe be e-vuru iphe, ejo-iphe phe kpataru phe. ¹¹Ephe nwekwaru ike ephe eje ozi l'ulo nsọ mu; buru ndu nche l'onu-abata eze-ulo Chileke; bya eje ozi l'ime iya; ephe egbuchakpo anu, e gude egwe ngweja-akpo-oku; bya egwejeru ndu ono eja; bya ejeru phe ozi; ¹²obenu kele o l'ephe gwaru nshi; bya emee ge ndu Izurelu meahaa ejo-iphe; be mu paliakwaru eka imeli; ribuwa angu l'ephe e-vuru iphe, ejo-iphe phe kpataru. Noo iphe Nnajiuphu, bu Chipfu epfu bu ono. ¹³G'ephe ta abywa mu ntse l'ephe abya mu abaru eja l'ephe bu ndu-uke; ophu ephe ejekubekwa iphe mu, du nsọ; ozoo iphe, e gweru mu eja, kachakpo adu nsọ. Ephe e-vuru iphe-iphere ebyi, ephe meshiru nwutaru. ¹⁴Ole g'o duhabe be mu emekwa-a phe g'ephe letaje enya l'iphe, eme ememe l'eze-ulo Chileke ono; mekpoo iphe, bu ozi, aa-nodu eje l'ime iya. ¹⁵Ole ndu-uke Chileke, bu ndu ke Livayi, bu ndu ophu shi l'eri Zadoku; mbu ndu ophu shi yeru ehue eje ozi l'ulo nsọ mu le teke ono, ndu Izurelu shi kuhu mu l'ehu ono; be bu phe a-byakubeje mu ntse; bya eje ozi l'iphu mu. Oo ephe a-pfujeru mu l'iphu egweru mu ngweja eba-anu me ke mee ya. Nokwa iphe, Nnajiuphu, bu Chipfu epfu bu ono. ¹⁶Oo ephebedua nwekinyi phe be a-bahuje l'ime ulo nsọ mu ono; o buru phe nwekinyi phe be e-jekubeje teburu mu k'ejeru mu ozi; waa g'ephe mee iphe, mu suru g'e mee. ¹⁷Teke ephe bahuru l'onu-abata k'ime oma-unuphu ono be ephe e-yeje uwe ocha; g'ephe te eyekwa uwe, e gude eji anu kwee m'ephe nodu eje ozi l'onu-abata ophu no l'ime oma-unuphu ono; ozoo l'ime eze-ulo Chileke ono. ¹⁸Ephe e-keje ekwa-ochaa l'ishi; bya eye nwiba ocha l'upfu; g'ephe te eyejekwa iphe, e-me g'ephuru tsua phe.

¹⁹“Teke ephe shiepho l'eka ono lufu eje l'oma-unuphu ono l'eka ndu ozo doru; g'ephe yefu uwe ono, ephe shi yee eje ozi ono wushi l'ime ulo nsọ; yeta uwe ozo; k'ophu ephe tee gudedu uwe phe mee ge ndu Izurelu du nsọ. ²⁰G'ephe ta akpushijekwa ishi akpushi; ophu ephe ahajekwa egbushi phe g'o rwua ha ogologo. G'ephe kpuje ishi phe akpukpu. ²¹G'o to dukwa onye uke Chileke a-nguje mee mo nodu abahu l'ime oma-unuphu Chileke ono. ²²G'ephe ba alujekwa nwanyi, ji iya anodedu; ozoo nwanyi, ji iya chifuru achifu. Onye ephe a-lutaje bu nwamgboko, nwoke teke ejepfuswee, bu onye Izurelu; ozoo nyee onye uke Chileke, nwuhwaru nu. ²³Ephe

e-zije ndibe mu g'ephe maru iphe, dū iche l'iphe, dū nsọ mę ọphu ta adū-du nsọ; goshikwa phę phọ egube ephe e-shije maru iphe, aa-nọdu asọ nsọ; m'ọphu a taa nọdudu asọ nsọ.

²⁴“O -nweru opfu, daru nū; ndu-uke Chileke a-bụjeru ndu-ikpe. Iphe, ephe agbabeje ọkpa kpe ikpe ono bụ iphe, mu tọru ọkpa iya sụ g'e meje. G'ephe mekọtajekwa ekemu mu; mękpoo iphe, mu sūru g'e meje; ephe aboje ọbo-iphe, mu dobegbaaru. Ephe e-mejekwaphọ eswe-atụta-unme mu g'ọ dū nsọ. ²⁵G'onye uke Chileke te ejekubejekwa odzu; shi nno merwua onwiya emerwu. Ọle teke odzu ọbu bụ nna iya; ọzoo ne iya; ọzoo nwa iya nwoke; m'ọ bụ nwada iya; ọzoo nwune iya nwoke; m'ọ bụ nwune iya nwanyị, teke alūdu ji; ọo ya bụ l'ọ merwuwaro onwiya ọbu. ²⁶Teke a safucharu iya nturwu ono; g'ọ nọadakwa abalị ẹsaa. ²⁷Mbọku oo-bebe bahụ l'ime ọma-unuphu ọlo nsọ Chileke g'ọ je ejee ozi l'ẹka dū nsọ ono bę oo-gwe ngweja-iphe-eji k'onwiya. Nokwa iphe, Nnajiuphu, bụ Chipfu epfu bụ ono. ²⁸Ọo mbędua bę a-buru okiphe, ndu-uke Chileke ono e-keta. G'ọ tọ dukwa oke, unu a-hę phę l'alị Ízurelu. Ọo mbędua a-buru iphe, ephe nweru. ²⁹Ephe a-nọduje eri iphe, a nuru kę ngweja-nri; mę kę ngweja-iphe-eji; mę kę ngweja-apfụ-ugwo. Iphemiphe, a goru lę Chipfu lę Ízurelu bę a-bukotaru nkephę. ³⁰Iphe, kakọta ree l'akpuru-iphe-mbụ, i kpataru l'opfu; mękpoo iphemiphe, i wotaru bya anunu; bę bụ ndu-uke Chileke bę e-nweru iya nū. Ii-hataję iphe, i vuru ọzo kpata l'iphe, i meberu l'alị; mbụ iphe, i tsuru etsutsu; je anụ phę k'ọphu ọnu-ọma a-duru ndibe ngu. ³¹Ge ndu-uke Chileke ta atajekwa iphe, ọ bụhabe, bụ iphe, nwuhuru anwuhu; ọzoo ọphu anụ-ęgbudu dzu-gburu adzu-gbu; m'ọ bụ ęnu; m'ọ bụ anụ-ęgbudu ọzo mmanụ.

G'ee-gude kee alị ono

45 ¹“Teke unu washijeerupho alị ono g'ọ buri okiphe unu; unu wafuru Chipfu ẹka ogologo iya dū ụkporo unu nkwo-ẹka ẹto l'unu nkwo-ẹka labọ l'ụkporo nkwo-ẹka iri g'ọ bukotaru ẹka dū nsọ; ọsa iya adū ụkporo unu nkwo-ẹka labọ l'unu iri. Ẹka ono g'ọ hakọta mgburugburu bę a-buru alị, dū nsọ. ²L'alị ono bę ee-kefuta ẹka uswekete iya waa ogologo iya a-dū unu nkwo-ẹka lanụ l'ụkporo nkwo-ẹka ise haru ęnya nhamunha dobe g'ọ buri ẹka aa-kpụ ọlo nsọ ono. Ee-ketakwaphọ alị ono ẹka ọsa iya a-dū nkwo-ẹka ụkporo labọ l'iri; ye iya g'ọ nọ-pee ọlo-nsọ ono mgburugburu. ³Lę phorokotokongu ẹka dū nsọ ono bę unu a-wafuta ẹka ogologo iya a-dū ụkporo unu nkwo-ẹka ẹto l'unu nkwo-ẹka labọ l'ụkporo nkwo-ẹka iri; ọsa iya adū ụkporo unu nkwo-ẹka l'unu nkwo-ẹka ise. Ọo ẹka ono bę aa-kpụ ẹka-kakọta-nsọ ono gedegede. ⁴Ọo-buru oke alị, dū nsọ nọduru ndu-uke Chileke; mbụ ndu ono, ejeje ozi l'ọlo, dū nsọ ono; buri phę abyaję l'iphu Chipfu bya iya ejeru ozi ono. Ọo ẹka ono bę aa-kpushiru phę ọlo-ebubu; tẹme ọ bukwarupho ẹka ono bę aa-kpụ

ulo nsọ ono. ⁵Ẹka ọzo, aa-wafu bẹ ogologo iya a-du ukporo unu nkwo-eka eto l'unu nkwo-eka labo l'ukporo nkwo-eka iri; ọsa iya adu ukporo unu nkwo-eka l'unu nkwo-eka ise. Oke-alì ono a-buru ke ndu Lívayi, bu ndu ejeje ozi l'eze-ulo Chileke; eka ono a-buru eka ephe e-me mkpukpu k'eburu.

⁶“Unu buta ali, a-buru mkpukpu ophu dobe g'ọ nodu dupfuru l'ali, du nsọ ono. G'osa iya du unu nkwo-eka iri l'ẹbo l'ukporo nkwo-eka iri; ogologo iya adu ukporo unu nkwo-eka eto l'unu nkwo-eka labo l'ukporo nkwo-eka iri. Alì ono a-buru ndu Ízurelu l'ophu a-tuko dzezfua eka nwe-ru iya.

⁷“Onye-ishi unu bẹ e-nweru ali, nọ l'ibekęboebo l'ali, du nsọ ono; ali ono a-nodukwapho laaru ibiya ophu ali oha nọ. Oo-gbẹ l'uzo ẹnyanwu-ariba eka iya lanu nọ je akpaa l'eka iya ophuu; bya agbẹ l'uzo ẹnyanwu-awawa eka iya lanu nodu je akpaa l'eka iya ophuu; mbu shikpọepho l'oke ali ophu nọ l'uzo ẹnyanwu-ariba; nọ ogologo jasu l'oke ali ophu nọ l'uzo ẹnyanwu-awawa; nọ egube ono je ajiru ehu l'eka a washiru ali ipfu l'ipfu. ⁸Alì ono a-buru iphe iya nodu lẹ Ízurelu. Teke ono bẹ ndibe mu, bu ndu-ishi ta abyadu akpabaa ndibe mu ehu ọzo. Ephe a-ha ndu Ízurelu g'ephe nweru ali ono l'ipfu l'ipfu g'ipfu phe haa.

⁹“Wakwa iphe, Nnajiuphu, bu Chipfu epfu baa: G'ọ kparu kpakwaru unubẹ ndu-ishi lẹ Ízurelu! Unu haa ehuka ehuka, unu eme; waa ehu, unu emekpa nemadzu. Unu meje iphe, pfuru oto; me iphe, gbaru l'ememe; unu ahaa achishi ndibe mu l'unuphu ibe phe. Nokwa iphe, Nnajiuphu, bu Chipfu epfu bu ono.

¹⁰“Unu gudeje iphe, du ree tuwa erwa iphe. Iphe, unu e-gudeje tuwa erwa iphe, bu nkweka dzuru edzudzu; me ogbongu dzuru edzudzu.

¹¹“Nkweka me ogbongu ono bẹ a-haru ẹnya nhamunha. Nkweka bu iphe, a-laje iya nu bu e -kee eda ukpo uzo iri wota uzo lanu iya; ogbongu ono bẹ bukwapho e -kee eda ukpo uzo iri; uzi lanu iya bẹ a-la iya nu. Eda ukpo bẹ a-buru iphe, ee-gudeje atu iphe l'ephenebo.

¹²“Shekelu lanu bẹ a-bujeru gera ukporo. Shekelu ukporo, e yekoberu shekelu ukporo l'ise; bya eyekobe iya shekelu iri l'ise bẹ a-buru mina lanu.

Iphe, aa-nu Chileke me mboku, dugbaa nsọ

¹³“Qwaa bu iphe, dukpoo iche, unu a-nuje Chileke. Unu pataje eda ukpo witi lanu; kpojia ogbongu ekpoji; woru kee uzi ishii; wota uzi lanu nu Chileke. Unu apatakwapho eda ukpo balì lanu; kpojia ekpoji; woru iya kee uzi ishii; wota uzi lanu nu Chileke. ¹⁴Manu olivu, unu a-nuje bu ekpemu manu lanu l'ime manu, jiru nkweka iri; ozo manu jiru ite-mkpa lanu. Nkweka iri bẹ yele ite-mkpa lanu ha ẹnya nhamunha; kele l'ọ nkweka iri alaje l'ite-mkpa lanu. ¹⁵Nokwapho g'unu a-kputaje aturu lanu l'ime

ùkporo aturu iri, shi l'aturu, tsuru eba, ndu Ízurelu nweru. Onoya bu ophu ee-gudeje gwee ngweja-nri; me ngweja-akpo-oku; me ngweja-ehu-guu; g'e gude iya pfua ugwo iphe-eji ndu ono. Nokwa iphe, Nnajiuphu, bu Chipfu epfu bu ono.

¹⁶“Ndu ali ono g'ephe ha be a-tuko wotakota ngweja-a wojeru onye-ishi phe. ¹⁷Oo onye-ishi ono be o duru g'o wofutaje iphe, ee-gude gwee ngweja, aakpo oku; me ngweja-nri; me ngweja-mee; l'obo-iphe, aabokpoo abobo; mekpoo mboku obo-onwa-afufu; me eswe-atuta-unme; mbu l'iphe, bukpo obo-iphe, e dobegbaaru, ndu Ízurelu aboje. Oo yebedua be a-nuje iphe, ee-gude egwe ngweja-iphe-eji; me ngweja-nri; me ngweja-akpo-oku; me ngweja-ehu-guu g'e gude pfua ugwo iphe-eji, ndu Ízurelu meru.”

¹⁸Wakwa iphe, Nnajiuphu, bu Chipfu epfu baa: “Onwa mbu -du l'abali mbu be unu a-kputaje nwokeswi, e te enwedu aka iphe mebyiru iya gwee aja; swafu nturuwu l'ulo, du nsọ ono. ¹⁹Onye uke Chileke be e-wota mee anu ngweja-iphe-eji ono tee l'okpa-mgbo eze-ulo Chileke ono; me le nkuku nkuku eno no l'apokwa oru-ngweja ono; me l'okpa-mgbo k'onu-abata ime oma-unuphu. ²⁰Nokwapho g'unu e-mekwa iya pho l'abali k'esaa l'ime onwa ono l'opfu ehu iphe, bu onye te elekebeduru enya mee iphe-eji; ozo onye meru iphe-eji l'amagama. Oo egube ono be unu e-shi chia aja eze-ulo Chileke ono.

²¹“L'abali k'iri l'eno l'ime onwa mbu ono be unu a-boje obo Ojaghata. Iphe unu a-boje iya bu abali esaa. Iphe, unu e-rije bu buredi, e te eyeduru iphe, ekoje buredi. ²²Le mboku ono be onye-ishi a-kpufuta nwokeswi, ee-gude gweeru iya ngweja-iphe-eji nkiya gedegede; me k'iphe-eji ndu bukota l'ali ono g'ephe ha. ²³Mboku-mboku l'ime abali esaa ono, aa-nodu abo iphe ono be oo-kpufutaje oke-eswi esaa; me ebili esaa, te enwedu aka iphe, mebyiru iya g'e gudeje gwee ngweja-akpo-oku nu Chipfu. Oo-nujekwapho mkpi g'e gude gwee ngweja-iphe-eji. ²⁴Oo-nujekwapho nkweka ereshi l'ishi oke-eswi ono nanu nanu; me l'ebili ono nanu nanu; g'o buru ngweja-nri; teme lo yekobechaa ya manu, jiru eze ekpemu eno le nkweka ono nanu nanu.

²⁵“Obo-iphe ophu aa-boje le teke onwa k'esaa du l'abali iri l'ise be bukwapho iphe, ha egube ono be oo-wofutaje ujiku esaa g'e gude gwee ngweja-iphe-eji; me ngweja-akpo-oku; me ngweja-nri; me ngweja mmanu.

46 ¹“Wakwa iphe, Nnajiuphu, bu Chipfu epfu baa: ‘Onu-abata ime oma-unuphu, bu ophu gharu iphu l'uzo enyanwu-awawa be aa-gu-chije agu-chi l'ime abali ishii, eejeje ozi. Mboku aa-guhaje iya bu l'eswe-atuta-unme waa mboku, onwa furu. ²Onye-ishi be e-shi l'etezi shia nwulo, no l'onu-abata bata bya apfuru l'onuzo gedegede. Ndu uke Chileke be e-gweru iya ngweja-akpo-oku; me ngweja-ehu-guu. O buru l'onu-abata ono be oo-noduje baaru Chileke aja. O -bachaa aja ono l'o lufu; a

taa gu-chiedu onu-abata ono agu-chi jasu l'uzenyashi. ³Mboku, bukpo eswe-atuta-unme me mboku, onwa furu be ndu ali ono a-noduje l'onu eka eeshije l'onu-oguzo ono baaru Chipfu eja l'iphu iya. ⁴Ngweja-akpo-oku, onye-ishi unu e-gudeje bya anu Chipfu l'eswe-atuta-unme be a-bujeru unwu aturu ishii, te enwedu eka iphe mebyiru iya; waa ebili lanu, te enwedu eka iphe mebyiru iya. ⁵Iphe, oo-yekobe l'ebili ono gude gwee ngweja-nri be a-buru nkweka ereshi. Ngweja-nri, oo-yekobe l'unwu aturu ono be bu g'eka rwukpoeru iya pho be oo-nu; nkweka nonu be oo-yekota manu, jiru eze ekpemu eno l'ehu l'ehu. ⁶Mboku, onwa furu be oo-nu oke-eswi, te enwedu eka iphe mebyiru iya; me unwu aturu ishii; waa ebili lanu, te enwedu eka iphe mebyiru iya g'e gude gwee ngweja. ⁷L'o bya ewofuta iphe, ee-gude gwee ngweja-nri. Nkweka ereshi lanu be oo-ye l'oke-eswi ono; yekobe nkweka ereshi lanu l'ebili pho; unwu aturu pho be oo-ye ereshi g'eka bekpoeeru iya pho; yekobechaa manu, jiru eze ekpemu eno le nkweka ereshi nonu. ⁸Teke onye-ishi abahu; g'o shi le nwulo onu-abata ono bahu; l'o shikwapho l'eka ono lufuta.

⁹“Teke ndu ali ono byaru l'iphu Chipfu l'iphe, bukpo obo-iphe, a turu onu iya; g'onye -shiru uzo isheli bahu je abaru Chileke eja; shikwaa uzo ndohali lufu. Onye -shiru uzo ndohali bahu; l'o shia uzo isheli lufu. G'o dukwa onye e-shi uzo, o shiru bahu lufu. G'onye alufu nu shijekwa uzo ophu yee ophu o shiru bata chegbaberu iphu lufu. ¹⁰Ephe -nodu abahu; g'onye-ishi phe tsojekwaru phe bahu; teke ephe awufuta g'o tsojekwaru phe pho lufuta.

¹¹“Iphe, bukpo obo-iphe nonu; me obo-iphe, gegbaaru egeru be iphe, ee-gudeje gwee ngweja-nri bu: Okeswi be ee-yeje nkweka ereshi; ee-yekobe nkweka ereshi l'ebili; unwu aturu be bu egube du nemadzu ree be oo-yekobeje iya. Nkweka ereshi ophu nonu be ee-yekobeje manu, jiru eze ekpemu eno. ¹²Teke onye-ishi turu obu iya onyo nu iphe g'e gude gweeru Chipfu ngweja-akpo-oku; ozoo ngweja-ehu-guu; g'e ghebekwaru iya onu-abata ophu gharu iphu l'uzo enyanwu-awawa onu. Ngweja, aakpo oku; ozoo ngweja-ehu-guu iya ono be oo-gwe egube oogweje iya l'eswe-atuta-unme. Teke o megheerupho; l'o lufu; o -lufuepho; g'a gu-chia uzo ono.

¹³“Mboku-mboku be oo-kputaje nwaturu, gbaru apha, te enwedu eka iphe mebyiru iya nu g'e gude gweeru Chipfu ngweja-akpo-oku. O buru l'utsugutsu be oo-nuje iya. ¹⁴Utsugutsu be oo-wotajekwapho uzi lanu l'ime nkweka ereshi, e keru uzo ishii; l'o wotakwapho manu, jiru eze ekpemu l'ubvu iya nu g'e gude gwokobe ukpokutu ereshi ono g'o buru ngweja-nri. Egweru Chipfu ngweja-nri-a be a-buru omelali, a-du jasuru asuru. ¹⁵Oo ya bu; nwaturu ono; me ngweja-nri ono; yee manu ono be aa-nodu anuje utsugutsu g'e gude gweje ngweja-akpo-oku.

¹⁶“Wakwa iphe, Nnajiuphu, bu Chipfu epfu baa: O -buru l'onye-ishi be ketaru iphe, o nweru enweru nu onye lanu l'unwu iya; ge nwa iya obu

nwewaruro iphe obu g'ò buru okiphe, awa iya e-nweru. ¹⁷Ọle ọ -buru l'ọo onye ejeru yẹbe onye-ishi ono ozi bẹ o ketaru iphe iya nū; g'onye-ozu ono nweru iphe obu jeye l'apha, ndu bu ohu enwejeru onwophe; teme onye-ishi ono anatawa iya ya ro. Iphe onye-ishi ono bẹ bu unwu iya l'e-nwejeru iya; l'ọ buru nkephe. ¹⁸G'onye-ishi ono ta anafujekwa ndu ọzo oke ali, gbaru phe nū; shi egube ono chifu phe l'alị phe. Ọo oke iya nkiya bẹ ooshije buta ali nū unwu iya g'ò buru nkephe; k'ophu a taa nonyadaa nafu ndibe mu iphe phe.' ”

Ẹka eeshibeje iphe, e gude gwee ngweja

¹⁹No iya; nwoke ono bya eduta mu shia ọzo ophu nọ l'ibiya k'onu-abata ono, shiru bahu lẹ mkpuru, du nso, nogbaa l'eka ono gharu iphu l'uzo isheli ono. Mkpuru ono bu ndu-uke Chileke bẹ nwegbaa ya nū. Ọ bya enweru eka o goshiru mu l'uzo enyanwu-ariba. ²⁰Ọ sū mu: “Ẹka bu eka ndu-uke Chileke e-shije iphe, e gude gwee ngweja-apfu-ugwo; mę ke ngweja-iphe-eji; ndujukwa iya pho ghee iphe, e gude gwee ngweja-nri; k'ophu epe tee gudedu iya lufuta l'oma-unuphu; shi nno mee ndu nọ l'eka ono g'ephe du nso.”

²¹Ọ bya edutakwa mu ọzo bahu l'oma-unuphu; bya eduru mu jekota lẹ nkuku nkuku oma-unuphu ephen'eno; mu humagbaa oma-unuphu ọzo, nochaa lẹ nkuku oma-unuphu ono ephen'eno. ²²Lẹ nkuku oma-unuphu ono ephen'eno bẹ o nweru oma-unuphu, nogbaa ya nū. Ogologo phe duchaa nkwo-eka ukporo labo; osa phe du nkwo-eka ukporo l'iri iri. Oma-unuphu ono, nokota lẹ nkuku nkuku ono bẹ hakota enya nhamunha. ²³Mgburugburu ime oma-unuphu ono ephen'eno bẹ apokwa, e gude mkpuma gbaa nokota. A kpushikotaru eka aakpobeje oku lẹ mkpula apokwa ono gbaa mgburugburu. ²⁴Ọ bya asu mu: “Ẹka-a bu eka ndu ejeje ozi l'eze-ulo Chileke e-shije iphe, epe gude gweeru nemadzu ngweja.”

Enyimu, shi l'eze-ulo Chileke ono asofuta

47 ¹Nwoke ono bya eduta mu lashia azu l'onu eka eeshije abahu l'eze-ulo Chileke ono gedegede; mu huma mini, shi lẹ mkpula onu eze-ulo Chileke ono asofuta; aso ala l'uzo enyanwu-awawa; kele eze-ulo Chileke ono bẹ nọ gha iphu l'uzo enyanwu-awawa. Mini ono bẹ shi lẹ mkpula onu eze-ulo ono eka iya ophu nọ l'uzo ndohali asofuta; mbu l'uzo ndohali l'oru-ngweja ono. ²Tobudu iya bu; ọ bya eduta mu shia ọzo ophu nọ l'uzo isheli; duru mu jephe mgburugburu l'etezi; bya eduru mu shia ọzo onu-abata ophu gharu iphu l'uzo enyanwu-awawa ono. Mini pho shi l'uzo ndohali asoshihu. ³Nwoke ono paru iphe, egudeje atuta iphe l'eka tugbua shia ọzo enyanwu-awawa. Ọ bya atuta unu nkwo-eka labo l'ukporo nkwo-eka iri. Ọ gbę teke ono duta mu rwughata mini, beru l'ogba-echi. ⁴Ọ bya atutakwapho unu nkwo-eka labo l'ukporo nkwo-eka iri ọzo; bya eduru

mu rwughaa mini, ebe l'ikpere. Ọ bya atutakwapho unu nkwo-eka labo l'ukporo nkwo-eka iri ozo; bya eduru mu rwughaa mini ozo, ebe l'upfu. 5 Ọ bya atutakwapho unu nkwo-eka labo l'ukporo nkwo-eka iri ozo; ono buru enyimu, mu ta aduedu ike ghata; kele mini ono be byawaru utso shii; hawa ogbu k'ophu bu ebvubvu be ee-bvu iya; mbu enyimu, te enwedu onye a-du ike rwughata iya nu. 6 Ọ jia mu su: "Nwa ndiphe; ?i humaru iphe-a to?"

Ọ gbẹ teke ono bya eduru mu lashia azu l'aguga enyimu ono. 7 Teke mu rwuru l'eka ono be mu humaru oshi, bu aguta aguta, nogbaa l'aguga enyimu ono azu labo. 8 Ọ su mu: "Mini-a be anoduje aso ala l'ibiya k'uzo enyanwu-awawa; soru lashia l'uzo nsuda Araba, bu eka ooshije soba leze-enyimu. Ọ nodu abujeru teke mini ono sobaru leze-enyimu ono; mini eze-enyimu ono abya adu ree. 9 Igwerigwe unwu-iphe, nogbaa ndzu be a-dzuru ndzu l'iphe, bukpo eka mini ono soru shia. Ema be a-kwatakpo du iya shii; kele mini ono aso ala l'eka ono. Ọ nodu emeje mini eze-enyimu ono go du ree. Ọo ya bu l'iphe, bukpo eka enyimu ono so-beru be iphe, no iya nu a-nodukota ndzu. 10 Ndu egbu ema be a-pfujeru l'aguga eze-enyimu ono. A -gbẹ le mkpukpu Enu-Gedi je akpaa le mkpukpu Enu-Egulayimu be aa-nodu ahumaje eka ee-gebeje ugbu. Ema ono be a-dukwa l'udu l'udu; ha igwerigwe g'ema, no l'oke-enyimu. 11 Ọle mini, no l'uda; me ophu no l'eka anwu umavu l'aguga eze-enyimu ono be ta abyadu adu ree. Ọo-buru umaswi, aa-nodu eshita unu. 12 Oshi-omi dugbaa l'udu l'udu be a-nodugba l'aguga enyimu ono azu labo. Ophu ekwo phe ta ayidu nwulwashihu anwulwashihu; ophu o to yidu mi-buhu akpuru. Epe a-noduje ami mebyi lonwa lonwa; kele mini, shi l'ulo du nso ono aso ala l'eka epe no. Akpuru, epe a-mije be a-bujeru nri; ekwo iya aburu obvu, ee-gudeje eme ge nemadzū du iche l'iphe, eme iya nu."

Oke oke ali ono

13 Wakwa iphe, Nnajjuphu, bu Chipfu epfu baa: "Waa g'oke ali ono a-du baa, bu iya bu g'unu e-keshi ali ono g'ipfu iri l'ebo, no le Izurelu hatacha; go buru okiphe phe. Jiosesu be a-hata oke ali labo. 14 Unu e-keru iya epe enya nhamunha. Ọo kele mu paliru eka imeli ribua angu le mu a-nu iya nna unu oche phe be meru g'o gude ali-a je aburu okiphe unu.

15 "Waa eka a-buru oke ali ono baa: L'uzo isheli be oo-shi l'oke-Enyimu l'uzo Hetulonu; jeru lashia Zedadu; 16 me Hamatu; me Berota; me Suburuyimu ophu no le mgbaka oke ali Damasukosu yee Hamatu; je akpaa le mkpukpu Haza-Hatikonu, bu ophu no l'oke ali Hawuranu. 17 Oke iya ono be e-shi l'oke-enyimu no jasū le Haza-Enanu; no-tsuru oke ali Damasukosu l'uzo isheli; yee oke ali Hamatu a-nodu l'uzo isheli. Ọo eka ono a-buru oke iya l'uzo isheli.

18 "L'uzo enyanwu-awawa be oke ali ono e-shija mgbaka Hawuranu yee Damasukosu; no-tsuru enyimu Jiordanu ogologo le mgbaka

mkpukpu Giladu; me ali Izurelu je alufu eze-enyimu ono, no l'uzo enyanwu-awawa ono; je akpaa le Tama. Oo eka ono be a-buru oke iya l'uzo enyanwu-awawa.

¹⁹“L'uzo ndohali be oke ali ono e-shi le Tama noo jasu le mini Meriba-Kadeshi; o bya anodu kwaseru nggele Ijiputu jasu l'oke-enyimu. Eka ono a-buru oke iya l'uzo ndohali.

²⁰“L'uzo enyanwu-ariba be bu Oke-Enyimu be a-buru oke iya jasu l'eka yee Lebo-Hamatu chegbaberu iphu. Eka ono be a-buru oke iya l'uzo enyanwu-ariba.

²¹“Unu e-keshiru onwunu ali-a le g'ipfu Izurelu ha. ²²Unu e-keru iya onwunu me iphe, bu nlwamulwa, buwaa ebubu l'echilabo unu nwushia unwu; g'o buru okiphe unu. Unu guru phe ye le ndu a nwuru anwunwu le Izurelu. Unu emee g'ephe hata ali g'unu a-ha iya l'ipfu l'ipfu Izurelu. ²³Iphe, bukpo ipfu ophu nlwamulwa ono bu be ee-keru ali nkiya nu iya.” Nokwa iphe, Nnajiuphu, bu Chipfu epfu bu ono.

G'ee-gude kee ali ono

48 ¹“Waa epha ipfu ono g'ephe ha baa: Danu be e-nweru oke ali lanu l'ishi uzo isheli. Oke-ali iya ono e-shi l'uzo Hetulonu noo jasu l'eka eeshije abahu mkpukpu Hamatu; je akpaa le Haza-Enanu, bu ophu no l'oke ndu Damasukosu l'uzo isheli; mbu le mgboru Hamatu. Oke ali iya ono e-shi l'uzo enyanwu-awawa noo jasu l'uzo enyanwu-ariba ali ono.

²“Asha be a-hatakwapho oke lanu. Nkiya be yee ali ke Danu a-ma oke shita l'uzo enyanwu-awawa jasu l'uzo enyanwu-ariba.

³“Nafutali be a-hatakwapho oke lanu. Nkiya be yee ali ke Asha a-ma oke; shita l'uzo enyanwu-awawa jasu l'uzo enyanwu-ariba.

⁴“Manase be a-hatakwapho oke lanu. Nkiya be yee ali ke Nafutali a-ma oke; shita l'uzo enyanwu-awawa jasu l'uzo enyanwu-ariba.

⁵“Ifuremu be a-hatakwapho oke lanu. Nkiya be yee ali ke Manase a-ma oke; shita l'uzo enyanwu-awawa jasu l'uzo enyanwu-ariba.

⁶“Rubenu be a-hatakwapho oke lanu. Nkiya be yee ali ke Ifuremu a-ma oke; shita l'uzo enyanwu-awawa jasu l'uzo enyanwu-ariba.

⁷“Jiuda be a-hatakwapho oke lanu. Nkiya be yee ali ke Rubenu a-ma oke; shita l'uzo enyanwu-awawa jasu l'uzo enyanwu-ariba.

⁸“Ali ophu yee ke Jiuda a-ma oke; shita l'uzo enyanwu-awawa jasu l'uzo enyanwu-ariba be unu e-wofuta g'o buru ophu unu e-dobe iche. Uswekete iya be a-tuta g'o du ukporo unu nkwo-eka eto l'unu nkwo-eka labo l'ukporo iri; ogologo iya a-buru shita l'uzo enyanwu-awawa jasu l'uzo enyanwu-ariba; egube k'ipfu ndu ophu hagbaa pho. Ulo nso ono be aa-kpu l'echilabo iya gedegede. ⁹Ali ono ophu unu e-bufu iche doberu Chipfu ono; be ogologo iya a-du ukporo unu nkwo-eka eto l'unu nkwo-eka labo le nkwo-eka ukporo iri; uswekete iya adu ukporo unu

nkwo-ẹka l'unu nkwo-ẹka ise. ¹⁰Ọ buru ndu-uke Chileke bẹ e-nweru ẹka ono, e doberu nsọ ono. Ogologo iya bẹ a-dụ ụkporo unu nkwo-ẹka ẹto l'unu nkwo-ẹka labọ lẹ nkwo-ẹka ụkporo iri l'uzo isheli; uswekete iya adu ụkporo unu nkwo-ẹka l'unu nkwo-ẹka ise l'uzo ẹnyanwu-arịba; uswekete iya adu kwapho ụkporo unu nkwo-ẹka l'unu nkwo-ẹka ise l'uzo ẹnyanwu-awawa; ogologo iya adu ụkporo unu nkwo-ẹka ẹto l'unu nkwo-ẹka labọ lẹ nkwo-ẹka ụkporo iri l'uzo ndohali. Ọ buru l'echilabọ iya gèdegede bẹ aakpu ụlo nsọ Chipfu ono. ¹¹Ndu e-nweru iya nù bụ ndu-uke Chileke ono, bụ unwu Zadoku, mbụ ndu e meru; ẹphe dụ nsọ, bụ pẹ bụ ndu ono, yeru ẹhu l'ejeru mu ozi ono. Ẹphe ta ahaduru etso ụzo mu ẹgube ndu Lívayi haru iya lẹ teke ndu Ízurelu mesweru ono. ¹²Ọo-buru iphe-oma, dụ iche, ee-wofuta l'alì ono, dụ nsọ ono nù pẹ g'ọ buru ẹka kachaa nsọ, yee ndu Lívayi maru oke.

¹³“Laguga aguga alì kẹ ndu-uke Chileke ono bẹ ndu Lívayi a-hata oke alì lanu; ogologo iya a-dụ ụkporo unu nkwo-ẹka ẹto l'unu nkwo-ẹka labọ lẹ nkwo-ẹka ụkporo iri; uswekete iya adu ụkporo unu nkwo-ẹka l'unu nkwo-ẹka ise. Ogologo iya a-kpakọta dụ ụkporo unu nkwo-ẹka ẹto l'unu nkwo-ẹka labọ lẹ nkwo-ẹka ụkporo iri. Uswekete iya bụ iphe, ọo-kpakọ dụ bụ ụkporo unu nkwo-ẹka l'unu nkwo-ẹka ise. ¹⁴G'ẹphe te erekwa iya erere; ophu ẹphe egudekwa iya gbanweta ọzo. Ọo ẹka ono bẹ alì ono kachakpoo ree; ọo ya bụ g'ọ to lakwa onye ọzo l'ẹka; kele ọ bụ ẹka duru Chipfu nsọ.

¹⁵“Ẹka ophu phoduru nù pho, ọsa iya dụ unu nkwo-ẹka iri l'ẹbo lẹ nkwo-ẹka ụkporo iri ono; ogologo iya dụ ụkporo unu nkwo-ẹka ẹto l'unu nkwo-ẹka labọ lẹ nkwo-ẹka ụkporo iri ono bẹ a-buru alì oha; ẹka mkpukpu e-gudeje eme iphe, dụ pẹ ree; buru ẹka aa-kpushi ụlo; mẹ ẹka ẹphe a-nodu echeje ẹku pẹ. Mkpukpu ono bẹ a-nodu l'echilabọ alì ono gèdegede. ¹⁶Waa g'ọo-ha baa: Unu nkwo-ẹka iri lẹ nanu l'ụkporo nkwo-ẹka ise bẹ ọo-dụ l'uzo isheli iya. Ụzo ndohali iya adu kwapho unu nkwo-ẹka iri lẹ nanu l'ụkporo nkwo-ẹka ise. L'uzo ẹnyanwu-awawa bẹ ọo-dụ unu nkwo-ẹka iri lẹ nanu l'ụkporo nkwo-ẹka ise; ụzo ẹnyanwu-arịba adu kwapho unu nkwo-ẹka iri lẹ nanu l'ụkporo nkwo-ẹka ise. ¹⁷Alì ẹka ndu mkpukpu ono a-nodu echeje ẹku pẹ bẹ a-dụ nkwo-ẹka ụkporo iri l'ẹbo lẹ nkwo-ẹka iri l'uzo isheli; dukwapho nkwo-ẹka ụkporo iri l'ẹbo lẹ nkwo-ẹka iri l'uzo ndohali. Ọo-dukwapho nkwo-ẹka ụkporo iri l'ẹbo lẹ nkwo-ẹka iri l'uzo ẹnyanwu-awawa; dukwapho nkwo-ẹka ụkporo iri l'ẹbo lẹ nkwo-ẹka iri l'uzo ẹnyanwu-arịba. ¹⁸Ẹka phoduru nù l'ẹka yee alì, dụ nsọ ono maru oke kwaseru ogologo; bẹ a-dụ ụkporo unu nkwo-ẹka l'unu nkwo-ẹka ise l'uzo ẹnyanwu-awawa; dukwapho ụkporo unu nkwo-ẹka l'unu nkwo-ẹka ise l'uzo ẹnyanwu-arịba. Ọ buru iphe, a kotaru l'alì ono bẹ ndu ejeru mkpukpu ozi e-rije. ¹⁹Ọo ndu ejeru mkpukpu ozi, bụ ndu shigbaa l'ipfu l'ipfu ndu Ízurelu bẹ a-nodu akoje iya opfu. ²⁰Alì ono, unu e-bufu dobe

iche ono l'ophu; mbù ali, dù nsò ono; mē kē mkpūkpu; bē ogologo iya waa uswekete iya a-harù ɛnya nhamunha. Iphe ibe lanù a-dùje bù ùkporo unu nkwo-èka èto l'unu nkwo-èka labò lè nkwo-èka ùkporo iri.

21 “Èka phòduru nù l'ali ono ibekèboebo; mbù l'ali, dù nsò ono; mē l'ali kē mkpūkpu; bē a-tùko buru k'onye ishi. Oo-shi l'èka ono, a tataru ali, dù nsò ùkporo unu nkwo-èka èto l'unu nkwo-èka labò; lè nkwo-èka ùkporo iri ono; nòdu larù okoke iya l'ùzo ɛnyanwu-awawa. O buru egube ono bē ọ-dùkwapho l'ùzo ɛnyanwu-arìba. Oo-shi l'iphu èka ono, a tataru ali, dù nsò ùkporo unu nkwo-èka èto; l'unu nkwo-èka labò; lè nkwo-èka ùkporo iri ono; nòdu laaru okoke iya l'ùzo ɛnyanwu-arìba. Èka ophu, nò-tsotaru ali ono, e keshiru ipfu l'ipfu ogologo ono; bē a-buru k'onye ishi. Oo ya bù l'ali ono, dù nsò ono; mē eze-ùlo Chileke ono bē a-nòdu l'echilabò ali ono. 22 Oo ya bù l'ali kē ndu Lívayi; mē ali oha ono bē a-nòdu l'echilabò ali k'onye ishi ono. Èka iya ophu bù k'onye ishi ono bē a-nòdu l'echilabò oke ali Jiuda yee oke iya kē Benjiaminu.

23 “A bya lè k'ipfu ndu ophu phòduru nù: Benjiaminu bē a-hatakwapò oke lanù; ono bē a-nòdu shita l'ùzo ɛnyanwu-awawa jasù l'ùzo ɛnyanwu-arìba.

24 “Simiyonu bē a-hatakwapò oke lanù. Ono bē yee ali kē Benjiaminu a-ma oke; shita l'ùzo ɛnyanwu-awawa jasù l'ùzo ɛnyanwu-arìba.

25 “Isaka bē a-hatakwapò oke lanù. Ono bē yee ali kē Simiyonu a-ma oke; shita l'ùzo ɛnyanwu-awawa jasù l'ùzo ɛnyanwu-arìba.

26 “Zebulunù bē a-hatakwapò oke lanù. Nkiya bē yee ali kē Isaka a-ma oke; shita l'ùzo ɛnyanwu-awawa jasù l'ùzo ɛnyanwu-arìba.

27 “Gadu bē a-hatakwapò oke lanù. Nkiya bē yee ali kē Zebulunù a-ma oke; shita l'ùzo ɛnyanwu-awawa jasù l'ùzo ɛnyanwu-arìba.

28 “Kē Gadu bē oke iya l'ùzo ndòhali e-shi ndòhali agbè lè Tama jasù lè mini Meriba kē Kadèshi; jì-jia tsoru agùga ngele Ijiputu jasù lè Oke-Ènyimu.

29 “Noo ali, unu e-keru iphe, bù ipfu, nò lè Ízurelu g'ò buru okiphe phè bù ono. O buru iya a-buru oke ali phè. Nokwa iphe, Nnajiuphu, bù Chipfu epfu bù ono.”

Onu-abata, nògbaa lè Jierúsalemù

30 Waa onu èka ee-shije alufu lè mkpūkpu ono baa: L'ùzo isheli bù èka a turu; o dù unu nkwo-èka iri lè nanù l'ùkporo nkwo-èka ise ono; 31 bē onu-abata mkpūkpu ono bē aa-gùcha epha ipfu, nò lè Ízurelu iche iche. Onu-abata èto, nò l'ùzo isheli bē aa-gù onu-abata Rúbenu; mē onu-abata Jiuda; waa onu-abata Lívayi. 32 Èka iya k'ùzo ɛnyanwu-awawa, ogologo iya dù unu nkwo-èka iri lè nanù l'ùkporo nkwo-èka ise ono bē onu-abata èto a-dù: onu-abata kē Jíósefu; mē onu-abata kē Benjiaminu; waa onu-abata kē Danu. 33 Èka iya k'ùzo ndòhali, ogologo iya dù unu nkwo-èka iri

le nanu l'ukporo nkwo-eka ise ono; be onu-abata eto a-du: onu-abata ke Simiyonu; me onu-abata ke Isaka; waa onu-abata ke Zebulun. ³⁴Eka iya k'uzo enyanwu-ariba, ogologo iya du unu nkwo-eka iri le nanu l'ukporo nkwo-eka ise ono be onu-abata eto a-du, bu iya bu onu-abata ke Gadu; me onu-abata ke Asha; me onu-abata ke Nafutali. ³⁵Iphe, o-du gbaa mgburugburu bu ukporo unu nkwo-eka ebo l'unu nkwo-eka ise. Epha, mkpukpu ono a-zaru gb le mboku ono kwaseru be a-buru: "Chipfu no l'eka ono."